

東萊博

新體評註

上海大東書局印行

下冊



說



25

新體評註 東萊博議 卷三

葵邱之會

僖公九年夏會於葵邱。尋盟且脩好禮也。王使宰孔賜齊侯胙。曰：天子有事於文武，使孔賜伯舅。胙，齊侯將下拜。孔曰：且有後命。天子使孔曰：以伯舅耄老，加勞，賜一級。無下拜。對曰：天威不遠，顏咫尺。小白余敢貪天子之命，無下拜，恐隕越于下。以遺天子羞，敢不下拜。下拜，登受。秋，齊侯盟諸侯于葵邱。曰：凡我同盟之人，言歸于好。宰孔先歸，遇晉侯。曰：可無會也。齊侯不務德而勤遠略，故北伐山戎，南伐楚，西爲此會也。東略之不知，西則否矣。其在亂乎？君務靖亂，無勤於行。晉侯乃還。

天下之爲治者，未嘗無所期也。王期於王，霸期於霸，強期於強，不有以之。孰得而射之，不有以望之。孰得而趨之，志也者，所以立是期也。動也者，所以赴是期也。效也者，所以應是期也。汎然而議

期字與前篇待字相類

反接

數語言不
可無期
頓住
以上是要
有所期

以上期有
所得
又頓住
得此一縱
文情委曲

用喻作收
文氣飄忽
生動
應志者所
以立是期

卒然而行。忽然而罷。汗漫荒忽。無所歸宿者。是豈足與為治哉。故
期者。聖君賢臣所以先天下之治者也。期固為治之先。亦或為治
之害。自期於强者。至強則止。欲挽之使進於霸。不可得也。自期於
霸者。至霸則止。欲挽之使進於王。不可得也。何則。其素所期者。止
於如是也。強而止於強。霸而止於霸。是特安於小耳。雖不足肩盛
世而追還軌。然下視弱國陋邦。所獲不既多矣乎。謂之無志。則可。
謂之有害。則未也。抑不知天下之勢。不盛則衰。天下之治。不進則
退。強而止於強。必不能保其強也。霸而止於霸。必不能保其霸也。
驅駿馬而馳峻坂。中間豈有駐足之地乎。齊桓公拔管仲於繯綆。
桎梏之中。屬之國政。立談之間。遽以霸功相期。何其壯也。所期既

應動者所
以赴是期

寫伯者得
畫意光景如

寫伯者氣
魄震動赫
奕光景如

收束

立^{十七}左國右高。前鮑後隰。下逮^{十八}比閭族黨之民。夙興夜寐。淬厲^{十九}奮發。

以赴^{二十}吾君之所期。至於葵邱之會。威加諸侯。名震四海。天子致胙。

王人^{廿一}下臨。環以旌旄。崇以壇陛。幙張燎舉。有司戒期^{廿二}。駢圭交。烏抑

首就位^{廿三}。弁冕秩秩。穆然無聲。於是桓公降^{廿四}。阼遵廷^{廿五}。下拜王命。興俯

跪起之容^{廿六}。翼如也。環佩衝牙之音^{廿七}。鏘如也。降寵榮光。焜耀在列。申

以五命之嚴^{廿八}。永以載書之信。明約顯命。若挾河漢而轟雷霆^{廿九}。區區

曹許之君。出於鼠壤蟻封之中^{三十}。驟見曠古駭俗之偉觀。目眩氣奪。

莫敢仰視。雖平日跋扈倔強。不受控御^{三十一}。如晉侯者。猶膏車秣馬^{三十二}。奔

走道路。恐干後至之誅^{三十三}。五霸莫高於桓公。而桓公九合之盟^{三十四}。葵邱

之會。實居其最。一時文物之盛^{三十五}。騷人墨客。誇談矜語。至於今不衰。

滿字應前
止字起下
十餘滿字

頓挫
應效者所
以應是期

至此方轉
下說期滿
之害文字
有次序

文情搖宕

上用兩所

期既滿似

害生於既

滿之時接

此二句說

不在既滿

法也倒縮

嗚呼。桓公素所自期者。及葵邱之會。悉償所願。滿足無餘。種之累
 年。而穫於今日。信可謂不負所期矣。所期既滿。其心亦滿。滿則驕。
 驕則怠。怠則衰。近以來。宰孔之譏。遠以召五公子之亂。孰知盛之
 極。乃衰之始乎。吾嘗譬桓公之功業。葵邱未會之前。猶自朔至望
 之月也。寢長而寢盈。葵邱既會之後。猶自望至晦之月也。寢缺而
 寢盡。蓋未滿則有增。既滿則招損而已。尙安能復增乎。甚矣人心
 之不可滿也。桓公非不知滿之可戒也。所期既滿。其心不得不滿。
 也使桓公所自期者。不止於霸詎肯至。霸而滿哉。桓公之罪在於
 自期之時。而不在於既滿之時也。雨暴而沼溢。酒暴而卮翻。沼之
 所受有常限。卮之所容有常量。人之所期有常。願踰其限。過其量。

喻意夾出
正意

東萊文字
每每曲終
雅奏

塞其願雖不欲滿而不自知其滿矣。我不爲沼何憂乎十日之霖。
我不爲卮何憂乎千釀之醴。桓公素不以霸自期則下視霸功亦
蚊蟲之過前耳。吾是以知自期之不可小也。進霸而至於王極天
下之所期無在其上者其亦可以息乎。曰王道果可息則堯之兢
兢舜之業業湯之汲汲何爲者耶。

【評】

孫執升曰：孔子以器小譏管氏，卽此意。○朱字綠曰：通篇兩層立意，一是不可無所期。

一是所期不可自小而至於滿。主意重在所期不可自小而至於滿，卻先說不可無所期，輕先於重，多用此法。文亦光采橫溢，豪宕軼羣。○張明德曰：期於霸而復期於王，此自有無限作用。何患唐虞三代不復見於今日也。桓不見及此，仲更不見及此。東萊乃言之鑿鑿，篇中如言葵邱未會之先，猶自朔至望之月，寢長而寢盈，葵邱既會之後，猶自望至晦之月，寢缺而寢盡。此等議論，誰人道得出半字。卽使依稀言之，亦不能痛徹至此。此篇期字，當與前篇待字參看。

【音釋一】 ①【胙】祭肉。 ②【伯舅】天子謂異姓諸侯曰伯舅。 ③【葦】七十曰

葦。 ④【咫】八寸曰咫。 ⑤【小白】齊桓公名。 ⑥【略】巡行也。

【音釋二】 ⑦【的】射侯之中也。 ⑧【汎然】浮泛之義。汎同泛。 ⑨【卒然】恩遽

之貌。卒音猝。 ⑩【汗漫】（淮南子）吾與汗漫期于九垓之外（注）汗漫不可知也。故

以爲放浪而無檢制之稱。 ⑪【歸宿】猶言結局（管子）偶然無所歸宿。 ⑫【遐軌】

遠大之規法也。（晉書韓彝傳）邁周庾之濟塵。遵許郭之遐軌。 ⑬【駿馬】良馬。 ⑭【

峻坂】（漢書）帝從灞陵欲西馳下峻坂。坂音反。坡也。 ⑮【齊桓公二句】（淮南子）汜

論訓）管仲免於繲綫之中。立齊國之政。九合諸侯。一匡天下。繲綫黑索。拘繫罪人也。桎梏二

字衍。 ⑯【立談之間】謂俄頃也。虞卿立談之間。而取卿相見（史記）。 ⑰【左國右高

前鮑後隰】國高鮑隰。皆齊世臣之姓。 ⑱【比閭族黨】五家爲比。五比爲閭。五閭爲族。五

族爲黨。見（周禮）。 ⑲【夙興夜寐】句見（詩）。 ⑳【淬厲】猶言磨鍊（新論）越

劍性利。非淬礪而不銛。亦以喻人之奮進。淬音倅。厲同礪。 ㉑【王人】卽指宰孔。 ㉒【旌

旄】析羽而注於旗于之首曰旌。旄。犛牛尾。旗之注旄牛尾於于者。故曰旄。 ㉓【壇陛】盟

旄。析羽而注於旗于之首曰旌。旄。犛牛尾。旗之注旄牛尾於于者。故曰旄。 ㉔【壇陛】盟

會之地。⑤【幙張燎舉】幙，帳也。帷在上曰幙。燎，庭燎。庭中設炬以照幙帳也。⑥【戒期

】（左傳）齊侯戒帥期。⑦【駢圭交鳥】言諸侯聚會也。圭，玉也。諸侯瑞信之物。朝聘用

之鳥音昔履也。⑧【弁冕】冠也。（左昭）吾與子弁冕端委以治民。⑨【秩秩】有序

也。（詩）左右秩秩。⑩【穆然】靜貌。（漢書）於是吳王穆然穆讀若默。⑪【祀】事

矣。切階之兩旁也。（書畢命）夾兩階祀。⑫【翼如】（論語鄉黨篇）趨進翼如也。（注

）張拱端好如鳥舒翼。⑬【環佩衝牙】（禮玉藻）佩玉有衝牙。衝，玉之下端。玉形似牙。

故曰衝牙。⑭【鏘如】玉聲之和也。（禮玉藻）然後玉鏘鳴也。⑮【五命】葵邱之會。

有初命至五命。見（孟子）。⑯【載書】盟書也。（孟子告子篇）葵邱之會，諸侯束牲載

書而不歃血。⑰【挾】音閃。舒也。張也。⑱【轟】呼泓切。發聲之大也。⑲【區區】見

前。⑳【鼠壤】言地土之小也。本草有鼠壤土，謂園圃之土柔而無塊曰壤。㉑【蟻封】

蟻穴外有封土隆起，謂之蟻垤。言雖曰高大而實卑小也。㉒【跋扈倔強】俱見前。㉓【

控御】御馬使就範也。亦謂治人如御馬。（晉書劉琨傳）琨善於懷撫而短於控御。㉔【

晉侯】獻公也。㉕【膏車秣馬】（韓愈送李愿歸盤谷序）膏吾車兮秣吾馬。膏，以油潤

車輪秣飼也。⑤【後至之誅】（史記）禹會塗山防風後至誅之防風古國名。⑥【五

霸句】（漢書高帝本紀）蓋聞王者莫高於周文。霸者莫高於齊桓。⑦【文物】謂禮樂

典章也。（李白詩）朝野盛文物。⑧【騷人墨客】謂風雅之士。（宣和畫譜）騷人墨客

登高賦詩。⑨【宰孔之譏】見題注。⑩【五公子之亂】管仲卒五公子皆求立事見（

左傳僖公十七八年）。⑪【自朔至望自望至晦】月初一曰朔十五曰望月終曰晦。⑫

【沼】池也。圓曰池。曲曰沼。⑬【卮】音支酒器。⑭【十日之霖】（左傳隱公九年）

凡兩三日以往爲霖。⑮【千釀之醴】作酒曰釀。甜酒曰醴。（釋名）釀之一宿而成醴。

⑯【蚊蟲】皆小飛蟲。（國策）俛啄蚊虻而食之。蟲同虻。音盲。⑰【堯兢兢舜業業】（

漢書董仲舒傳）故堯兢兢日行其道。舜業業日致其孝。⑱【湯汲汲】（揚子法言）堯

舜禹湯文武汲汲。仲尼皇皇。

衛侯遜位激民

僖公十八年冬。邢人狄人伐衛。圍蒺圃。衛侯以國讓父兄子弟。及朝衆曰。苟能治之。纒請從。

焉衆不可而後師於訾婁狄師還定公八年晉師將盟衛侯於鄆澤趙簡子曰羣臣誰敢盟
衛君者涉佗成何曰我能盟之衛人請執牛耳成何曰衛吾溫原也焉得視諸侯將歆涉佗
援衛侯之手及挽衛侯怒王孫賈趨進曰盟以信禮也有如衛君其敢不唯禮是事而受此
盟也衛侯欲叛晉而患諸大夫王孫賈使次于郊大夫問故公以晉詬語之且曰寡人辱社
稷其改卜嗣寡人從焉大夫曰是衛之禍豈君之過也公曰又有患焉謂寡人必以而子與
大夫之子爲質大夫曰苟有益也公子則往羣臣之子敢不皆負羈縶以從將行王孫賈曰
苟衛國有難工商未嘗不爲患使皆行而後可公以告大夫乃皆將行之行有日公朝國人
使賈問焉曰若衛叛晉晉五伐我病何如矣皆曰五伐我猶可以能戰賈曰然則如叛之病
而後質焉何遲之有乃叛晉晉人請改盟弗許

天下之物有置之則不可見動之則不可禦者殆非人力之所能
爲也。機之發於天者然也。兄弟鬩于牆而外禦其侮是心安從生
耶。兄弟之愛天也鬪鬩之時其機伏而不見初未嘗亡也一旦遇

機字從激
字生

途人之辱。以動吾之機。是機一發。豈薄忿細怨所能遏耶。君臣也。父子也。夫婦也。兄弟也。朋友也。五者天下之大機也。私欲梏之。小智藩之。封繫固密。其機若不可復還也。或叩焉。或觸焉。其機立應。掣其梏。決其藩。固有破百年之人。僞於一息之間者矣。唐之代德。何如君也。昏庸猜虐。民困其暴。固已不復知有君臣之義也。及在播遷流離之中。用柳伋陸贄之言。貶損自責。以感發天下君臣之機。真機既生。森不可禦。向日之抑塞。向日之殘酷。向日之橫斂。向日之征徭。後機一衝。前怨咸息。愛君之外。舉無餘念。疾首痛心。爭先赴敵。不越月踰時。而歸二君於故都。祀唐配天。不失舊物。暫動其機。效已若此。况其機素明者耶。衛國之君。兩用此機。文公以邢

入題以議
論爲敘事

復提前天
字立論

映帶代德

狄侵晉侮
亦非小辱
不可以罪
二君出公
事各不同
牽合未確

狄之侵。避位而激其民。動是機於前。而終能滅邢。靈公以晉之侮。亦避位而激其民。動是機於後。而終能亢晉。是非樂於自屈。也不屈已於此。則無以發機於彼也。文公固賢主。若靈公豈素拊循其民者耶。民之所以畢力拒晉者。非爲靈公也。靈公之言。適動其愛君之機。而不能已也。雖然。動天之機者。不可雜之以人。狄侵晉。侮非有陝郊之危。奉天之急也。而文公靈公。張大其事。甚已之辱。而起民之怒。其動民之本。既雜而不純矣。故衛國之民。天機雖動。人機亦隨。馴致其患。公孫彌牟反竊是機。以拒出公。非動其機者。不端。詎至是耶。以人蔽天。猶可也。以人亂天。不可也。蔽者其天尙存。方開之以天。而遽投之以人。本原汨亂。吾不知其何時而能去也。

【評】朱字綠曰。動其機。亦是平常議論。取其首尾完好。引代德二宗事亦切。○張明德曰。機

伏而動。爲題中一激字伏脈。兩引唐事。以議論爲敘事。末後又歸到天宇上。首尾自是相應。

【音釋一】

①【菟圃】衛地。

②【煨】衛文公名。

③【訾婁郭澤】皆衛地。

④【

執牛耳】盟禮。尊者執牛耳以主盟。

⑤【溫原】皆晉邑。

⑥【歃】見前。

⑦【接】子

對切擠也。

⑧【及挽】血至挽也。挽同腕。音宛。臂之下端。

⑨【詬】歌殿切。恥也。

⑩【

羈絏】羈馬絡頭絏。馬經

【音釋二】

①【機之發於天】（禮大學注）機發動所由也。又真性也。

②【兄弟二

句】見（詩棠棣篇）鬩馨激切狠也。

③【梏】音谷。手械也。（孟子疏）利欲以制善。使

不得爲猶梏之制手也。

④【藩】屏也。所以障蔽。

⑤【人僞】（蘇軾詩）人僞相加有

餘怨。天真喪盡無純誠。

⑥【息】一呼吸也。

⑦【代德】唐代宗名豫。肅宗子。德宗名适。

代宗子。

⑧【猜虐】疑忌而殘暴也。

⑨【播遷】流離遷徙之義。

⑩【流離】漂散也。

（詩旄邱篇）瑄兮尾兮。流離之子。

⑪【柳伉陸贄之言三句】（通鑑）唐代宗時。驃騎

大將軍程元振專權自恣。吐番入寇。上幸陝州。元振不以時奏。致上狼狽。太常博士柳伉上疏。

請斬元振首。馳告天下。上猶以元振有保護功。放歸田里。唐德宗時。涇原兵過京師。作亂。上如奉天。朱泚反。據長安。自稱大秦皇帝。犯奉天。渾瑊擊破朱泚。奉闈解。考功郎中陸贄言於上曰。昔成湯以罪己。勃興。楚昭以善言。復國。陛下能不吝改過。以謝天下。使書詔無所避忌。則反側之徒。革心向化矣。上然之。故奉天所下書詔。雖驕將悍卒。聞之。無不感激揮涕。 ㊟【殘酷】暴虐也。 ㊟【橫斂】取民不以法也。 ㊟【征徭】征。徵稅也。徭。役也。 ㊟【疾首痛心】（左傳成公十三年）斯是用痛心疾首。暝就寡人。（注）疾。亦痛也。 ㊟【歸二君句】二君。謂代宗。德宗。故都舊時都城。 ㊟【祀唐配天二句】（左傳哀公元年）祀夏配天。不失舊物。（注）物。事也。 ㊟【靈公】衛靈公。名元。事見題注。 ㊟【亢】抵敵也。 ㊟【拊循】猶言撫慰。（史記）問疾醫藥。身自拊循之。 ㊟【陝郊二句】卽指唐代德事。 ㊟【馴致】（易）馴致其道。由漸而至曰馴。音旬。 ㊟【公孫彌牟】（左傳哀公二十五年）公孫彌牟作亂。衛侯出奔宋。 ㊟【出公】衛靈公孫名輒。 ㊟【汨亂】猶言濁亂。（唐書）汨亂朝經。汨古忽切。

梁亡

僖公十九年初，梁伯好士功，函城而弗處，民罷而弗堪，則曰：「某寇將至。」乃溝公宮，曰：「秦將襲我。」民懼而潰，秦遂取梁。

唐虞洙泗
反不見天
理映下罔
民中乃見
天理

引兩客

應首句

天下之不容泯者，天理也。登唐虞之朝者，舉目皆德政。陪洙泗之席者，入耳皆德音。縱橫交錯，無非此理。左顧右盼，應接不暇。其何自而窺天理之真在哉？至於居橫逆淫詖之中，天理間發，豈非是理之真在歟？我生不有命在天，人皆知紂之託辭也。然天之一言，胡爲而忽出於紂之口哉？何適而無道，人皆知跖之託辭也。然道之一言，胡爲而忽出於跖之口哉？紂身與天違，而口忽言天。跖身與道違，而口忽言道。噫，不如是何以知是理之果不可亡歟？梁伯

每用此法
見奇

一路委曲
頓挫機勢
卻復逸宕

此處看出
良心

應罔民是
良心

縱一層文
氣充滿

溺於土功。罔民致寇。自速滅亡。其罪固然矣。吾獨於罪之中而知天理之所在焉。人皆以罔民爲梁伯之詐心。吾獨以爲梁伯之良心。世之論良心者。歸之仁。歸之義。歸之禮智信。未有敢以詐爲良心者也。名詐以良心。豈有說乎。曰。詐非良心也。所以詐者。良心也。梁伯之版築。其自以爲是乎。其自以爲非乎。如自以爲是。必不待罔民。以某寇將至也。必不待罔民。以秦將襲我也。惟其心慊然以爲非。恐民之不我從。故虛張外寇以脅之耳。嗜版築而不已者。心之私也。慊版築而不安者。心之正也。詐固非良心。慊獨非良心乎。是以知天理之常在人欲中。未嘗須臾離也。欲心方熾而慊心遽生。孰導之而孰發之乎。嗚呼。梁伯一念之慊。此改過之門也。此復

結出君子
小人之分
在良心的
與不繼繼
夫字內有
功

禮之基也。此堯舜禹湯文武之路也。使聖人迎其善端推而大之。沛然若決江河莫之能禦。奈何一慊方生而遽繼以詐自起。自仆良心安得而獨勝乎。是知與生俱生者謂之良心。毀之而不能消背之而不能遠。有以繼之則為君子。無以繼之則為小人。繼與不繼而君子小人分焉。故學者不憂良心之不生而憂良心之不繼。

【評】

唐荆川曰。文有理趣。而語句灑脫。○孫執升曰。前半言天理。後半言良心。良心不亡。即

大理也。天理出於紂跖之口。良心在於詐心之中。專為小人誘掖。故多用叩擊法。○朱字綠曰。孟子言性善。朱子言雖下。越不能無道心。自是顛撲不破。從泯滅良心處。看出良心。意更警切。由此推之。凡為不善而工於覆匿。與為不善而假託善名者。何非良心之所在也。王伯安言良。知是知有良心者矣。乃曰無善無惡心之體。然則良知又是何物。至今祖述其說者。必欲打掃善字一空。歸於虛無而後止。使心之體果無善無惡。必不知善之為是。惡之為非也。梁君何為。

復欺罔其民。以行不善也。從和尙位下討生活者。必又曰。滿街都是聖人矣。○張明德曰。人性本善。上智與下愚。均有這點種子。朱子亦嘗言人雖極惡大罪。未嘗無道心。可知爲善之良心易見。而爲惡之良心難測也。文能從此中看出良心二字。用意獨奇。尤妙在分君子小人在良心之繼與不繼。二句內有多少咀嚼。且開多少法門。○無善無惡心之體。體本渾然。如一太極。所謂良知者。乃渾然中不見有一惡之可指可名。因無惡之可指可名。而謂之善。非心之體實有善惡之分也。事有善惡。而念無善惡。念加於事之善者。則爲善念。念加於事之惡者。則爲惡念。博議中已詳言之。人有求財不厭爲貪心。乃本此心以求道。則與夫子學而不厭。何以異。又有守財弗失爲吝心。乃本此心以守道。則與顏子之服膺弗失。又何以異。向之惡。今之善。特因利與義而改其名。彼心之體。曷嘗有善惡者耶。顏淵曰。舜何人也。予何人也。有爲者亦若是。果爾則滿街都是聖人。何必從和尙位下討生活哉。然則人特患向善之心不專。或轉求道守道之念。以求利而守利。則滿街不免都是凡人耳。至謂祖述王氏之說者。必將善字打掃一空。歸而止於虛無。此不足患也。在自伸其說者。能明辯以晰。而不囿圖其語焉。斯得矣。

【音釋】

①【梁】秦仲有功。周封其少子康於梁山。在今陝西。

②【亟】音器。頻數。

也。③【罷】同疲。④【秦】嬴姓，伯益之後，在今陝西。

【音釋二】

⑤【天理】天之常道也。（禮樂記）所以滅天理而窮人欲者也。⑥【唐

虞洙泗】俱見前。⑦【德音】（詩皇矣篇）貍其德音。⑧【縱橫】前後左右之謂。

⑨【交錯】謂交閒錯雜也。（禮文王世子）禮樂交錯於中。⑩【左顧右盼】（曹植與

吳質書）左顧右盼，謂若無人。⑪【應接不暇】（世說新語）王子敬曰：從山陰道上行，

山川自相映發，使人應接不暇。⑫【橫逆】謂以非理加人也。（孟子離婁篇）有人於此，

其待我以橫逆，橫去聲。⑬【淫詖】（孟子滕文公篇）我亦欲正人心，熄邪說，距詖行，放

淫辭，詖，偏陂也，淫，放蕩也。⑭【我生句】見（書）。⑮【何適而無道】（莊子胠篋篇

）跖之徒問於跖曰：盜亦有道乎？跖曰：何適而無有道耶。⑯【罔民】（孟子梁惠王篇）

是罔民也。（注）罔，猶羅網，欺其不見而取之也。⑰【致寇】（易解卦）負且乘，致寇至。

貞吝。⑱【慊然】意不滿也。⑲【版築】（孟子告子篇）傅說舉於版築之間，謂營造

之役也。⑳【沛然二句】（孟子盡心篇）及其聞一善言，見一善行，若決江河，沛然莫之

能禦也。

用人祀神

禧公十九年夏宋公使邾文公用鄆子于次睢之社欲以屬東夷司馬子魚曰古者六畜不相為用小事不用大牲而况敢用人乎祭祀以為人也民神之主也用人其誰饗之齊桓公存三亡國以屬諸侯義士猶曰薄德今一會而虐二國之君又用諸淫昏之鬼將以求霸不亦難乎得死為幸

精簡

承無閒說
得表裏洞
徹

小落

無閒則仁有閒則暴無閒則天下皆吾體烏得而不仁有閒則獨私其身烏得而不暴幽明也物我也混混同流而無閒者也喜同一喜喜觸於心則幽明物我不約而皆喜怒同一怒怒觸於心則幽明物我不約而皆怒判而為慘舒休戚愛憎哀樂之情別而為盈虛予奪是非損益之理散而為禍福利害安危死生之變彼動則此應彼發則此知未嘗有閒也昔之仁人所以視民如傷者豈

無閒一段

透闢
身與神無

有閒一段

主客夾寫

無閒一段

以冥冥之不可欺。昭昭之不可犯哉。幽明物我通為一體。不見其有可傷之地也。既傷於民。亦傷於身。既傷於身。復傷於神。噫。知此者。其知仁之方乎。不仁則不覺。不覺則不合。幽明不合。而有人與神之閒焉。物我不合。而有人與己之閒焉。遂以為苟便於身。何恥乎。媚神苟媚於神。何恤乎。害人以妄傳。妄以偽傳。偽然後淫。誣怪誕之說興。然後焄蒿悽愴之妖作。然後陰詭側僻之祀起。然後豐塗剝剔之亂生。如宋襄楚靈季平子之事。蓋有禽獸之所不忍為者。非天獨賦以酷戾很逆之性也。私已深畏神。甚淪惑其心。至此極也。一時之君子。又從而譏之。曷若求其為暴之原。而滌之乎。天下之理。有通有塞。其通耶。八荒之外。六合之內。幽明物我不見其

有開一段
長

閒不在多

總束

閒孰非吾仁。其塞耶。雖汲汲以愛人利物爲念。彼毫芒之差。藩籬
限焉。發於其心。害於其事。發於其事。害於其政。民有不得其死者
矣。一念之毒。流金鑠石。一念之駛。奔電走霆。雖未嘗以兵殺人。實
以心殺人。雖未嘗用人以祭社之神。實用人以祭心之神也。其視
宋襄輩。何以太相過乎。通者仁之門也。塞者暴之門也。是故欲仁
者。不於其仁。於其通。去暴者。不於其暴。於其塞。

【評】王鳳洲曰。不就殘忍立論。但曰有閒無閒。字字從性命上得來。○鍾伯敬曰。以通塞申
論無閒。更覺精透。○徐揚貢曰。胡文定元年傳。發明仁體。東萊此議更透。○孫執升曰。東萊先
生說理之文。最多精語。讀至復傷於神。及用人以祭心之神二說。毛髮俱豎。神在人心之中。殺
人者自殺其心之神。似爲孟夫子一閒語下注脚。○朱字綠曰。用人祀神。其惡甚著。本不足論。
前用幽明物我莫非同體。看出仁道之無可傷。後用一念之毒。一念之駛。而民有不得其死者。

看出不仁之不在大。麀麀精言能發前人所未發。○張明德曰：神與人一也。以人祀神，神豈享之乎？雖黃童白叟皆知其事之誕而立心之慘而忍也。先生語必窮源，况幽明物我猶是老生常談，讀至復傷於神，及用人以祭心之神二說，令我拍案叫絕。

【音釋一】

①【邾】曹姓陸終之後在今山東。

②【鄆】姒姓在今山東。

③【睢】

音雖。水名在今山東。④【六畜句】六畜馬牛羊豕犬雞不相爲用，謂若祭馬先不用馬畜許又切。

【音釋二】

⑤【無閒】閒，隙也。

⑥【有閒】（莊子養生主篇）以無厚入有閒。

⑦

【物我】人與我也。⑧【混混】水流貌（孟子離婁篇）原泉混混。⑨【同流】（孟

子盡心篇）上下與天地同流。⑩【慘舒】傷痛與快樂之謂。⑪【愛憎】憎惡也。愛之

反。⑫【予奪】予同與，奪之反。⑬【視民如傷】（孟子離婁篇）文王視民如傷。⑭

【冥冥昭昭】（列女傳）忠臣與孝子不爲昭昭變節，不爲冥冥墮行。⑮【仁之方】（

論語雍也篇）能逝取譬，可爲仁之方也已。（注）方，術也。⑯【怪誕】猶言離奇。⑰【

焜蒿悽愴】見前。⑱【燹塗】（左傳昭公五年）楚執吳使蹶由，將以燹鼓燹，以血塗物。

隙也。⑤【刳剔】（書泰誓）刳剔孕婦。刳剔謂剝割也。⑥【宋襄】卽題注事。⑦【楚靈】（左傳昭公十一年）楚子滅蔡。用隱太子於岡山。⑧【季平子】（左傳昭公十年）平子伐莒。取郟。獻俘。使用人於亳社。⑨【酷戾】慘刻曰酷。暴虐曰戾。⑩【很逆】殘忍曰很。違背曰逆。⑪【畏神】（大戴禮）黃帝死而人畏其神百年。⑫【淪惑】淪亡於迷惑也。⑬【八荒之外】（列子仲尼篇）遠在八荒之外。近在眉睫之間。八荒八方之荒遠處也。⑭【六合之內】（莊子齊物篇）六合之外。聖人存而不論。六合之內。聖人論而不存。六合。天地四方也。⑮【毫芒】謂極纖微也。（莊子）大馬之捶鉤者。年八十矣。而不失毫芒。⑯【發於其心四句】見（孟子）。⑰【流金鑠石】（楚辭）十日代出。流金鑠石。言如天時大暑。金石亦爲所鎔銷也。鑠。式約切。銷也。⑱【奔電走霆】（任昉王文憲集序）追奔電。逐遺風。電。天然之光熱也。疾雷曰霆。

宋人圍曹

僖公十九年。宋人圍曹。討不服也。子魚言於宋公曰。文王聞崇德亂而伐之。軍三旬而不降。

退脩教而復伐之。因壘而降。詩曰：刑于寡妻。至于兄弟。以御于家邦。今君德無乃猶有所闕。而以伐人若之何。盍姑內省德乎。無闕而後動。

速遲二字
隱冒王伯

俱用兩喻
夾作三疊
凡六層反
正一氣

應見字

此段法變
以化其板

天下之情不見其速。未有見其遲者也。浴焉而食。食焉而繭。繭焉而織。歷數月而後得帛。凡蠶者皆以為固然。不聞厭其遲也。耕焉而種。種焉而耘。耘焉而穫。穫焉而舂。歷一歲而後得粟。凡農者皆以為固然。不聞厭其遲也。身修而後家齊。家齊而後國治。國治而後天下平。一階一級。豈可妄躐哉。由三代以前。亦未聞有厭其遲者也。見倚市門者。得帛於一笑之頃。則回視蠶婦數月之勞。不勝其遲矣。見坐賈區者。得粟於一日之閒。則回視農夫終歲之勞。不勝其遲矣。功利之說興。變詐之風起。棄本徇末。競收富

題只一點

以下申前
正論轉出
小欲速
不知本

以下是本
論正意在

此三段爲
化三段爲

兩段折入
段語文勢

迴翔有情
有景應首

陰字不見
句不見中
字不見也
有此在也

強之效於立談之餘。反顧王道。豈不甚遲而可厭哉。是宜子魚舉

文王之事。而終不能止宋襄之師也。儒者之論曰。蠶而帛。農而粟。

身而治。正也不以蠶。不以農。不以身。雖得利。如不正。何。嗚呼。小人

之情。惟利是嗜。既衣其帛。何恤乎不蠶之名。既食其粟。何恤乎不

農之名。既享其治。何恤乎不身之名。爲是論者。豈足以梃小人之

心哉。盍反其本矣。天下之所以有僥倖而得帛者。以蠶婦陰爲之。

織也。天下之所以有僥倖而得粟者。以農夫陰爲之。耕也。如使天

下盡厭耕織。焚其機斧。其耒則雖有巧術。何從而取粟。帛皆將凍

於冬而餒於途矣。彼僥倖而收功利。豈真其力哉。亦聖人之遺澤。

三綱五常之猶未亡者。陰有以扶持之也。向若聖人皆效後世之

猶耕織之
有布粟

設難以待
後之君相

欲速蹶其根。涸其源。以爭旦暮之利。則大經大法。殄滅無遺。人之類滅久矣。雖有欲速之心。何所用哉。然則後世共詆薄以爲遲鈍。迂闊者。乃其所恃以生者也。無賢者。則不肖者不能獨立。無智者。則愚者不能獨存。彼其相戕相賊。歲消月鑠。而戴髮含齒之屬。終不可盡者。意其中必有所恃也。所恃者。果專在於聖人乎。曰。否。

【評】

孫月峯曰。文勢縱橫。然觀其步驟。卻又按轡而馳。○鍾伯敬曰。臨去又一轉。有餘不盡。

含無限烟波。○朱字綠曰。耕織政治。平排三段。反復六層。後變主客兩對。安排之法。處處高老。○張明禰曰。不務修德。而急於伐人。此不揣之甚者。篇內引耕織政治。分爲三柱。以明欲速不知本之害。後又化三段爲兩段。插入引喻。意文勢迴翔。有情有景。雖極變化。卻刁斗不亂。

【音釋一】

①【曹】周文王子曹叔振鐸始封在今山東。②【崇】崇侯虎。

【音釋二】

③【浴食繭纈】（禮祭義）卜三公之夫人世婦之吉者。使入蠶於蠶室。奉

種浴於川。桑於公桑。風戾以食之。(又)世婦卒蠶。遂獻繭於夫人。(又)夫人纁。三盆手。食音嗣。纁音騷。抽繭出絲也。(四)【帛】繒也。今謂之綢。(五)【耘】去草也。(六)【穫】刈穀也。(七)【春】書邕切。擣粟也。(八)【身修三句】見(禮大學)。(九)【躐】踰越也。(十)【倚市門】謂女子之賣淫。(史記貨殖傳)刺繡文。不如倚市門。(十一)【賈區】賣物之區也。(漢書胡建傳)穿北軍壘垣以爲賈區。行貨曰商。居貨曰賈。音古。(十二)【功利】(論語注)齊俗急功利。喜誇詐。(十三)【棄本徇末】(王融策秀才文)今農職不修。文儒日競。棄本徇末。厥弊滋多。(十四)【立談】見前。(十五)【不身】不修其身也。(十六)【梘】音泥。上聲。杜絕之義。(唐書牛徽傳)徽治以剛明。梘絕干請。法度復振。(十七)【盍反其本矣】句見(孟子)。(十八)【僥倖】同微幸。(禮中庸)小人行險以微幸。(注)微求也。幸謂所不當得而得者。(十九)【陰】默也。暗也。(二十)【機】織具。所以轉輪者。(二十一)【末】田器。耜之柄。(二十二)【蹶音厥。挫也。動也。】(二十三)【涸】何畧切。竭也。(二十四)【殄滅無遺】(書盤庚)殄滅之。無遺育。殄。迪。燃。切。盡也。(二十五)【人之類滅久矣】句見(韓愈文)。(二十六)【詆薄】侮慢輕薄也。(二十七)【遲鈍迂闊】(蘇軾上皇帝書)忠厚近於迂闊。老成初若遲鈍。(二十八)【歲銷月鑠】(韓

愈石鼓歌。日銷月鑠就埋沒。
⊕【戴髮含齒】（列子黃帝篇）戴髮含齒倚而趨者謂
之人。

隨伐楚

僖公二十年。隨以漢東諸侯叛楚。冬。楚鬬穀於菟帥師伐隨。取成而還。君子曰。隨之見伐。不
量力也。量力而動。其過鮮矣。善敗由己。而由人乎哉。詩曰。豈不夙夜。謂行多露。

以自強立
論照定由
己不由人
意不承
雙承
反收

提明隨楚
之勢左氏

君子。憂。我。之。弱。而。不。憂。敵。之。強。憂。我。之。愚。而。不。憂。敵。之。智。強。者。弱
之。對。也。我。苟。不。弱。則。天。下。無。強。兵。智。者。愚。之。對。也。我。苟。不。愚。則。天
下。無。智。術。後。之。爲。國。者。終。歲。憂。敵。之。強。而。未。嘗。一。日。憂。我。之。弱。終
歲。憂。敵。之。智。而。未。嘗。一。日。憂。我。之。愚。使。其。移。憂。敵。之。心。而。自。憂。則
誰。敢。侮。之。哉。以。隨。之。陋。而。鄰。於。楚。以。隨。之。君。臣。而。與。楚。成。子。文。抗。

譏其不量
力爲後文
翻駁地

一句後又
數翻發盡
以下之意
左氏之貶
下文乃意
其非退怯
甘被退怯
四字伏後
畏楚是說
信如是說
轉語極佳
就上文一
句反跌

漢陽句引
以破左氏
之說極當

其強弱智愚判然矣。隨非惟不知自憂。乃不自量其力。怒臂當轍。以蹈禍敗。左氏以不量力譏之。允矣。其言曰。隨之見伐。不量力也。量力而動。其過鮮矣。善敗由己。而由人乎哉。左氏之意。以謂楚雖強暴。終不敢無故加兵於隨。使隨自知力不如楚。甘處退怯。則禍何由至哉。伐隨者楚也。召楚者隨也。是隨之敗。由己。而不由人也。見伐者。雖在人。無致伐之端者。顧不在我乎。嗚呼。信如是說。乃所謂由人。而不由己也。畏楚而不敢先動者。固出於隨矣。所以制隨而使之不動者。非楚乎。是其不動者。名由於我。而實由於人也有宗廟。有社稷。有民人。而寄存亡之命於他國。惴惴自保。惟幸不見侵。陋矣。漢陽諸姬。楚實盡之。彼豈皆先犯楚者哉。隨雖量力自守。

又提出理
字直斷左
氏

應前甘處
退怯
發力量
二字實是
由己至理

恪遵信約。疆場有釁。楚之執事。豈其顧盟。然則隨雖自守。不能禁
楚之吞噬。存亡之權。固由楚而不由隨也。左氏能誦善敗由己之
言而止耳。孰知善敗由己之理乎。天下之事。未有不由己者。善者
己也。極其善則爲堯舜禹湯者。亦己也。敗者己也。極其敗則爲桀
紂幽厲者。亦己也。前無禦者。欲聖則聖。後無挽者。欲狂則狂。隨侯
果知此理。則位天地育萬物。無不由己。况區區之楚。何足畏乎。左
氏謂畏楚爲量力。不知適以墮人之力也。古人之所謂量力者。蓋
有說矣。養而未充也。爲而未成也。脩而未備也。於是量力而未敢
輕動焉。所憂固在於己。而不在於人也。養已充。爲已成。脩已備。有
所不動。動無敵矣。苟以齷齪自保。爲量力。則人將自安於弱。而終

復前句收
住有力

於弱矣。自安於愚而終於愚矣。墮天下之力者非量力之論歟。

【評】

朱字綠曰：左氏量力而動，原未嘗禁其不動。文看出甘處退怯爲敵所制，反是由人不能由己，是從無可翻案處，翻出新意。篇末養未充爲未成，修未備及已充已成，已備兩層說得完全，否則以隨之小弱當楚之強大，不教之效死勿去而導之爭地爭城，是速之斃而已矣。○張明德曰：知己知彼，此一定之論。左氏責其不量力而妄動，原是確論。東萊以自強立論，拈定由己不由人意，處處剝發，以破左氏之說，後又發明量力二字，實是由己至理，是從無可生法處翻出一段至理。○東萊先生恐小國不量力妄動以速禍也，故教以養之爲之修之，苟未充未成未備而輕動也，則禍矣。而又恐甘處退怯以終於弱，終於愚懼禍而不動也，更有已充已成已備，動無敵之說以示之，則當此未充已充之時，固有一番作用在內，尚非僅教以效死勿去也。奚云導之以爭地爭城而速之斃哉。朱評博議每於無甚緊要小節處，往往摘出而仍不能圓自其說，故略舉數端書後以待質云。

【音釋】

①【隨】國名在今湖北。

【音釋二】

①【楚成子文】楚成王與令尹子文。

②【怒臂當轍】

（莊子人間世篇）

汝不知夫螳螂乎。怒其臂以當車轍。不知其不勝任也。喻氣雄而力薄。於事無濟也。

③【

惴惴】憂懼貌。（詩黃鳥篇）惴惴其慄。

④【漢陽諸姬二句】見（左傳僖公二十八年）

謂漢水之南多姬姓小國。皆爲楚滅盡。

⑤【疆場】邊境也。（左傳）鄭人怒君之疆場。

場音亦。

⑥【楚之執事二句】見（左傳昭公元年）

⑦【位天地育萬物】（禮中庸）

致中和。天地位焉。萬物育焉。（注）位者安其所也。育者遂其生也。

⑧【齷齪】音渥促。

急促局陘貌。（韓愈文）猥瑣齷齪。既不足與語。

宋公楚人戰於泓

僖公二十年。宋襄公欲合諸侯。臧文仲聞之。曰。以欲從人。則可以人從。欲鮮濟。二十一年。宋

人爲鹿上之盟。以求諸侯於楚。楚人許之。公子目夷曰。小國爭盟。禍也。秋。諸侯會宋公於孟

子魚曰。禍其在此乎。於是楚執宋公以伐宋。二十二年。宋公伐鄭。子魚曰。所謂禍在此矣。秋。

楚人伐宋。以救鄭。宋公及楚人戰於泓。宋人既成列。楚人未既濟。司馬曰。彼衆我寡。及其未

直起直行
直斷不用
奇巧堂堂
正正之文
直出

直接三段

宋襄有三
愚而不知
帝王之兵
不與焉

既濟也。請擊之。公曰不可。既濟而未成列。又以告。公曰不可。既陳而後擊之。宋師敗績。公傷股門官殲焉。國人皆咎公。公曰。君子不重傷。不禽二毛。古之爲軍也。不以阻隘也。寡人雖亡國之餘。不鼓不成列。子魚曰。君未知戰云云。二十三年。宋襄公卒。傷於泓。故也。

由涿鹿而至牧野。舉帝王之兵。更數十戰。由六經而至諸子。談帝王之兵。踰數萬言。效非不明。而說非不詳也。及宋襄公爲泓之役。而以帝王之兵自許。反至喪敗。後世指其一戰之失。盡疑帝王之兵爲不可信。果哉說之遽也。宋襄君於宋。豈不知宋之弱。迫於楚。豈不知楚之強。今乃不量宋之力。偃然自爲盟主。欲屈強楚之君於會。其愚而不能料事一矣。齊桓之霸。宋襄耳目所接也。宋襄自視信義與齊桓孰愈。壤地與齊桓孰愈。兵甲與齊桓孰愈。齊桓九

總斷

應前後世
指其一戰
之失起兩
波

數語破盡
迂儒之障

合諸侯終不能屈致楚子。而宋襄乃驟欲致之。其愚而不能料事
二矣。孟之見執。幾不免虎口。僅而縱釋。曾未閱時。遽忘前日之辱。
尚敢稱兵與楚爭鄭。其愚而不能料事三矣。是三者皆匹夫匹婦
之所共曉。况所謂帝王之兵制。遠在千百年之外。斷編遺簡。若滅
若沒。若存若亡。是豈宋襄之所能知乎。觀其料今事之疎。即可見
其談古道之謬。雖未交鋒之前。固知其必敗也。說者乃以宋襄之
敗爲古道之累。是猶見贖者之誤。評宮角遂欲并廢大樂。豈不過
甚矣哉。或者又謂宋襄無帝王之德。而欲效帝王之兵。所以致敗。
亦非也。使帝王之世人皆服其德。則固不待於用兵矣。德不能服。
是以有兵。則兵者生於人之所不服也。彼既不服矣。豨縱豕突。亦

破宋襄所稱帝王之兵非是引書再破其說

以下駁公羊而贊子魚所以照出宋襄之愚

何所不至我乃欲從容揖遜以待之適遺之禽耳吾恐帝王之兵不如是之拙也古之誓師者曰殄殲乃讎曰取彼凶殘凜然未嘗有毫髮貸其所寬者惟弗迓克奔而已奔而歸我是以弗擊苟摧鋒而與之爭一旦之命胡爲而縱之哉是縱降者帝王之兵縱敵者宋襄之兵也烏可置之一域耶公羊子以宋襄之戰爲文王不是過嗚呼宋襄何足以知文王若子魚乃真知文王者也子魚諫宋襄伐曹曰文王聞崇德亂而伐之軍三旬而不降退修教而復伐之因壘而降其言薰然而不傷退然而不伐妙得文王之本心至於泓之戰諫宋襄之辭發揚激厲奮起勁悍驟與前日異若與文王不相似與變推移不主故常此真學文王者也知子魚之善

學文王則知宋襄之不善學文王矣。

【評】

焦弱侯曰：學文王不與宋襄而與子魚，所謂善學柳下惠者。無如魯男子，深得脫胎換

骨之法，不待辨論而公羊之說自屈，尤見筆力之高也。○朱字綠曰：博議好用奇峭之句，獨此篇舉止端嚴，不事佻巧，至破宋襄迂愚之論，極為痛快。前說宋襄陳餘以杯水救車薪之火，尙許他有一念之合於帝王，此并說所言非是帝王之道，更直截。○張明德曰：度量力，不待智者而知之也。泓之戰，子魚早已言之，宋公不自揣而致有二十三年身死之禍，文直起直斷直結，乃為有制之師，其說宋襄之愚處，更極痛切。此文之正大而不落纖巧者。

【音釋一】

①【泓】水名，在今河南。②【鹿上】地名，在今安徽。③【孟】地名，在

今山西。④【子魚】即目夷，宋襄弟。⑤【殲】子廉切，盡也。⑥【重傷】已傷之不再

傷。⑦【二毛】有白髮之人。⑧【阻隘】謂不阻人於隘也。⑨【亡國之餘】宋商紂

之後。

【音釋二】

①【涿鹿】黃帝誅蚩尤於涿鹿，都於涿鹿之阿。涿鹿，山名，在今直隸涿鹿縣。

東南 ①【牧野】周武王克紂於牧野。遂滅商。牧野古地名。紂之南郊。在今河南淇縣南。

②【六經諸子】六經詩書易禮樂春秋諸子。諸家所著之書。③【果哉】果執滯不通也。

④【遽】輕也。⑤【偃然】自安之意。⑥【不免虎口】（莊子盜跖篇）料虎頭。編

虎鬚。幾不免虎口哉。言危險也。⑦【斷編遺簡】零落不全之文字也。⑧【交鋒】謂鋒

刃相交。猶言交戰。（陸機文）戰無交鋒之虜。⑨【曠者】目無睛曰曠。音貴。⑩【宮角

】宮商角徵羽五音也。⑪【大樂】（禮樂記）大樂與天地同和。⑫【豨】希上聲。豨

也。⑬【豕突】（後漢書）恐遂轉更。豕突上京。豕性喜觸。故爲寇賊所至侵犯之喻。⑭

【遺之禽】謂楚執宋公也。（左傳昭公五年）使羣臣往遺之禽。以逞君心。遺去聲。禽同擒。

⑮【殄殲乃讐取彼凶殘】句皆見（書秦誓）。⑯【貸】音態。寬免也。⑰【弗迓克

奔】句見（書牧誓）謂能奔來降者。勿迎擊之。迓音訝。迎也。⑱【摧鋒】（漢書吳王濞

傳）此年少。摧鋒可耳。安知大慮。⑲【一域】猶言一地。⑳【公羊二句】（公羊傳）

宋師大敗。故君子大其不鼓不成列。臨大事而不忘大禮。以爲雖文王之戰。不是過也。㉑【

文王聞崇德亂四句】見上宋人圍曹題解。㉒【薰然】和也。（韓愈送陳彤序）薰然其

和。【不主故常】（莊子天運篇）變化齊一。不主故常。

魯饑而不害

僖公二十一年夏大旱公欲焚巫尪臧文仲曰非早備也修城郭貶食省用務穡勸分此其務也巫尪何為天欲殺之則如勿生若能為旱焚之滋甚公從之是歲也饑而不害

要說天人合一先說俗論天與人無預與伏左氏早在天備在人意在兩段索性把俗論暢說一番奇警

天者人之所不能外也。世之論天者何其小耶。日月星辰之運則付之天。災祥妖孽之變則付之天。豐歉疫癘之數則付之天。若是者皆非人之所能為。吾知崇吾德修吾政而已。彼蒼蒼者吾烏知之哉。以湯之時而天旱。天與湯未嘗相參也。當是時天亂而湯治。以秦之暴而天稔。天與秦未嘗相參也。當是時天治而秦亂。天自旱。之湯自養之。天自稔之。秦自暴之。天與人曷嘗相預耶。自世俗

天人句鎖
合起意

推左氏意
作斷

一句斷轉

即前說轉
深一層應
起語正意

取左氏說
轉深一層
此一箇關
鍵一人一體
言之鑿鑿

之說行。天人始離而不合矣。魯僖遇旱而欲焚巫尪。其陋已甚。賴
從文仲之諫。亟修旱備。是歲饑而不害。詳考左氏所載。殆未免世
俗之見也。左氏之意。以謂旱在天。備在人。泉枯石燥。土焦金流。人
固無如天何。修城節費。務穡勸分。天亦無如人何。饑者天之所爲
也。不害者人之所爲也。果如是說。則所見者。不過覆物之天耳。抑
不知天大無外。人或順。或違。或向。或背。徒爲紛紛。實未嘗有出於
天之外者。也。順中有天。違中有天。向中有天。背中有天。果何適而
非天耶。左氏謂脩旱備爲無預於天。抑不知文仲之諫。自何而發。
僖公之悔。自何而生。旱備之脩。自何而出。人言之發。即天理之發。
也。人心之悔。即天意之悔也。人事之脩。即天道之脩也。無動非天。

引成王事
作證確切

胸中之天
妙絕

淡遠可思

而反謂無預於天。可不爲太息耶。善觀天者。觀其精。不善觀天者。觀其形。^九成王之方疑周公。其天固嘗蔽也。及雷電以風。成王肅然。祇懼與召公太公共啓金縢之書。始信周公之勤勞。是成王胸中之天。已回於執書以泣之時矣。豈必待天雨反風。禾則盡起。然後知天意之回耶。待天雨反風而知天意者。周人之知天也。非召公太公之知天也。

【評】

袁中郎曰。元言灑灑。如聞玉屑。○朱字綠曰。駁去天與人無預之說。卻先透發天與人

無預。然後轉入天人一體意。博議多用此法。議論警動。淪迴激轉。辯沓岡重。令人賞而忘倦。○

能脩早備。即是回其胸中之天。天道遠。人道邇。故天人相答如響。亦有時漠不相應。畢竟崇德

脩政以俟天命。爲回天之要。○張明德曰。天之爲天。昭昭也。然執天以論天。未免拘墟之見。篇

中人言之發。卽天理之發。人心之悔。卽天意之悔。人事之脩。卽天道之脩。無動而非天。天與人

合而爲一。此方是言天實際。先生破左氏無預于天之意。于此已透徹。而復結以成王胸中之天。更奇更關。饑而不害。文仲之言成之。若非有此創論。幾爲左氏所愚。此真可謂之石破天驚。

【音釋一】

①【巫尪】（左傳注）巫尪。女巫也。主祈禱請雨者。或以爲尪非巫也。瘠病

之人。其面上向。俗謂天哀其病。恐雨入其鼻。故爲之旱。是以公欲焚之。尪。烏荒切。

【音釋二】

②【辰】大辰。亦星也。③【歉】荒年。④【疫癘】癘。疫氣也。音例。⑤

【蒼蒼】深青貌。（詩悠悠蒼天注）據遠視之。蒼蒼然則爲蒼天。⑥【湯之時而天旱】

（說苑）湯之時大旱七年。於是使人持三足鼎祝山川。已而天大雨。⑦【秦之暴而天稔】

（風俗通）秦昭王使陳永爲蜀郡太守。開成都兩江。溉田萬頃。無復水旱之災。歲常豐稔。

⑧【土焦金流】（莊子逍遙遊篇）大旱金石流。土山焦而不熱。⑨【成王之方疑周

公數句】事詳（書金縢篇）

成風請封須句

僖公二十一年。任宿須句。顯。與。風。姓也。實司大皞。與有濟之祀。以服事諸夏。邾人滅須句。須

句子來奔。因成風也。成風爲之言於公曰。崇明祀。保小寡。周禮也。蠻夷猾夏。周禍也。若封須句。是崇皞濟而脩祀紆禍也。

從不忘周立論

點入數人映出一女子

小落開一筆

合一筆

設疑情以呼本意

先王之澤入人之深。雖至於世降道散。猶相與誦說歌詠而不衰。出於學士大夫之談者。教之餘也。出於故家遺老之傳者。俗之餘也。出於田夫野父之口者。治之餘也。習其教。漸其俗。思其治。嚮望懷想而不能自己。亦其勢之當然。乃若所謂婦人女子者。其視先生之道。果何物耶。蓋嘗觀詩之變風。往往多出於婦人女子之手。綠衣、莊姜之詩也。泉水、衛女之詩也。柏舟、共姜之詩也。載馳、許穆夫人之詩也。其辭忠厚雅馴。憂而不傷。勁而不怒。藹然文武周公之遺澤在焉。是孰開之而孰誘之耶。吾是以知文武周公之化。固

映前學士大夫三段

又設疑情以呼本意是文家波瀾身分唱歎生情

女子不忘周推本文武之遺化

又從成風語中單拈周禍二字發出深意

有默行乎禮教風俗政治之外者矣。不然則婦人女子豈告語之所可及防範之所可率哉。成周之澤至於使婦人女子不能忘則文武周公之用功深矣。是豈一朝一夕之故哉。成風請救須句特以親暱而發此人情之常不足深道。然其言曰：崇明祀保小寡。周禮也。蠻夷猾夏周禍也。成風以一女子而造次發言不捨周室非文武周公之遺化潛中其心陰致其意詎能至是乎。遠矣。周澤之長也。吾嘗紬繹成風周禮之說如仲孫湫韓宣子知之者代不乏人。至周禍之說則春秋二百四十二年之間諸侯皆不能知知之者成風一人而已。平王之東降於列國異政殊俗各私其私。曰天禍晉國者晉人自言也。未聞在晉而言周禍也。曰天禍鄭國者鄭

意思暢快
而後止

又將魯字
別周字緊
紘促節滾
入肝脾

側結魯救
詞理周匝

人自言也。未聞在鄭而言周禍也。成風請救須句，必以邾既滅，須句勢將逼魯，實魯之禍。庶幾動僖公之聽，今乃置魯而言周何耶？成風之意，則有在矣。通天下皆周也，魯非魯之魯，乃周之魯也。須句非須句之須句，乃周之須句也。邾爲不道，廿四剪滅周之須句，則爲周之魯者，安得不被髮纓冠而亟救之耶？嗚呼！文武周公既沒數百年，以一女子之所見，猶非當時諸侯之所能及。吾是以知周之所以盛，君子蓋爲之歎息焉。

【評】

朱字綠曰：由周禍一語，勘到周澤之未衰，以學士大夫故家遺老，田夫野父映出一女

子，文勢方落，忽用詩意颺開，引出四箇女子，以見周澤不止遺於一人，益徵其遠，入題後擒定

二周字發論一層，又單擒周禍二字深論一層，列國不能及一層，原成風尊周之意透發一層，

文情自覺斐亾。○張明德曰：成風以一女子能推本文武遺化，東萊以爲春秋二百四十二年

皆不能言及此。知之者成風一人。因而追思周澤之未衰。文武成康之舊。猶如昨也。擒定周字發一層。又單擒周禍二字發一層。胸有成竹。故目無全牛。

【音釋一】

○【成風】魯莊公妾。僖公母。○【任宿須句顓臾】四國名。皆在今山東。任音壬。句其俱切。○【大皞】伏羲。○【濟】水名。在山東。○【猺】亂也。

【音釋二】

④【故家】舊家也。⑤【遺老】漢書劉向傳。身爲宗室遺老。歷仕三朝。謂先帝之舊臣。⑥【漸】音尖。沾濡意。⑦【綠衣】詩序。莊姜傷己。⑧【泉水】

詩序。衛女思歸。⑨【柏舟】詩序。共姜自誓。⑩【載馳】詩序。許穆夫人作。⑪【雅馴】史記五帝紀。其文不雅馴。薦紳先生難言之。⑫【藹然】和也。

⑬【親暱】左傳莊公元年。諸夏親暱。不可棄也。暱。近也。⑭【造次】急遽之時。⑮

【紬繹】引其端緒也。見漢書注。⑯【仲孫湫】左傳僖公元年。齊仲孫湫來省

難。仲孫歸。公曰。魯可取乎。對曰。不可。猶秉周禮。⑰【韓宣子】左傳昭公二年。晉韓宣

子來聘。觀書於太史氏。見易象與魯春秋。曰。周禮盡在魯矣。⑱【平王之東】詩黍離箋

平王東遷。政遂微弱。不列於諸侯。不能復雅。而同於豳風焉。⑲【異政殊俗】詩關雎

序)國異政家異俗而變風變雅作 ⑤【天禍晉國】(左傳文公十三年)天禍晉國文

公如齊惠公如秦 ⑥【天禍鄭國】(左傳襄公九年)天禍鄭國使介居二大國之間

⑦【剪滅】(左傳成公二年)齊侯曰余姑剪滅此而朝食 ⑧【被髮纓冠】(孟子離

婁篇)雖被髮纓冠而救之可也(注)言急也

秦晉遷陸渾

僖公二十二年初平王之東遷也辛有適伊川見被髮而祭於野者曰不及百年此其戎乎其禮先亡矣秋秦晉遷陸渾之戎於伊川

陡峭

引證兩事
是謂物物
相召

物之相召者捷於風雨地夷而人華者公劉之治豳也以華召華
不旋踵而有文武之興王地華而人夷者晉帝之納款也以夷召
夷不旋踵而有耶律之俘虜是知居夷而華者必變夷為華居華
而夷者必變華為夷物物相召者未嘗不以其類也中天下而畫

翻筆

從心字生
出氣字反
覆推勘議
論深透

壤者。是爲伊洛。萬國莫先焉。天地之所合也。四時之所交也。風雨之所會也。陰陽之所和也。自伊洛而俯視夷狄。猶鈞天帝居與匱溷然相去。不知其幾千百等。政使風俗隳壞。何至遽淪於夷狄乎。辛有一見被髮之祭。預期爲戎於百年之前。而秦晉之遷陸渾。果不出其所料者。抑有由矣。曠百世而相合者。心也。跨百里而相通者。氣也。伊洛之民。雖居中華。聲明文物之地。然被髮野祭。意之所向。已在於大荒絕漠之外矣。故以心感心。以氣動氣。安得不爲陸渾之遷哉。既爲沮澤。潦水自歸。既爲羶肉。螻蟻自集。既爲夷俗。戎狄自至。辛有所以能預期於百年之前。非有他術也。閒田隙地。散在九州者。尙多也。秦晉必徙於此。而不之他焉。陸渾亦必居於此。

而不之他焉。是豈嘗擇而處之哉。風聲氣習自相感召。以默而驅之。潛而趨之。蓋有不能自己者矣。是故秦晉非能徙。不得不徙。陸渾非能居。不得不居。罪在此而不在彼也。使在我無召戎之具。彼胡爲乎來哉。嗚呼。辛有可謂知幾矣。然其言曰。不及百年。此其戎乎。吾以爲猶未盡也。善惡無定位。華夷無定名。一渝禮義。旋踵戎狄。彼被髮野祭之際。固已爲戎矣。豈待百年而始爲戎乎。陸渾未遷之前。戎狄其心者也。陸渾旣遷之後。戎狄其形者也。人徒以秦晉之遷。陸渾爲亂華之始。不知伊洛之爲戎久矣。豈待^{十九}氐毳其服。穹廬其居。^{廿一}侏離其語。然後謂之戎哉。十九年掘鼠牧羊於北海之濱。而未嘗少改蘇武之漢也。^{廿三}承乾身未離唐宮而已。純乎突厥矣。

此結束愈
奇警愈謹
嚴

天下之可畏者莫大於吾心之夷狄而要荒之夷狄次之

【評】

首段泛論物類相召之理引兩事以實之一反一正爲本題作引接入伊洛先論形勢

說不應有遷戎之事作翻點題後推原其故揭心字作骨從心字生出氣字暢發所以然之故
反覆推勘議論深透文於山窮水盡處再就辛有語推進一層令閱者如逢武陵桃源頓闢異
境造句奇警其刺心也可駭其愜心也可喜再借兩事旁證收句結束全篇滴水不漏結構謹
嚴有法○朱張本俱闕此篇從瞿世瑛本補入

【音釋一】

①【陸渾】允姓之戎居陸渾在秦晉西北 ②【伊川】周地伊水也

【音釋二】

③【公劉治豳三句】公劉后稷之曾孫豳周之故都豳亦作邠本谷名邠州

三水東南有故邠城太王去豳遷岐太王公劉九世孫文王之祖 ④【不旋踵】謂速也

漢書晁錯傳）死不旋踵 ⑤【晉帝納款三句】晉帝石敬瑭也（五代史晉本紀）唐廢

帝下詔削奪石敬瑭官爵命張敬達討之敬瑭求援於契丹敬達大敗敬瑭見耶律德光約爲
父子即皇帝位高祖崩出帝重貴立開運四年契丹滅晉封出帝爲負義侯遷之黃龍府納款

請降耶律契丹姓俘虜。謂爲敵軍所得也。⑥【畫壤】猶言畫地。《陶宏景文》：縈巒巴曲，畫壤賄浮。⑦【伊洛】二水名。在河南。《書禹貢》：伊洛瀍澗，既入於河。⑧【天地之所合四句】見《周禮大司徒》。⑨【鈞天帝居】《列子周穆王篇》：鈞天廣樂，帝之所居。⑩【匱溷】猶言溝廁。排泄穢汙之處。《文同詩》：匱溷及井竈，坵壁皆相連。匱音假溷，戶困切。⑪【被髮】《禮王制》：西方曰戎，被髮衣皮。⑫【大荒】《山海經》：大荒之中有山，名曰大荒之山，是謂大荒之野。⑬【絕漠】謂荒遠沙漠之地。《漢書西域傳》：命遣虎臣浮河絕漠。⑭【沮澤】下溼地也。《禮王制》：山川沮澤。⑮【潦水】積水曰潦。音老。⑯【羶肉二句】《莊子》：羊肉不羶，蟻羶羊肉。羊肉羶也。⑰【閒田】《禮王制》：名山大澤不以封，其餘以爲附庸閒田。⑱【知幾】《易繫辭傳》：知幾其神乎。⑲【甑蟲】謂戎服。蹂毛成片曰甑。獸細毛曰蟲。音脆。⑳【穹廬】甑帳也。其上穹隆，故名。《史記》：匈奴父子同穹廬而臥。㉑【侏離】蠻夷之語，聲不分明也。《後漢書南蠻傳》：衣裳斑斕，語言侏離。㉒【十九年二句】《漢書蘇武傳》：匈奴徙武北海無人處，使牧羝，武仗漢節牧羊，臥起操持，節旄盡落，留匈奴凡十九年，始而強壯出，及還鬚盡白。㉓【承乾二

句】（通鑑）唐太宗時太子承乾謀反廢爲庶人（注）太子居宮中與羣小相狎效突厥語及服飾飲食突厥古匈奴奴北部更號可汗猶單于也

子圉逃歸

傳公二十二年晉太子圉爲質於秦將逃歸謂嬴氏曰與子歸乎對曰子晉太子而辱於秦子之欲歸不亦宜乎寡君之使婢子侍執巾櫛以固子也從子而歸棄君命也不敢從亦不敢言遂逃歸

善於論情
情理勞所
出也
伏後情疏
義薄

謀於塗者不若謀於鄰。謀於鄰者不若謀於家。非遠愚而近智也。愛淺者其慮略。愛深者其慮詳。理也亦勢也。四海九州之人卒然相遇。問焉而不對。叩焉而不應者。則有之矣。家人婦子則不然。同分義。均休戚。內無所隱。故其情真。外無所飾。故其語真。以真遇真。懇款惻怛。往往得利害之真焉。彼家人婦子之智。非果踰於他人。

伏情疏義
薄得是

意欲苟免
卻失自全
之義喚醒
真切

也。智者之略，固不如愚者之詳也。故家人婦子之謀，智慮有所不及，聰明有所不逮，則付之無可奈何而已。豈肯僥倖苟免而懷不盡如塗人之為耶？異哉！嬴氏之於子圍，何其親則同室而情則塗人也。當子圍逃秦而歸，曾不為之反覆訂議，遽告之宜歸，以順其意，又不與之俱，以脫其身。又自詭不泄，以解其疑，意之所主，特欲自為僥倖，苟免之計，苟免固賤行也。然世人之苟免者，猶曰姑以^十免吾身焉。父子一體也，夫婦一體也，害於彼則傷於此矣。義不足以全子圍，又何足以全其身哉！此嬴氏所以始欲苟免而終不免於二嬖之辱也。昔之烈女不幸而處不可兩全之地，固有殺身以^{十四}致吾義者矣。况子圍之事未至於不可兩全耶？使嬴氏當子圍之

代爲對語
妙極

非獨用意
妙亦是詞
令妙品

設身處地
理勢明確
真是萬全
之策

六可以

應愛淺慮
略

謀歸易辭以對曰子淹恤於秦者非他所以合秦晉之交也今不
忍數年之不燕而蔑棄敝邑若二國何寡君有社稷之事不得以
身服役使賤妾得侍巾櫛子介然有他志是寡君不得事子也妾
將復於寡君嬴氏苟能爲此言則子圉憚嬴氏之告必不敢興逃
遁之謀嬴氏席秦伯之勢必不至爲子圉之害秦伯顧嬴氏之愛
必不入重耳之策父子夫婦之間顧不兩全乎嗚呼嬴氏固知出
此則可以成父之志可以解夫之禍可以盡婦之道可以全己之
節可以續惠公廢絕之祀可以解秦伯戎狄之譏一舉而數利得
使嬴氏少致思焉則何憚而不出於此也思之苟生於情之疎情
之疎生於義之薄土薄則無豐殖雲薄則無甘霖鐘薄則無震聲

推勘根由
在一薄字
薄不在臨
時而在平
日有識有
斷

味薄則無珍膳。未有薄其誠於先而厚其謀於後者也。然則嬴氏之不能謀，豈在於子圍逃秦之時哉。

【評】

朱字綠曰：辰嬴以一身事從子從父之間，而皆以為嬖，不足語於大義也。審矣。齊姜醉遣重耳，嬴氏勉圍歸以就大計，似亦不為甚失。至入重耳之策，禍及子圍，或非當時所能料也。文思特纏綿穠郁，婉轉入情。○張明德曰：嬴氏不言而聽子圍之歸，夫婦之道未為不是。况其對子圍時詞嚴義正，委婉盡情，此等識見，亦巾櫛鬚眉似不必過於追求，但處人倫之際，必有至當不易之情理。先生設身處地，代為置對，責嬴氏以自為僥倖苟免之計，豈刻論哉。

【音釋一】

①【巾櫛】巾以拭手，櫛以理髮，盥沐之具也。

【音釋二】

②【分義】分，去聲，謂上下有分義，謂各得其宜。③【懇款】誠實也。④

⑤【惻怛】憐憫也。⑥【苟免】（禮曲禮）臨難毋苟免。⑦【塗人】（蘇洵族譜引）

喜不慶，憂不弔，則塗人也。⑧【同室】（北史封卓妻劉氏傳）生則同室，終契黃泉。⑨

⑩【自詭】（漢書）臣出守郡，自詭效功，詭音癸，責也。言自以為責任也。⑪【不泄】不敢

漏洩而言也。泄，通洩。①【父子二句】（儀禮）父子一體也。夫妻一體也。②【二嬖】

重耳歸晉，秦伯納女五人，懷嬴與焉。懷嬴即子圉妻嬴氏，子圉逃歸，立爲懷公，故妻曰懷嬴。二

嬖，謂嬖於懷公，又嬖於文公。（左傳文公六年）且爲二嬖淫也。③【不可兩全】（呂氏

春秋）先王知物之不可以兩全，故擇務當而處之。④【殺身】（論語衛靈公篇）志士

仁人無求生以害人，有殺身以成仁。⑤【致義】謂斷制得宜（禮）天下之禮致義也。致

讓也。⑥【易辭】別爲一言。⑦【淹恤】（左傳襄公二十六年）君淹恤在外十二年

矣。（注）淹，久也。恤，憂也。⑧【數年之不宴】（左傳成公二年）臧宣叔曰：衛父不忍數

年之不宴，以棄魯國，宴安樂也。⑨【介然】堅確之義。⑩【復】轉告也。⑪【重耳之

策】謂秦納重耳，殺懷公。⑫【惠公廢絕之祀】惠公圍之父，圉歸晉，立爲懷公，即爲重耳

所殺，故廢絕其祀。⑬【秦伯戎狄之譏】（左傳僖公十五年）晉陰飴孫謂秦伯曰：必報

讎，寧事戎狄。⑭【豐殖】（後漢書王符傳）穀之所以豐殖者，以有民功也。⑮【珍膳

】珍貴之食物。

魯卑邾不設備

僖公二十二年邾人以須句故出師。公卑邾不設備而禦之。臧文仲曰：國無小不可易也。無備雖衆不可恃也。詩曰：戰戰兢兢如臨深淵如履薄冰。又曰：敬之敬之天維顯思命不易哉。先王之明德猶無不難也。無不懼也。况我小國乎。君其無謂邾小。蠶蠶有毒而况國乎。弗聽。八月丁未公及邾師戰於升陘。我師敗績。邾人獲公冑。懸諸魚門。

警拔

大勝小。強勝弱。多勝寡。兵家之定論也。魯與邾未交兵之前。人皆意魯之必勝矣。而僖公卑邾不設備。卒以取敗。是魯無魯而邾有邾也。以有對無。勝安得不在邾。敗安得不在魯乎。吾嘗論僖公之爲君。納莒挈之俘。受葛盧之朝。警然軒然。自處於衆人之上。是亦一僖公也。奔走於葵邱之會。周章於踐土之盟。惴然眇然。自處於衆人之下。是亦一僖公也。彼一僖公耳。昨勇今怯。朝盛夕衰。何其

形容僖公如畫

一篇主意

曰不期曰
既見曰必
見皆說無
特操

總一無特
操造語奇
雋

多變而無特操^{十五}耶。殆非專僖公之罪。其居使之然也。僖公所居者
魯以魯而臨介莒。則自大視^{十七}細心不期。驕而驕以魯而望齊。晉則
自細視。大心不期。畏而畏。既見大國之可尊。必見小國之可忽。斯
其所以禍生所忽而召魚門之辱歟。文仲之諫忠矣。惜其能^{十九}僖
公之病。而未知僖公受病之原也。僖公受病之原。安在哉。使僖公
易地而居齊晉。則將變^{二十}畏為驕。易地而居介莒。則將變驕為畏。吾
是以知尊大國者。非僖公也。魯也。忽小國者。非僖公也。亦魯也。僖
公不以己為己。而以魯為己。故大於魯者。吾亦大之。小於魯者。吾
亦小之。豈非為居之所移乎。昔者舜自側微而登^{廿一}至尊。木石不能
使之愚。鹿豕不能使之野。耕稼不能使之勞。陶漁不能使之辱。疹^{廿五}

衣鼓琴不能使之逸牛羊倉廩不能使之奢蓋居爲舜所移而舜未嘗爲居所移也噫當僖公之時有能誦舜之事以起僖公之病庶其有瘳乎^{廿七}

【評】 鍾伯敬曰造語新而古○孫執升曰胸無特操大則畏小則驕當其驕中猶懷怯情每至於受辱故入題卽寫其昨勇今怯之狀○朱字綠曰魯僖意中無邾卻是無魯立說可謂雋妙又因其無邾并推到無莒介且推到有齊晉無莒介爲有魯有齊晉亦爲有魯只有一魯竟無僖公觸處通靈無一不歸雋妙作文所以貴有筆也○張明德曰事無小大有備則無患况君國乎僖不自揣又不納文仲之言魚門之辱所自招也文擒定主腦引舜之履危處安若固

有之之意以反照僖公筆之所至妙意環生總之東萊文字處處有路

【音釋一】 ①【蠶蠶】蠶同蜂蠶勅邁切通俗文云蠶長尾謂之蠶 ②【升陘】邾地

③【魚門】邾城門

【音釋二】 ④【兵家】古九流之一謂講用兵之道者也 ⑤【莒擘】（左傳僖公二

年）莒人來求賂。公子友敗諸鄆。獲莒子之弟挈。挈，女魚切。⑥【葛盧】（左傳僖公二十

五年）介葛盧來朝。（注）介，東夷國。葛盧，介君名。⑦【警然】大貌。警，通傲。⑧【軒然】

高貌。⑨【葵邱之會】（左傳僖公九年）夏，會於葵邱。秋，齊侯盟諸侯於葵邱。⑩【周

章】倉皇之貌。（三國志）賊周章方結陣，不得歸船。⑪【踐土之盟】（左傳僖公二十

八年）公會晉侯、齊侯、宋公、蔡侯、鄭伯、衛侯、莒子於踐土。⑫【惴然】憂懼貌。⑬【眇

然】細也。末也。⑭【今怯】（左傳）曩者志入而已，今則怯也。⑮【特操】獨得之操守

也。⑯【其居使之然也句】見（孟子）。⑰【自大視細自細視大】（莊子秋水篇）

自細視大者不盡，自大視細者不明。⑱【禍生於忽】（說苑）福生於微，禍生於忽。⑲

【箴】規也。⑳【易地】（孟子離婁篇）禹稷顏子，易地則皆然。㉑【側微】卑賤也。

（孟子公孫丑篇）舜之側微，耕於歷山，陶於河濱，漁於雷澤。㉒【至尊】天子位也。（賈

誼文）履至尊而制六合。㉓【木石鹿豕】（孟子盡心篇）舜之居深山之中，與木石居，

與鹿豕遊。㉔【耕稼陶漁】（孟子公孫丑篇）自耕稼陶漁以至爲帝，無非取於人者。

㉕【衿衣鼓琴】（孟子盡心篇）被衿衣鼓琴。（注）衿，畫衣也。㉖【牛羊食廩】（孟

子萬章篇）牛羊父母倉廩父母。㊦【瘳】音抽病瘳也（書說命）厥疾勿瘳。

成得臣卻獻子

僖公二十三年秋。楚成得臣帥師伐陳。遂取焦夷城。頓而還。子文以爲之功。使爲令尹。叔伯曰。子若國何。對曰。吾以靖國也。夫有大功而無貴仕。其人能靖者與。有幾。宣公十七年。晉侯使卻克徵會於齊。齊頃公帷婦人使觀之。卻子登婦人笑於房。獻子怒出而誓曰。所不此報。無能涉河。獻子至。請伐齊。范武子將老。召文子曰。吾聞之。怒喜以類者。鮮易者。實多。余將老。使卻子逞其志。庶有豸乎。乃請老。卻獻子爲政。

滿慾極忿
成一篇議
論主責備
子文武子
以權勢濟
得臣郤子
之惡首段
卽微引其
端

多而不可滿者慾也。銳而不可極者忿也。治慾之法。有窒而無開。治忿之法。有懲而無肆。或者曰。飢止於食。渴止於飲。欲者得求則止。忿者得報則止。嗚呼。爲是說者。是畏火之怒。而投薪以滅之。祇益其熾也。夫薪者火之資也。權位者忿慾之資也。假其資而望其

以防字換
止字防在
先止在後

不能防則
不能止爭
則益後矣
故先王不
爲

然則句是
應

摺轉入題
最有情
總是責子
一文子意
一線到底

止天下甯有是哉。先王尊權位以示天下，所以嚴萬世之巨防也。何人而無忿，何人而無忿，忿怒之興，局於無權無位而不得展足，將行而駐，手將舉而斂，有谿壑貪恡之欲，鬱勃炮燔之忿，莫不限於權位之巨防而止。回則自趨於善矣。天下方馳驚於忿慾而不知反也。先王固未嘗與之爭也。嚴吾權位之巨防，使忿慾者窮於無資，志衰力怠，道窮途絕，^{十七}俛俛然而無所歸。雖吾不使之趨於善，而彼自不得不趨於善。然則權位者先王閉忿慾之巨防也。歟。惜乎先王以是爲忿慾之防，後世乃以是爲忿慾之資，何其反也。楚成得臣有功於陳，子文推令尹之位以塞其慾，晉郤克既辱於齊，范武子授郤克以政，使逞其忿，噫，令尹豈貴功之物，而晉數百年

並立大功
二句駁得
倒

東馳西逐
三句更駁
得倒

應前假奢
望止

不能救未
足責成惡
加一等
側重子文
作結發出

之社稷亦豈二三臣逞憾之具歟。楚非置兩令尹也。幸而一成得
 臣有功耳。如使數人者並立大功。吾不知子文復何以與之。春秋
 時。晉之行人見辱者多矣。若解揚之見執於宋圍。韓起羊舌肸之
 見挫於楚靈。如與卻克之辱。並發於一時。則晉師亦將東馳西逐。
 盡報諸臣之怨而後已歟。甚矣子文武子之不思也。將以飽其慾。
 適以滋其慾。將以散其忿。適以張其忿。使得臣之慾與位俱長。嗜
 勝不止。迄至城濮之敗。使卻克之忿與位俱長。狃鞏之勝。忿不思
 難。至欲質齊侯之母。得臣之慾得子文之位。而盛卻克之忿。得武
 子之位。而伸君子不能救人之忿。慾則已矣。安得假其資而成其
 惡乎。雖然。武子猶未足責也。彼子文靖國之語。一何悖耶。凡人爵

不足以酬功。慊之者固多矣。若遽作不靖危其國家。自非盜賊小人。未必皆有是心也。子文之言。何概以盜賊小人待天下耶。斯言一出。人臣之立大功者。人君或懼其不靖。反加屠戮。是功者身之賊也。以是位而答是功。不問能否。使播其惡於民。是功者位之賊也。既立大功。自謂居危疑不賞之地。而姦謀始出。是功者國之賊也。一有大功。則爲身之不幸。位之不幸。國之不幸。孰敢以功業自奮耶。詩曰。誰生厲階。至今爲梗。

【評】

朱字綠曰。通篇責子文武子。授忿慾者以資而成其惡。處處激射。無一筆放寬。示之以

先王之道。窮之以不能並授數人之勢。至於殺其身。辱人母。議論痛快之至。○有功不賞。亂之道也。能因其慾使伸之於敵。亦用人之術也。賞功可耳。不宜授以令尹。忿加敵可耳。不宜逞於與國之齊。然子文武子。推己位以予人。自不可及。明中葉以來。首輔相傾。前不肯讓。後不肯止。

視之有愧色否。○張明德曰：二子推己位以予人，自不可及，但令尹非賞功之物，晉之社稷豈臣子逞忿之具。說得淋漓確切，結處又爲二子開一條生路，橫說豎說，總是至理。

【音釋一】

①【成得臣】楚令尹子玉。②【焦夷】皆陳邑，在今江南。③【頓】國

名，在今河南。④【郤子登二句】郤子跛，故笑之。婦人頃公母，蕭同叔子。⑤【豸】直是

切解也。

【音釋二】

⑥【慾】貪欲。⑦【忿】恨也，怒也。⑧【窒慾】（易損卦）君子以懲

忿窒慾，窒，栗切，塞也。⑨【投薪】（鄧析子）不治其本而務其末，譬如拯溺，確之以石，救

火投之以薪。⑩【巨防】（戰國策燕策）齊有長城巨防，足以爲塞防隄也。⑪【局】

拘也。⑫【谿壑】（國語晉語）谿壑可盈，是不可饜也，言貪欲之甚。⑬【貪慄】（左

傳）貪慄無饜，慄音嵐，亦貪也。⑭【鬱勃】盛貌（武帝內傳）雲彩鬱勃，盡爲香氣。⑮

【炮燔】燒也，炙也（詩瓠葉篇）炮之燔之。⑯【馳騖】猶言奔走（史記）今秦之欲

吞天下，稱帝而治，此布衣馳騖之時，而游說者之秋也。⑰【偃偃】敕央切，狂行不知所如

也（禮仲尼燕居）偃偃乎其何之。⑱【郤克辱於齊】卽題注婦人笑於房。⑲【解揚

見執於宋】（左傳宣公十五年）楚子圍宋。晉侯使解揚如宋，使無降楚。曰：晉師悉起，將至矣。鄭人囚而獻諸楚。⑤【韓起羊舌肸見挫於楚】（左傳昭公五年）晉韓子如楚，送女。

叔向爲介，楚子朝其大夫曰：若吾以韓起爲闔，以羊舌肸爲司宮，足以辱晉，吾亦得志矣。⑥

【城濮之敗】（春秋經僖公二十八年）晉侯及楚人戰於城濮，楚師敗績，楚殺其大夫得臣。

⑦【鞏】（春秋經成公二年）晉師及齊師戰於鞏，齊師敗績，鞏齊地。⑧【忿不思難】

【論語季氏篇】忿思難。⑨【質齊侯之母】（左傳成公二年）晉人曰：必以蕭同叔

子爲質，對曰：蕭同叔子非他寡君之母也。⑩【人爵】（孟子告子篇）公卿大夫，此人爵

也。⑪【作不靖】（書盤庚）則惟爾衆自作不靖。⑫【播其惡】（孟子離婁篇）是

播其惡於衆也。⑬【位之賊也】（蘇洵春秋論）則是道者，位之賊也。⑭【姦謀】（

漢書）丞相朱博坐爲姦謀自殺。⑮【誰生厲階二句】見（詩）厲，惡也。階，道也。梗，病也。

晉懷公殺狐突

僖公二十三年九月，晉惠公卒，懷公命無從亡人，期而不至，無赦。狐突之子毛及偃從重

耳在秦弗召。冬懷公執狐突曰：子來則免。對曰：子之能仕，父教之忠，古之制也。策名委質，武乃辟也。今臣之子名在重耳，有年數矣。若又召之，教之貳也。父教子貳，何以事君？刑之不濫，君之明也。臣之願也。淫刑以逞，誰則無罪？臣聞命矣。乃殺之。卜偃稱疾不出，曰：周書有之，乃大明服。己則不明而殺人以逞，不亦難乎？民不見德而唯戮是聞，其何後之有。

觀己是一篇
承出觀己
語意新巧

點明一篇
主意

照應緊湊

此段將從
重耳從懷
公兩地相
對各列三
段

明於觀人。暗於觀己。此天下之公患也。見秋毫之末者，不能自見其睫。舉千鈞之重者，不能自舉其身。甚矣己之難觀也。人皆知以己觀己之難，而不知以人觀己之易。因人之善，見己之惡；因人之惡，見己之善。觀孰切於此者乎？晉懷公不知己之無以致人，徒責人之不從己，殆未嘗以人而觀己也。懷公晉國之君，彼重耳特一亡公子耳。狐趙之徒，出從重耳，陷狄，困衛，逃齊，脫楚，人有不堪其憂者矣。乞食投塊，觀浴操戈，人有不堪其辱者矣。風羈雨縶，過都

理勢明暢
詞條敷蔚

總此情事
顯然可見
說來更覺
新穎動人
因此自反
又切一步

歷邑。人有不堪其勞者矣。使其舍重耳而從懷公。則閭里^{十三}歡迎。姻
族畢至。擊鮮^{十四}釃酒^{十五}。舒發性情。此天下之至樂也。高軒^{十六}華轂^{十七}。豹飾^{十八}羔
裘。前趨後陪。光生徒馭^{十九}。此天下之至榮也。堂宇^{二十}靚深^{廿一}。自公退食^{廿二}。體
胖心廣。四顧無虞。此天下之至安也。懷公盍亦以人觀己乎。從彼
者。憂如是。辱如是。勞如是。而狐趙輩。乃就之而不辭。從我者。樂如
是。榮如是。安如是。而狐趙輩。棄之而不顧。則德之優劣。厚薄。不待
言。而可見矣。懷公盍亦因此自反^{廿三}曰。樂也。榮也。安也。人之所同嗜
也。狐趙之徒。所以崎嶇^{廿四}從重耳者。豈與人異情哉。其棄樂而忘憂
者。必重耳之德。有以勝其辱也。其棄安而就勞者。必重耳之德。有
以勝其危也。况吾以晉國之大。而增修其德。則人之從我者。既有

非論之至
再開

雖是餘意
又復剗切

絕我事雖
直至君位
得失關係
甚大

收從阿房
宮賦化來

道德之樂。又有名位之樂。既有道德之安。又有名位之安。重耳無
 我之所有。而我有重耳之所無。有無之相形。人將不待詔而至矣。
 此猶為懷公而言。非論之至也。德之休明。桂海冰天。荒區絕域。將
 奉琛重譯。而皆來臣。何至下與一亡公子爭數僕役哉。陋矣懷公
 之褊也。懷公肆其褊心。不知反己。徒殺人以逞。使在外者絕向我
 之意。而堅事讎之志。計無失於此者矣。雖重耳苟安於外。彼毛偃
 挾不戴天之讎。思欲一逞。豈容重耳之安於外乎。是則納重耳於
 晉者。非秦伯也。非狐趙也。懷公也。

【評】

孫月峯曰。掉轉處。文法靈甚。捷甚。○袁中郎曰。結語悠然有餘韻。○朱字綠曰。不反己

而尤人。千古同嘆。若能如此文。一一對照。則在人無不達之情。在己無可逞之事。又何亡國敗

家之有。惟不能反己。故見大臣之求退。則以爲要君。見小臣之抗疏。則以爲沽直。見善類之相引。則以爲植黨。見小人之被攻。則以爲挾讎。岌岌乎欲免於懷公之續。其可得耶。○張明德曰。德之休明。桂海冰天。荒陬絕壤。猶重譯來王。何至與人爭其歸附。懷公之不自責。而徒以責人也。亦殊不可解。東萊語語刺心骨。情事顯然。說來更覺警策動人。尤妙在以重耳作一對照。更使懷無公辭以對。結處云。納重耳於晉者。非秦伯也。非狐偃也。實懷公也。真是董狐妙筆。豈秦漢以下人所可望其項背。

【音釋】

①【公患】（荀子榮辱篇）陋也者。天下之公患也。謂公共之患。②【秋毫之

末】（孟子梁惠王篇）明足以察秋毫之末。（注）毛至秋而未銳。小而難見也。③【不

能自見其睫】（史記越世家）目能見百步之外。不能自見其睫。睫音接。目旁毛也。④【

舉千鈞之重】（淮南子主術訓）千鈞之重。烏獲不能舉也。鈞三十觔。⑤【不能自舉其

身】（荀子子道篇）雖有國士之力。不能自舉其身。⑥【狐趙之徒二句】（左傳僖公

二十三年）晉公子重耳奔狄。從者狐偃。趙衰。顛頡。魏武子。司空季子。⑦【陷狄】（左傳

僖公四年）重耳奔蒲。五年公使寺人披伐蒲。遂奔狄。⑧【困衛】（左傳僖公二十三年

處狄十二年而行。過衛。文公不禮也。出於五鹿。乞食於野人。野人與之塊。⑨【逃齊】（又）及齊。齊桓公妻之。有馬二十乘。公子安之。從者以爲不可。姜與子犯謀。醉而遣之。醒以戈逐子犯。⑩【脫楚】（又）及楚。子玉請殺之。楚子曰：天將與之。誰能廢之。乃送諸秦。⑪

【觀浴】（又）及曹。曹共公聞其駢脅。欲觀其裸。浴薄而觀之。⑫【風羈雨綈】（權徹

于役詩序）牧圉從征。負風羈與雨綈。羈綈解見上。⑬【歡迎】（陶潛歸去來辭）童僕

歡迎。⑭【擊鮮】（漢書陸賈傳）數擊鮮。毋久溷女爲也。（注）鮮。謂新殺之肉。⑮【

醢酒】（詩伐木篇）醢酒有顛。醢。音屣。以筐漉酒也。⑯【高軒】唐李賀有高軒過詩。軒

大夫車也。⑰【華轂】（史記陳餘傳）合范陽兮乘朱輪華轂。馳驅燕趙郊。⑱【豹飾

羔裘】大夫服也。（詩）羔裘豹飾。孔武有力。⑲【徒馭】（金史樂志）徒馭孔多。靈輿

載轡。⑳【靚深】（揚雄甘泉賦）稍暗暗而靚深。靚。音淨。㉑【自公退食】句見（詩

）㉒【體胖心廣】（禮大學）心廣體胖。胖。音盤。安舒也。㉓【自反】（孟子公孫丑

篇）自反而不縮。雖褐寬博。吾不憚焉。㉔【崎嶇】音奇區。山路不平也。㉕【德之休明

】句見（左傳）㉖【桂海冰天】（江淹詩）文軫薄桂海。聲教燭冰天。南方多桂。故曰

一氣呵成
絕無脈絡
可尋
形容自得
之妙言之
甚妙

桂海北方多冰故曰冰天。②【荒區】邊裔之地（唐高宗幸曲阜詔）駐蹕荒區願爲師友。③【絕域】（管子）不遠道里故能威絕域之民。④【奉琛】（北齊書）罄折奉琛。⑤【重譯】（史記）康居西域重譯請朝謂偏方絕域言語不通必輾轉相譯得其意也。⑥【褊心】（詩葛屨篇）惟是褊心是以爲刺褊音扁急也。⑦【不戴天之讎】（禮曲禮）父之讎弗與共戴天此卽謂懷公殺狐突。

賦詩

凡數十條皆左傳所載賦詩之事今以文多不復載

至理所在可以心遇而不可以力求。斷編殘簡。呻吟諷誦。越宿已
有遺落。至於途歌里詠。偶入吾耳。則雖終身而不忘。天下之理。固
眩於求而真於遇也。理有觸於吾心。無意而相遭。無約而相會。油
然自生。雖吾不能以語人。况可以力求乎。一涉於求。雖有見。非其

心遇

力求五經之過

入到詩

於是句有病而文奇

正矣。日用飲食之間。無非至理。惟吾迫而求之。則隨得隨失。研精極思。日入於鑿。曾不知是理交發於吾前。而吾自不遇。是非不用力之罪。乃用力之罪也。天下之學者。皆知不用力之害。而不知用力之害。苟知力之不足恃。盡黜其力。而至於無所用力之地。則幾矣。二帝三王之書。義文孔子之易。禮之義章。樂之節奏。春秋之褒貶。皆所以形天下之理也。天下之人。不以理視經。而以經視經。刻剔離析。彫績疎鑿。之變多。而天下無全經矣。聖人有憂焉。汎觀天壤之間。鳥鳴於春。蟲鳴於秋。而匹夫匹婦。懽悲勞佚。喜怒舒慘。動於天機。不能已。而自泄其鳴於詩。謠歌詠之間。於是釋然喜曰。天理之未鑿者。賴有此存。是固匹夫匹婦胸中之全經也。遽取而列

以救天下
句有病而
文奇

而救五經
句有病而
文奇

諸書易禮樂春秋之間并數而謂之六經十七羈臣賤妾之辭與堯舜

禹湯文武之格言大訓十八並列而無所輕重聖人之意將舉匹夫匹

婦胸中之全經以救天下破裂不全之經使學者知所謂詩者本

發乎閭巷草野之間非可格以義例而局以訓詁也一吟一諷聲

轉機回虛徐容與至理自遇片言有味而五經皆冰釋矣是聖人

欲以詩之平易而救五經之支離也孰知後世反以五經之支離

而變詩之平易乎蓋嘗觀春秋之賦詩詩因於事不遷事以就詩

事寓於詩不遷詩以就事意傳於肯綮毫釐之中跡略於牝牡驪

黃之外斷章取義可以神遇而不可以言求區區陋儒之義例訓

詁至是皆敗春秋之時善用詩者蓋如此三十火於秦雜於漢別之以

齊魯汨之以讖緯亂之以五際狹之以專門銖銖而析之寸寸而較之豈復有詩噫安得春秋賦詩之說語之

【評】

朱字綠曰理可以心遇而不可以力求詩可以神遇而不可以言求形容自得之妙痛

摘破碎之失此中甘苦非親身閱歷人不能道機致飛舞不可控御○理固可以心遇然非力求之後無忽然而遇之理詩固可以心遇然非知言之後無恟然而遇之神穿鑿附會者失之率臆捕掠者亦未爲得也聖人之教必先博而後約貴古好敏求而不慕生知極力於人一己百人十己千而不矜不思不勉之能中是故卓爾之既見而後嘆其欲從末由者有之矣若謂才不必竭而徒聽高堅前後之自呈此必無之理也東萊乃欲比五經於途歌里詠偶然入耳而終身不廢是豈可得哉義文之易孔子且欲加數年以學之至老猶韋編三絕而不厭聖人力求如是况學者乎儀禮節文之繁周禮制作之備樂則器數音節終歲不能窺其藩春秋則事異文殊歷世不能得其要惟二帝三王之書約略易究然上則歷象星辰下則溝塗封域以至洪範之與商盤周誥之詰屈聱牙又何一可以偶然入耳而終身不廢耶且六經之刪定也

其前後不可知。顧謂書易禮樂春秋爲鄙儒所破壞。聖人憂之。然後得詩爲喜。用匹夫匹婦之胸救五經之破裂。是何所據而云然也。不亦傷於誕歟。且匹夫匹婦之歌謠。在詩亦止於風而已耳。若雅頌則聖君賢臣之所以治天下。而理萬物。仁人孝子之所以通幽明。而合神人。皆於是乎在。力求之。且未易以窮其蘊。而豈可偶然入耳。而遂神遇於無言之表乎。嗚呼。彼讀北山之詩。而疑舜可以臣父。詩小弁之詩。而謂宜白不可以怨者。皆自信其神遇。而不以言求者也。陸子靜謂六經皆我註脚。王伯安用其說。以詆朱子。大率類此。蓋未有不入於禪悟。而以不立語言文字。皆法門者矣。○張明德曰。六經皆聖人治世之書。然不能平心觀理。而求之過深。未免穿鑿附會。弊病百出。况詩之爲教。原令人優游涵泳。精意自呈。歷觀古人引用篇什。原屬活潑潑地。未嘗拘泥俗儒說詩。支離破碎。先生痛懲此弊。對證發藥。故爾云云。非靖節不求甚解之意也。○先儒謂秦世焚經。而經存。漢世窮經。而經亡。先生本此立意。實爲當時破壞六經者。痛下針砭。故借題發揮。千古善讀書人。自當知其言之不謬。○詩本人情。賅物理。東萊言斷簡殘編。呻吟諷誦。越宿已有遺忘。至於途歌里詠。偶入於耳。則雖終身而不廢。洵是實情。實理。確有所見之論。試觀鄉中蒙館村童。終朝呻其咕嗶。而不能背其昨日所讀之書者。甚至逃學而

受父兄師長之嚴責。迨其閒時。誦述向者所得之歌謠。則信口而出。初非有所傳習。繼非有所溫理。其所得時也。無意而相遭。無約而相會。所稱可以神遇。而不可以力求。殊不誣也。然則東萊所謂偶然入耳。而終身不廢。乃經中之理耳。五經皆所以形天下之理。天下之人不以理視經。而以經視經。故博議中言五經。卽言五經之理。若言五經不言理。而泥言五經。宜其有東萊乃欲比五經於途歌里詠。偶然入耳。而終身不廢。是豈可得哉之說也。非卽東萊所謂剝剔離析。彫績疏鑿。以經視經者乎。夫如是之謂力求也。論本言賦詩。斷章取義。可以神會。而不可以言求。蓋欲人會心於五經中之理。而不必屑屑於章句之末。以支離而入於鑿。故約而一之。以理歸之。以神遇。而不必力求於義例訓詁之末。欲人之探本也。何言末者。偏曰節文器數之繁。以及盤詰之詰屈聱牙。又何一可以偶然入耳。而終身不廢耶。視賦詩斷章取義之詩。爲全詩。辯而別之。以雅頌視賦詩。斷章取義。可以神遇。不可以力求之理。爲五經。以爲不力求。則入於禪悟。噫。吾知之矣。雲漢之詩曰。周餘黎民。靡有子遺。信如斯言。是周無遺民也。至論用匹夫匹婦之胸。求五經之破裂。爲云無所據。而傷於誕。曷不返而一思之乎。匹夫匹婦。胸中所存者性情耳。其實一理也。五經所載。皆所以形天下之理也。則五經所破裂而不全者。非不全此理乎。

以理救理。何云無據。何傷乎誕。公餘翻閱所及。爰書此以待質。

【音釋】

①【呻吟】詠誦之聲。（莊子）鄭人緩也。呻吟裘氏之地。祇三年而緩爲儒。②

【越宿】（孟子注）齊宿。齊戒越宿也。③【途歌里詠】（沈約文）老安少懷。途歌里

詠。④【眩】惑也。亂也。亦作幻解。⑤【油然】盛貌。（孟子梁惠王篇）天油然作雲。

⑥【研精】（孔安國尚書序）研精覃思。研窮究也。⑦【鑿】穿鑿也。（孟子離婁篇）

所惡於智者。爲其鑿也。⑧【幾矣】猶言庶幾。謂近乎道也。⑨【二帝三王之書】二帝

謂堯舜。三王。夏禹商湯周文武。尚書。⑩【義文孔子之易】文王周公孔子。因伏羲所畫

八卦而作周易。⑪【剗剔】謂剗割。⑫【離析】（論語）邦分崩離析。⑬【雕績】

（南史顏延之傳）鮑照曰。君詩若鋪錦列繡。雕績滿眼。⑭【疏鑿】（郭璞江賦）巴東

之峽。夏后疏鑿。⑮【天壤】謂天地。（傅咸賦）罄天壤而莫儷。⑯【鳥鳴二句】（韓

愈送孟東野序）以鳥鳴春。以雷鳴夏。以蟲鳴秋。以風鳴冬。⑰【羈臣賤妾之辭】當指皇

華及綠衣等篇。⑱【大訓】（書顧命）陳寶赤刀大訓。⑲【義例】書之主義體例也。

（北史張吾貴傳）義例無窮。⑳【訓詁】猶言注解。爾雅有釋詁釋訓兩篇。㉑【虛徐

【舒緩也】（詩北風篇）其虛其邪邪古徐字。【容與】閑暇自得之貌。（史記）楚王乃弭節裴回，翔翔容與。【冰解】（杜預左傳集解序）渙然冰釋，怡然理順。【平易】謂和平易與也。（史記魯世家）平易近民。【經支離】（揚子法言）五經之支離，蓋其所以爲簡易也。已簡已易，焉支焉離，支離殘缺也。【肯繁】音愷罄（莊子養生主）技經肯繁之未嘗，而况大軻乎。（注）肯繁，肋骨結處也。【牝牡驪黃】（列子說符篇）秦穆公使九方臯求馬，報曰：牝而黃，使人往取之，牡而驪，穆公不說，伯樂喟然太息曰：臯之所觀，天機也，得其精而忘其粗，得其內而忘其外，若臯之所相者，乃有貴乎馬者也。馬至果天下之良馬也。【斷章】（左傳襄公二十八年）賦詩斷章。【神遇】（莊子養生主）臣以神遇而不以目視。【火於秦，雜於漢】（韓愈原道）火於秦，黃老於漢。【齊魯】（玉海）詩三百五篇，漢興魯申公爲詩訓，故而齊轅固、燕韓嬰皆爲之傳，齊詩魏代已亡，魯詩亡於西晉，惟毛詩鄭箋至今獨立。【織緯】織錄圖緯，占驗術數之書也。（晉書儒林傳）虞喜專心經傳，兼覽織緯。【五際】（漢書翼奉傳）詩有五際。（注）詩內傳曰：五際，卯酉午戌亥也。陰陽終始際會之歲於此，則有變改之政也。【專門】

【後漢書儒林傳贊】塗分流別。專門並興。【鑄】【銖銖寸寸】（漢書枚乘傳）夫銖銖而稱之。玉石必差寸寸而度之。至丈必過。銖音殊。廿四銖爲兩。

衛禮至爲銘

僖公二十四年。衛人將伐邢。禮至曰。不得其守。國不可得也。我請昆弟仕焉。乃往。得仕。二十五年。春。衛人伐邢。二禮從國子巡城。掖以赴外。殺之。正月丙午。衛侯燬滅邢。同姓也。故名禮。至爲銘曰。余掖殺國子。莫余敢止。

借金石以起君子之論

君子之論一篇主意每用兩客作證

物莫壽於金石。言於千載之上。而傳於千載之下者。皆託金石以不朽。然金有時而銷。石有時而泐。其所託者未必真可恃也。一得其託。不銷不泐。視古今如旦暮者。果何物也。曰君子之論是也。天下不見湯之盤。而能誦日新之銘者。託於大學也。天下不見周之量。而能誦文思之銘者。託於周官也。是則銘託於湯盤者。反不如

借大學周
官以證左
氏文情縹

接入無痕

逸宕有致

應一句文
有關鎖
反接

其光熊熊
上燭於天

託於大學之堅銘託於周量者反不如託於周官之固君子之論
 其可恃豈金石比耶善託於君子之論固不朽惡託於君子之論
 亦不朽衛禮至行險僥倖而取其國恬不知恥反勒其功於銘以
 章示後世人皆以禮至之惡因金石而遺臭萬世也抑不知禮至
 之惡雖因金石而傳不因金石而遠自今而求禮至之所銘者鼎
 耶鐘耶敦耶錙耶而已滅已沒化為飛塵蕩為太虛無絲髮之存
 矣物不存則銘不存銘不存則惡不存禮至之所以遺臭者非金
 石也君子之論也使幸而不為左氏所載則銘亡而惡亦亡矣豈
 至於今日猶為人詆訶而已耶見辱於市人越宿而已忘見辱
 於君子萬世而不泯君子所以筆誅口伐於華門圭竇之間而老

又轉一意
歎俗之薄

將禮至
一步以責
天下之頌
美禮至者

再進一層

後人復美
後人後人
復笑後人
千古同慨

復一句傷
感無限

姦巨滑心喪膽落者恃此權也。遇伯樂者駑駘之不幸，遇匠石者
樗櫟之不幸，遇左氏者禮至之不幸，是舉衛國之嘲哂不如左氏
一字之辱也。禮至之辱雖他人代之，汗顏泚頰然至曷嘗自以爲
辱哉？想其顯書深刻之時未必不願君子之紀錄也。以辱爲榮其
無愧而不知恥，蓋不足多責。吾竊怪戰國秦漢以來用兵者反覆
狙詐，大率皆禮至之比。不特其人自矜其功而作史者亦從而咨
美頌歎之以誇示來世，甚矣風俗之日薄也。春秋之時有一禮至
人固已指爲異物，特書之以爲笑端。孰知後世爲禮至者將千百
而未已耶？又孰知後世執筆而記之者亦禮至之徒耶？甚矣風俗
之日薄也。

【評】茅鹿門曰。前一轉。不勝淋漓感慨。末再一轉。悽悽惻惻。幾於哭矣。○朱字綠曰。君子之論。金銷石泐。終古不磨。古今善惡。皆託之以傳。說得煜煜有神。文情酣暢。真可發潛德之幽光。誅姦雄於既死。○古人言三不朽。立言在德功之後。其輕重次序然也。然德非言不傳。無言則無德矣。功非言不著。無言則無功矣。書契未立以前。德隆功高者。不知幾千萬人。而後世無聞焉。言不存也。且也鬼神無紀。則世人不能識其威靈。祖宗無紀。則子孫不能記其名字。故德與功在一時。而言垂於萬世。言雖處功德之後。而所繫反重者。要非有德之言。則以禮至之徒。而傳禮至之事。文人無行。宜非君子所貴。是故立言不可不勉爲君子。○張明德曰。銘之爲言。彰功德而垂諸竹帛也。若無功與德。而徒建言以傳後世。適足以形其醜惡耳。文借大學周官以起左氏。用兩客作證。光焰赫赫。上燭於天。末幅又深一層。言春秋有禮至。特書之以爲笑端。而後之學禮至與記禮至者。何昧昧也。感慨作結。烟波無際。

【音釋一】

○【守】謂邢正卿國子。

【音釋二】

○【金石】金謂鐘鼎之屬。石謂碑碣之屬。古人於日用器物。大抵鐫勒文字。

又頌功紀事寓戒。亦皆銘諸金石。（墨莊漫錄）甚矣金石之壽也。○【不朽】（左襄）

雖久不廢。此之謂不朽。此指立德立功立言。④【金銷】（劉繩新論）金可銷而不可易其剛。⑤【石泐】（周禮考工記）石有時以泐。泐音勒。解散也。⑥【湯之盤三句】（禮大學）湯之盤銘曰：苟日新，日日新，又日新。⑦【周之量三句】（周禮考工記）卓氏爲量，其銘曰：時文思索，允臻其極。嘉量既成，以觀四國。⑧【行險僥倖】（禮中庸）小人行險以僥倖。⑨【恬】音甜。安也。⑩【章示】章明表示也。⑪【遺臭萬年】（晉書桓溫傳）然以雄武專朝，窺覷非望，曰：既不能流芳後世，復不足遺臭萬載乎。⑫【敦】音對。盛黍稷之器。（禮明堂位）有虞氏之兩敦。⑬【鏹】音刑。羹器也。亦曰鏹鼎。（儀禮）宰夫設鏹。⑭【太虛】空虛寂漠之境。（莊子）道不游太虛。⑮【絲髮】（北史敍傳）推尋勾當，絲髮無遺。⑯【詆訶】譏謗也。（陳書徐陵傳）未嘗詆訶作者。訶音呵。⑰【篔簹門圭竇】篔簹門，編荆竹爲門。圭竇，穿牆爲戶狀。如圭，言貧者居室之陋也。（禮儒行）篔簹門，圭竇，蓬戶甕牖。⑱【老姦巨猾】大奸惡之人也。⑲【伯樂】秦穆公時人，姓孫，名陽，善相馬。⑳【駑駘】音奴胎。馬之劣頓者。（楚辭）乘駑駘而馳驅。㉑【匠石】匠人名石，郢人（莊子）匠石運斤成風。㉒【樗櫟】音據歷。不材之木。（莊子）匠石之齊，見樗

櫟樹曰此不材之木也無所可用 ㊟【一字】（春秋正義序）一字所嘉有同華袞之贈
 一字所黜無異蕭斧之誅 ㊟【汗顏】心慙而出汗也（韓愈祭柳子厚文）不善爲斷血
 指汗顏 ㊟【泚頰】（孟子滕文公篇）其頰有泚泚音此汗出貌 ㊟【深刻】（五代
 史六臣傳）漢之羣臣稱魏功德而大書深刻 ㊟【狙詐】謂伺隙用奇也（漢書）秦據
 勢勝之地聘狙詐之兵狙音疽猴屬善伺物故比之 ㊟【異物】言異於人類也 ㊟【執
 筆】（北史李彪傳論）執筆立言遂爲良史

周與晉陽樊溫原欒茅之田

僖公二十五年夏四月丁巳王入於王城取大叔於溫殺之於隰城戊午晉侯朝王王饗醴
 命之宥請隧弗許曰王章也未有代德而有二王亦叔父之所惡也與之陽樊溫原欒茅之
 田晉於是始啓南陽

言周秦之強弱者必歸之形勢其說蓋始於婁敬敬之言曰周公
 營成周都雒以爲有德易以興無德易以亡不欲阻險令後世驕

直起
 形勢二字
 是一篇眼
 目

平王之周
形勢弱時

文成康
之周形勢
強時

一頓

結定一語
轉出德字
在中形勢之

奢以虐民也。及周之衰，天下莫朝，周不能制，非德薄，形勢弱也。秦地被山帶河，四塞以爲固，此所謂天府。論周秦之形勢者，皆宗於敬。吾獨謂敬所見者，特平王之周耳。曷嘗見文武成康之周哉？敬之所謂秦，乃文武成康之周也。文武成康之世，岐豐乃周之故都，所謂被山帶河，四塞以爲固者，蓋皆周之形勢。當是時，安得有所謂秦耶？迨至平王東遷，周輕捐岐豐之地以封秦，遂成秦之強。是秦非能自強也，得周之形勢而強也。秦得周之形勢以無道處之，猶足以雄視諸侯，并吞天下。况文武成康本之於盛德，輔之以形勢，其孰能禦之耶？是天下形勢之強者，莫周若也。敬何所見而遽以弱名周耶？敬論周之形勢，既謬，其論周之德益謬。形勢與德，夫

論形勢合德之大

先折倒婁敬以為貶襄王張本
過渡處意思聯絡

先說襄王之意方可辨駁

此辨甚明

豈二物耶。形勢猶身也。德猶氣也。人未有恃氣之充而置身於易死之地者。亦未有恃德之盛而置國於易亡之地者。王者之興。其德必有以先天下。其形勢亦必有以先天下。文武成康之德。天下莫如也。岐周豐鎬之形。天下亦莫如也。隆其德而殺其形勢。烏得為王者之道耶。陋矣哉。敬之論也。是論也。非特敬為然。雖周之子孫莫不皆然。晉文公既定子帶之難。請隧以自寵。襄王弗許。曰。王章也。未有代德而有二王。亦叔父之所惡也。與之陽樊溫原欒茅之田。襄王之意。以謂吾周之為周。在德而不在形勢。典章文物之制。子孫當世守之。不可一毫假人。至於區區土壤。吾何愛而以犯強國之怒耶。抑不知隧固王章也。千里之畿甸亦王章也。襄王惜

棄穢甸卽
棄王章

百忙中又
妙喻意妙
妙
風雲卷舒
山飛海立

意可哀憐
語能解頤

此責晉文
亦周之裔
何忍得田
以自肥

禮。文。不。以。與。晉。自。謂。能。守。王。章。抑。不。知。割。地。自。削。則。畿。甸。之。王。章。
既。不。全。矣。惜。其。一。而。輕。其。一。烏。在。其。能。守。王。章。耶。形。勢。猶。身。也。德。
猶。氣。也。披。其。肩。背。斷。其。手。足。自。謂。能。守。氣。者。吾。不。信。也。嗚。呼。周。自。
平。王。捐。岐。豐。以。封。秦。既。失。周。之。半。矣。以。破。裂。不。全。之。周。兢兢。自。保。
猶。慮。難。立。豈。復。有。所。侵。削。耶。奈。何。子。孫。猶。不。知。惜。今。日。割。虎。牢。界。
鄭。明。日。割。酒。泉。界。虢。文。武。境。土。歲。腴。月。削。至。襄。王。之。時。鄰。於。亡。矣。
又。頓。捐。數。邑。於。晉。是。棄。糧。於。陳。蔡。之。閒。揮。金。於。原。曾。之。室。果。何。以。
堪。乎。周。之。湮。替。至。此。見。之。者。皆。爲。之。憫。惻。晉。文。乃。忍。於。此。時。多。取。
其。地。以。自。肥。亦。猶。奪。糧。於。陳。蔡。之。閒。攫。金。於。原。曾。之。室。其。亦。不。仁。
甚。矣。噫。晉。文。獨。非。周。之。苗。裔。耶。坐。視。宗。國。之。危。蹙。不。能。附。益。反。從。

絕好證佐

審理揆勢
之論豈可
泥事而失
聖人之意
收處一語
斷盡

而漁奪之是而可忍孰不可忍議者反屑屑然論其伐原之信問
守之非何其舍本而求末也雖然仲叔于奚有功於衛賞之繁纓
夫子以為不如多與之邑隧之於繁纓不亦大乎襄王重隧而輕
邑適合夫子之訓夫子是則襄王亦是襄王非則夫子亦非必居
一於此矣曰不類仲叔于奚內臣也雖多與之邑猶衛地也晉文
公外臣也朝受圖而夕設版矣是不同

【評】

唐荆川曰補插處筆力周到○王聖俞曰論形勢合德深見帝王之大○楊升庵曰立

論必推其源勘理必求其至所以與俗見迥別○瞿昆湖曰議論垂竭折衷仲尼文字汪洋可
驚可愕一難一解語不費而意自析真大手筆○孫執升曰德與形勢相唇齒此文以身氣作
喻辨論明確可以破在德不在險一語婁敬亦不足辨矣○朱字綠曰借婁敬引起西周之形
勢說到德與形勢合一無形勢則德無所附麗然後破割地自削之非真通達世故之言其隄

蹕豪宕如天馬行空不可羈勒。○隧既不可予。邑又不可割。尙須補方略以待晉文。問何以待之。曰。來朝則路車乘馬。元袞及黼。有功則彤弓旅矢。賜之鈇鉞。得專征伐。未聞自割畿內以酬功也。且齊桓故事亦止賜文武之胙而已。晉文雖特功而橫。玉步未改。曲以徇之。不如直以折之。何必駕齊桓之上乎。○周初封建。雖諸侯得自有其封內。而其地仍歸之天子。故慶讓之典。有加地進律之賞。有六師移之之誅。海內之地。予之奪之一聽天子之命。非據王畿千里。自稱曰周而已矣。自夷王下堂而見諸侯。於是公侯伯子男各據其封。慶讓不得而及。至東遷而後。名爲天子。勢已等於列國。依於晉鄭。而取麥取禾。射王中肩。不道甚矣。齊桓首起爲葵邱之會。煌煌五命。申告同盟。然後人知天子之尊。晉文適繼其後。雖召天子於河陽。迹已不臣。而猶不得不率諸侯以行朝禮。則以齊桓爲之倡也。使周天子當齊桓初霸之時。能藉其力。復先王方伯連率之制。申明周禮。恪恭震動。雖不能繼文武成康之烈。必能稍起凌夷。用興周道。乃其時止有宰孔賜胙之舉。而無所修明。故晉文挾隲城之功。冒然請隧而不忌。蓋不能自強於齊桓尊周之初。而欲不依違於晉文陵逼之日。不可得矣。惜夫。○晉文以天子之田爲可攘。故晉卿亦以國君之地爲可分。此六卿所以擅晉。而卒歸於韓趙魏也。○張明德曰。請隧而王弗許。割

四邑以與襄之意以爲王制不可亂區區下邑所不惜也獨不思典章文物固不可以假人而畿內之士亦王章也獨可與乎然則爲王計奈何曰古者天子報有功諸侯曰錫之彤弓賜之鉄鉞下而至於路車乘馬所以明有功也割地而與與隧何異東萊以形勢二字立一篇大局以德字作骨折倒婁敬之說以爲貶襄張本意可哀於語能解頤結處引夫子繁縷一說更足以定襄王不王之案

【音釋一】

①【陽樊溫原欒茅】四邑名皆在晉山南河北

②【隧】闕地通路隧曰

王之葬禮也諸侯皆縣柩而下

③【南陽】晉地在今河南

【音釋二】

④【婁敬】漢高時人

⑤【敬之言曰下十四句】見《漢書婁敬傳》

通洛四塞四境之要塞也肥沃險固物產饒多之域謂之天府 ⑥【岐豐】地名皆在今陝

西 ⑦【平王東遷三句】（史記秦本紀）周避犬戎難東徙維維邑秦襄公以兵送周平王

平王封襄公爲諸侯賜之岐以西之地曰戎無道侵奪我岐豐之地秦能攻逐戎卽有其地與

誓封爵之襄公於是始誼 ⑧【以無道處之】（左昭）寡君有甲車四千乘在雖以無道

處之亦可畏也 ⑨【禦】當也 ⑩【豐鎬】周舊居之地（史記周紀贊）成王使召公

卜居居九鼎焉而周復都豐鎬。

①【周之子孫】指襄王。

②【典章文物】（唐書方技

傳）李淳風撰典章文物志。

③【畿甸】畿內王者所都也。古者王國千里曰王畿。規方千

里之內曰甸服。去王城五百里。（郝經詩）畿甸臨中國。河山擁奧區。④【兢兢】戒儆也。

⑤【割虎牢畀鄭】（左傳莊公二十一年）鄭伯享王。王與之武公之略。自虎牢以東。虎

牢在今河南。⑥【割酒泉畀虢】（又）王巡虢守。虢公爲王宮於蚌。王與之酒泉。酒泉在

今陝西。⑦【腴】音全。剝削之義。⑧【陳蔡之閒】（孟子盡心篇）君子之厄於陳蔡

之閒。無上下之交也。⑨【原曾】原憲曾子。皆孔門貧士。⑩【湮替】湮沒也。替廢也。

⑪【攫】菊縛切。撲取也。⑫【苗裔】謂後人也。（楚辭）帝高陽之苗裔耶。苗草之莖葉

根所生也。裔衣裾之末衣之餘也。⑬【附益】（論語先進篇）而求也爲之。聚斂而附益

之。⑭【漁奪】貪於取物。如漁者之取魚也。（漢書）吏以貨賂爲治。漁奪百姓。⑮【是

而可忍二句】見（論語八佾篇）。⑯【屑屑】煩瑣也。（左昭）而屑屑焉習儀以亟。

⑰【伐原之信】（左傳僖公二十五年）晉侯圍原。命三日之糧。原不降。命去之。謀出曰原

將降矣。軍吏曰。請待之。公曰。信國之寶也。民之所庇也。得原失信。何以庇之。所亡滋多。退一舍

而原降。⑱【問守之非】（又）晉侯問原守於寺人勃鞞。對曰。昔趙衰以壺飧從。徑餒而

弗食。故使處原。（柳宗元晉文公問原守議）守原政之大者也不宜謀至媿近以忝王命。

⑤【仲叔于奚三句】（左傳成公二年）新築人仲叔于奚救孫桓子桓子是以免既衛人賞之以邑辭請曲縣繁纓以朝許之仲尼聞之曰惜也不如多與之邑唯器與名不可以假人君之所司也曲縣亦曰軒縣天子樂器宮縣四面諸侯軒縣闕南方一面縣同懸繁纓馬腹帶飾諸侯之服也繁音盤。⑥【圖】地方區畫之名或作圖通鄙。⑦【夕設版】（左傳僖公三十年）朝濟而夕設版也版築牆版。

鄭子臧好聚鵠冠

僖公二十四年鄭子華之弟子臧出奔宋好聚鵠冠鄭伯聞而惡之使盜誘之八月盜殺之于陳宋之閒君子曰服之不衷身之災也詩曰彼己之子不稱其服子臧之服不稱也夫詩曰自詒伊感其子臧之謂矣夏書曰地平天成稱也。

物之有是根者遇物必發鄭世子華以賣國誅其弟子臧出奔宋境坐鵠冠而死當見殺之時去子華之誅殆將十年而宋鄭之封

根字是一篇主意
翻起筆意
悠揚可喜

跌宕以起
下意
此是正論
點出根字

收住
翻一筆
影映冠字
如鏡中花

疆亦不啻數百里也。况鷓冠之侈。得之道路之傳。其在鄭伯初無
損益。聞之非所怒也。怒之非所殺也。今一聞鷓冠之侈。必置之死
地。何喜怒之不類耶。蓋鄭伯之怒。本不在冠也。特遇冠而發耳。鄭
伯殺子臧之根。固已萌於朋附子華之時矣。以國君而誅一亡公
子。如孤豚腐鼠。何所不可。乃淹遲而不發者。非有所待也。時移地
移。鄭伯固已忘其怒也。怒雖忘而怒之根不忘。未與物遇之時。固
伏匿而不可見。及鷓冠之傳。忽動其根。前日之積忿宿憾。一旦如
新。非剪滅其身。不足以逞其毒。此所以罪之小而怒之大也。不然
則冠鷓未必不附於孔門。貂蟬未必不貴於漢室。聚鷓爲冠。豈有
可怒之實耶。鄰人之笛。懷舊者感之。斜谷之鈴。溺愛者悲之。感在

一唱三歎
讀者情移

以藏怒責
鄭伯由根
字生來

又生改過
一說發出
妙理勘出
至理

死中得活
宕出父子
二字使人
猛省

人。而。不。在。笛。悲。在。人。而。不。在。鈴。怒。在。人。而。不。在。冠。也。嗚。呼。鄭。伯。之。
 怒。子。臧。根。於。一。念。雖。事。在。十。年。之。前。而。身。居。數。百。里。之。外。終。不。能。
 免。吾。是。以。知。怒。之。不。可。藏。也。然。則。子。臧。雖。欲。遷。善。改。過。而。鄭。伯。之。
 怒。已。根。於。胸。中。能。保。其。不。遇。物。而。發。耶。曰。鄭。伯。何。為。而。怒。也。以。子。
 臧。而。怒。也。過。在。子。臧。而。怒。在。鄭。伯。吾。是。以。知。人。心。固。相。通。而。無。閒。
 也。子。臧。之。過。既。可。以。動。鄭。伯。之。怒。則。子。臧。之。改。獨。不。可。以。動。鄭。伯。
 之。喜。乎。想。子。臧。意。方。回。於。睢。陽。之。野。而。鄭。伯。之。顏。已。解。於。溱。洧。之。
 湄。矣。心。之。相。通。胡。越。無。閒。况。父。子。閒。耶。

【評】

汪伯玉曰。通篇正解大意。○鍾伯敬曰。中用雞貂映帶鶻字。又開纖巧法門。○笛鈴二

喻。稷豔可謂東萊別調。○朱字綠曰。罪鶻冠者。非罪鶻冠。亦有特見。末後翻出心之相通。此是

東萊家數。往往觸著。卽是張子一篇西銘總不外此。○張明德曰。服之不衷。身之災也。然卒以此殺其身。自詒伊戚。子臧已無解。但鷓冠之聚。得之傳聞。不應怒而殺之。吾以爲鄭伯之怒。不在一冠也。其所以殺之根。已萌於附會子華之時。文觀定根原。發出妙理。死中得活。東萊筆法。往往如此。

【音釋一】

①【鷓冠】鷓音聿。翠鳥聚鷓羽以爲冠。非法之服。

【音釋二】

②【子華賣國】事在僖公七年。③【喜怒不類】（左傳宣公十七年）

喜怒以類者鮮。易者實多。④【萌】草始芽也。⑤【朋】黨也。⑥【孤豚腐鼠】極言

不足輕重也。（後漢書竇顯傳）國家棄顯如孤雛腐鼠耳。豚本作雛。⑦【淹遲】猶言遲

緩。（西京雜記）相如製作淹遲。⑧【冠雞句】（史記仲尼弟子列傳）子路好勇冠雄

雞。佩緞豚。陵暴孔子。⑨【貂蟬句】（漢書劉向傳）王氏一門。乘朱輪華轂者二十二人。

青紫貂蟬。充盈幄內。漢制侍中中常侍冠加黃金璫。附蟬爲飾。插以貂尾。貂取其外柔而內剛。

蟬取其清虛謙變。⑩【鄰人之笛二句】（晉向秀思舊賦序）余與嵇康呂安居止接近。

鄰人有吹笛者。發聲寥亮。感音而歎。故作賦云。⑪【斜谷之鈴二句】（明皇雜錄）帝幸

蜀南入斜谷霖雨彌旬於棧道中聞鈴聲與雨相應帝慨悼貴妃因採其聲為雨淋鈴曲

【遷善】（孟子盡心篇）民日遷善而不知為之者

二水名 ⑤【胡越無閒】言雖疎遠而亦親近也

楚滅夔

僖公二十六年夔子不祀祝融與鬻熊楚人讓之對曰我先王熊摯有疾鬼神弗赦而自竄

於夔吾是以失楚又何祀焉秋楚成得臣鬬宜申帥師滅夔以夔子歸

新穎出人
意表卻是
至論

拈出氣字
有原委

以君子之言借小人之口發之則天下見其邪而不見其正以小人之言借君子之口發之則天下見其正而不見其邪是故大誥之篇入於王莽之筆則為姦說是非變乎言也氣變則言隨之變也於此有木焉柯幹未嘗改也春氣至則枯者榮衰者盛陳者新悴者澤秋氣至則榮者枯盛者衰新者陳澤者悴氣也者潛乎柯

幹之中而浮乎柯幹之外者也。惟言亦然。溫厚之氣加焉。凡勁暴粗厲之言皆變而爲溫厚。忿戾之氣加焉。凡易直平恕之言皆變而爲忿戾。一言不移而善惡霄壤。是孰使之然哉。氣可以奪言而言不可以奪氣也。故君子之學治氣而不治言。夔子之對楚問正也。其激楚怒而見滅者。以氣之忿而奪言之正也。夔不祀祝融與鬻熊禮也。衛祖康叔不敢祀后稷。魯祖周公不敢祀公劉。非所以爲罪也。此固先儒之所已論也。然夔子言之則是。而言之所出則非。治言而不治氣。雖有正禮大義。反爲忿戾之所敗。不足以解紛而反以速禍。豈不甚可惜哉。

【評】

孫執升曰。氣是本。詞是枝。故治言必先治氣。魯論出辭氣。斯遠鄙倍。孟子知言。必由養。

氣東萊小小立論見大學問讀之肅然而敬深於立言之道○夔子執諸侯之祀無過其祖之禮以是見滅楚人以夔子歸而春秋不名胡氏以爲非夔子之罪然則楚自憑陵江漢滅其同姓所以樹威而自利耳夔卽屈辱告哀亦未必矜而全之也東萊謂其氣暴取禍不過爲學者下鍼砭而已非果合當日事實也○張明德曰夔子之對問是也其激楚之怒而滅之者以其氣之忿而奪言之正也東萊根源一氣字探喉而出無非至理但此亦是空中樓閣爲粗心人下一藥石故借養氣意思立此快論此文之無中生有善於解嘲者○東萊先生以治言而不治氣雖有正禮大義反爲忿戾之所敗爲夔子惜迺千古人情物理所同然之至論何議者以楚自憑陵江漢滅其同姓以樹威而自利夔卽能言而不暴其氣楚亦未必矜全之也氣暴取禍不過爲學者下鍼砭而已非當日實事也爲詞耶竊謂邇時王室衰微其孱弱孰有甚於此者楚乃觀兵於周疆揆之其心亦自以爲可肆其憑陵而問鼎之大小輕重焉周其岌岌乎殆哉王孫滿乃獨善其說詞果使楚人卷甲韜戈逡巡自卻而奄奄欲息之周竟因二三委婉從容之語得以自存可知楚雖僻處蠻夷其君若臣無不同此人情物理者故聞王孫滿不暴其氣之言卽退耳然則治言必先治氣其果爲學者下鍼砭而已乎抑不僅爲學者下鍼砭而已

乎吾斯未信。贅此待質。

【音釋一】

①【夔】楚別封國。

②【祝融】高辛氏之火正。楚之遠祖。

③【鬻熊】

祝融之十二世孫。事周文王。成王時。封其子熊繹於楚。

④【熊羆】楚嫡子。有疾。不得嗣位。

故別封爲夔子。

【音釋二】

⑤【大誥二句】（漢書王莽傳）東郡太守翟義移檄郡國。言莽毒殺平帝。

攝天子位。欲絕漢室。令恭行天罰。誅莽。莽惶懼不食。禱告郊廟。做大誥作策。師古曰。大誥。周書

篇名。周公所作也。

⑥【姦說】（荀子）齊給便利而不順理。謂之姦說。

⑦【氣變】（

白虎通）春秋物變盛。冬夏氣變盛。⑧【柯幹】草木之枝莖。⑨【春氣至秋氣至】（

呂氏春秋義賞篇）春氣至則草木產。秋氣至則草木落。⑩【澤】光潤也。⑪【悴】衰

弱也。⑫【溫厚之氣】（禮鄉飲酒）天地溫厚之氣。始於東南。而盛於東北。⑬【勁暴

】猶言強暴。⑭【粗厲】（禮樂記）粗厲猛起。⑮【忿戾】恨怒而暴惡也。⑯【易

直】（論語注）良易直也。⑰【平恕】和平寬恕也。⑱【霄壤】猶天地。言相差之遠

也。⑲【治氣】（史記五帝紀）帝顓頊治氣以教化。絜誠以祭祀。⑳【夔不祀祝融二

句】諸侯之祀無過其祖者。夔祖熊摯，是不得祀祝融與鬻熊也。楚反以是滅之，非其罪矣。

④【衛祖康叔】（左傳哀公二年）敢昭告皇祖文王，列祖康叔。康叔，文王之子，武王之弟，始封於衛。

⑤【后稷】虞舜時農官，名棄，掌其事，因亦稱棄為后稷。周之始祖也。十五傳而至武王，遂有天下。

⑥【公劉】后稷之曾孫，夏后氏政衰，稷子不窋失官，奔戎狄，再傳至公劉，復修后稷之業，遷於邠，周室之興自此始。

⑦【解紛】（史記滑稽傳）談言微中，亦可以解紛。

⑧【速禍】（左傳隱公三年）去順效逆，所以速禍也。速，召也。

臧文仲分曹田

僖公三十一年春，取濟西田，分曹地也。使臧文仲往宿於重館。重館人告曰：晉新得諸侯，必親其共，不速行，將無及也。從之分曹地。自洮以南，東傳于濟，盡曹地也。襄仲如晉，拜曹田也。

兩語扼定

承剖判嚴

明一毫不

可假借
入題
斷定

利則居後，害則居先。此君子處利害之常法也。是故見利而先謂之貪，見利而後謂之廉；見害而先謂之義，見害而後謂之怯。晉文公有討於曹，披裂其地，諸侯不能救，則已矣。乃乘其危而共取其

作勢伏後
不忍之意
及本心易
失因歸結
明善

運筆有曲
致

借萬章之
不受財明
文仲之不
可受田

利是誠何心哉。臧文仲所以遲遲其行者亦忸怩而不安歟。異哉。重館人之言也。曰：晉新得諸侯，必親其共，不速行將無及也。重館之人所謂共，其諸異乎？聖人之所謂共，歟？信如是說，則狡商豪賈趨利如風雨者，皆重館人之所謂共也。彼逡巡推揖恥於冒利之君子，格以重館人之言，皆不共之大者也。其說陋甚，孰謂臧文仲之賢而反爲所動乎？惜萬章與石顯善，顯免官，留物數百萬與章，章不受。曰：吾以布衣見哀於石君，石君家破，不能有以安也。而受其財物，此爲石君之禍。萬氏反當以爲福耶？魯與曹同出姬姓，並列諸侯，其恩義信誓之重，非若顯章一時之私交也。魯坐視曹之翦覆，不惟不能辭其地，又奔走而趨之，以曹之禍爲魯之福。曾謂

較量一句
文勢躍然

不忍二字
從前怵怩

勤出

前引萬章

石顯字此

又借文仲

申層層翻

究以失其

論本心為定

論本心為定

氣脈深厚

本心利心
頂門一針

文仲之賢不如一萬章乎。使文仲緩轡徐行，以致吾不忍之意。雖後諸侯之期不得尺土以歸，吾親親之義固已盡矣。今冒利競進，雖得地之多，吾恐文仲之所喪者多於地也。前日魯僖之請復衛侯，文仲嘗為謀主矣。諸侯之患諸侯恤之所以訓民也。君盍請衛君以示親於諸侯，且以動晉。夫晉新得諸侯，使亦曰魯不棄其親，其亦不可以惡。於是納玉於晉，以免衛侯。曹衛一體也。免衛之難，其義既足以動晉，辭曹之田，其義反不足以動晉乎。文仲於衛則割我之所有，棄之而不惜；於曹則奪彼之所有，受之而不疑。非恩衛而讎曹也。本心易失而利心易昏也。吁，可畏哉。雖然，太公之就封道宿行遲，逆旅人曰：客寢甚安，殆非就國者也。太公聞之，夜衣

又借太公
之事以見
彼此遲速
之不同

遲速二意
對照分明

結穴

而行。黎明至國。則萊侯既與之爭營邱矣。太公聽逆旅之言。其心亦未免趨於利歟。非也。君子固不以利自浼廿三。亦不以利自嫌也。一國之重。有民人焉。有社稷焉。吾其可以避趨利之小嫌而濡滯逗撓廿六。使為姦寇之所伺乎。故太公之不可遲。猶文仲之不可速也。然受封分地之事。逆旅重館之言。同異是非廿七。閒不容髮。若之何而辨之。曰在明善。

【評】

唐荆川曰。委曲辨明。使人不得議其後。此東萊論法最高處。因文仲行之遲遲。懸斷其

忸怩不安。有不忍分曹之意。因從館人之言。不能如存衛之義。懸斷其本心易失。利心易昏。遂歸結之曰。在明善。此一篇前後起伏呼應之細脈也。以萬章相形。謂文仲以禍為福。又以文仲免衛侯相形。謂文仲恩衛離曹。斷制精明。使文仲無可置辨。○胡氏謂不繫國者吾故田也。臧孫所以從重館人之言者。殆知復故田之為急。而不知以亂易亂之為非也哉。○張明德曰。東

萊文章所以爲後學開法門者全在立議高而出筆快每遇一題必先度其題之虛實輕重創定一不拔之論推出一段至理說得原原本本此文先借文仲行之遲遲懸斷其不安不忍之意後又從館人之一言以斷其利令智昏之處前後起伏無一非法

【音釋一】

①【分曹田】僖公二十八年晉文討曹分其地竟界未定至是乃以賜諸侯

②【重館】魯地

③【洮濟】皆水名

【音釋二】

④【私有討】（左傳定公十三年）趙鞅曰吾私有討於吳也

⑤【披裂

猶言分散

⑥【忸怩】見前

⑦【其諸】（論語注）其諸語辭也

⑧【狡商】狡

獯之商人

⑨【豪賈】（宋史食貨志）

陸師閔言既毀私錢禁止銅冶則物價當減詔用

其言而豪賈富家多不便

⑩【逡巡】行不進也（賈誼文）九國之師逡巡遁逃而不敢

進 ⑪【推揖】猶言推讓

⑫【冒利】（蘇軾詩）冒利輕生不自憐冒貪冒

⑬【格

作變革解（書臯陶謨）格則承之庸之

⑭【萬章與石顯善十句】見（漢書）萬漢

書作萬音雨章字子夏長安人石顯濟南人元帝時爲中書令貴幸傾朝結黨專政成帝時廢

罷。⑤【魯與曹同出姬姓】周文王子曹叔振鐸封於曹與魯周公爲兄弟姬周姓。⑥【信誓】（詩氓之篇）信誓旦旦。⑦【尺土】言土地之小也。⑧【親親】（禮中庸）仁者人也親親爲大。⑨【諸侯之患八句】見（國語）。⑩【納玉句】衛侯在晉公納玉二十穀乃免衛侯見（國語）及（左傳）。⑪【太公之就封九句】見（史記齊世家）。

⑫【營邱】（禮檀弓）太公封於營邱在今山東。⑬【浼】汗也。⑭【濡滯】（孟子注）遲留也。⑮【逗撓】（漢書韓安國傳）廷尉當恢逗撓當斬恢王恢也逗曲行避敵撓願望也。⑯【姦寇】（徐陵陳公九錫文）姦寇途窮濯然冰泮。⑰【同異是非】（禮曲禮）禮者所以決嫌疑別同異明是非也。⑱【閒不容髮】相距極近中無一髮之閒隙也（說苑）其出不出閒不容髮。

東萊博議 卷三

新註
東萊博議卷三終

新體評註

東萊博議卷四

穆伯襄仲

文公七年穆伯娶於莒。曰戴己。生文伯。其娣聲己。生惠叔。戴己卒。又聘于莒。莒人以聲己辭。則爲襄仲聘焉。冬。徐伐莒。莒人來請盟。穆伯如莒。蒞盟。且爲仲逆。及鄆陵。登城見之美。自爲娶之。仲請攻之。公將許之。叔仲惠伯諫曰。臣聞之。兵作於內。爲亂。於外。爲寇。寇猶及人。亂自及也。今臣作亂。而君不禁。以啓寇讎。若之何。公止之。惠伯成之。使仲舍之。公孫敖反之。復爲兄弟。從之如初。

兩意反起
空中立架

怨之於人
甚矣不修

問修怨於君子。必以爲非。問修怨於小人。必以爲是。二者皆未爲定論也。專於報怨者。商鞅三。范雎四之徒耳。專於忘怨者。老聃五。莊周六之徒耳。吾聖人未嘗修怨。亦未嘗忘怨。權其小大輕重。而中持衡焉。

不忘說得極平極淡

反跌一句通篇之意俱已在此

將小大輕重又進一步喚出天合二字

兄弟屬天人皆知之說來親切醒快

未嘗倚一偏而主一說也。穆伯為襄仲聘婦於莒中道而奪之。夫豈細怨也哉。而惠伯周旋其間委曲調護始釋其憾終全其恩。彼非不知輕重大小之所在也。蓋穆伯之於襄仲兄弟也怨之小大輕重在他人可言耳。兄弟之間豈較小大輕重之地哉。以人合者有時而離以天合者無時而離。兄弟之屬天也人怨不足以害之。襄仲之怨穆伯以人觀之則固大矣重矣。以天觀之則兄弟之親與生俱生而不可離。豈以恩怨而加損哉。兩嗚變於前而太虛之真體未嘗動也。恩怨交於前而兄弟之真情未嘗動也。襄仲向者之怨私情之怨耳。今者之解私情之解耳。乃若胸中之天則向無怨而今無解也不然。豈惠伯立談之頃所能解耶。焚廩捐階之虐

指出象之
天即傲弟
不容不化
於善

治樓入宮之侮。百世之後。讀其書者。猶爲舜切齒。而舜之恩意。源不絕者。非以德報怨也。以弟待象。而不以象待象也。以天觀象。而不以人觀象也。蓋鬱陶思舜。乃象之天。彼傲而害舜者。特象之人耳。舜之胸中。純乎天。故見象之天。而不見象之人也。使惠伯立於舜之廷。將化於舜之天。而不自知爾。雖有喙三尺焉。攸用。

【評】

李衷一曰。中段提出天合恩怨有所不受。○朱字綠曰。兄弟之間。不可較怨一語。可救

人倫之患。○張明德曰。恩怨報復。總是人情。天理四字。可以解釋得清楚。穆伯爲襄仲娶於莒。中道奪之。怨孰甚焉。而得惠伯片言。釋怨而全恩。文於平淡中。說得親切醒快。中間喚出天合二字。更見根底。千古人倫之變。於舜而極。而處之恬然。胸中純乎天理也。

【音釋一】

①【襄仲】穆伯從父弟。

②【鄆陵】莒邑。

【音釋二】

③【商鞅】戰國衛人。少好刑名之學。相秦孝公。定變法令。廢井田。開阡陌。改

賦稅之法。封於商。號商君。孝公卒。被殺。④【范雎】戰國魏人。說秦昭襄王以遠近交攻之策。得爲相。封應侯。史記謂其一飯之德。必償。匪眦之怨。必報。⑤【老聃】姓李。名耳。字伯陽。諡曰聃。周守藏室史。著書名老子。嘗曰。報怨以德。聃他庵切。⑥【莊周】戰國蒙人。嘗爲漆園吏。著書十萬餘言。其要本歸於老子之言。⑦【權】稱錘也。所以稱物而知輕重者。用爲處事公平之喻。⑧【持衡】（唐書李石傳）天下之勢。猶持衡。衡。俗謂之秤。⑨【惠伯】魯大夫。⑩【雨暘】（書洪範）曰。肅。時雨若。曰。乂。時暘若。暘。音陽。晴也。⑪【太虛】天也。⑫【焚廩捐階】（孟子萬章篇）父母使舜完廩。捐階。瞽瞍焚廩。階。梯也。⑬【治棲入宮】（又）象曰。二嫂使治朕棲。象往入舜宮。舜在牀。琴。象曰。鬱陶思君耳。⑭【切齒】齒相磨擊。奮怒之貌。⑮【鬱陶】思之甚而氣不伸也。⑯【隊三尺】唐陸慶善論事。而短於判。人嘲之曰。說事則隊長三尺。論事則手重五斤。見（本傳）隊。虎穢切。口也。⑰【焉攸用】猶言何所用。

先軫死師

僖公三十三年夏四月辛巳敗秦師於殽獲百里孟明視西乞術白乙丙以歸遂墨以葬文公晉於是始墨文嬴請三帥曰彼實構吾二君寡君若得而食之不厭君何辱討焉使歸就戮於秦以逞寡君之志若何公許之先軫朝問秦囚公曰夫人請之吾舍之矣先軫怒曰武夫力而拘諸原婦人暫而免諸國墮軍實而長寇讎亡無日矣不顧而唾公使陽處父追之及諸河則在舟中矣釋左驂以公命贈孟明孟明稽首曰君之惠不以蒙臣釁鼓使歸就戮於秦寡君之以爲戮死且不朽若從君惠而免之三年將拜君賜秦伯素服郊次鄉師而哭曰孤違蹇叔以辱二三子孤之罪也不替孟明孤之過也大夫何罪且吾不以一眚掩大德狄伐晉及箕八月戊子晉侯敗狄於箕卻缺獲白狄子先軫曰匹夫逞志於君而無討敢不自討乎免胄入狄師死焉狄人歸其元面如生

兩意並提
側重難持
數語言悔
心難發
轉入難持

至難發者悔心也。至難持者亦悔心也。凡人之過。很者遂之。詐者文之。愚者蔽之。吝者執之。誇者諱之。怠者安之。孰能盡出數累之外。而悔心獨發者乎。然是悔也。未發則憂其難發。既發則憂其難

心中曲折
搜剔殆盡
絲忽難瞞

難持之累

卽繳題面
文勢勁捷

持。悔。心。初。發。自。厭。自。愧。自。怨。自。咎。焦。然。不。能。以。一。日。安。苟。無。以。持。之。則。自。厭。者。苟。且。弛。縱。必。入。於。自。肆。矣。自。愧。者。退。縮。羞。赧。必。入。於。自。棄。矣。自。怨。者。鬱。積。繳。繞。必。入。於。自。懟。矣。自。咎。者。憂。憤。感。激。必。入。於。自。殘。矣。是。悔。固。可。以。生。善。亦。可。以。生。不。善。也。萬。斛。之。舟。非。遇。大。風。則。不。回。苟。無。以。持。之。因。風。而。反。溺。者。多。矣。一。念。之。悔。其。勁。烈。蓋。甚。於。風。焉。烏。可。不。知。所。以。持。之。耶。吾。觀。先。軫。之。死。未。嘗。不。嘉。其。悔。而。又。傷。其。無。以。自。持。也。軫。以。不。顧。而。唾。無。禮。於。君。及。箕。之。役。深。悔。前。過。免。胄。而。死。於。狄。師。一。念。之。勁。烈。如。此。使。有。以。持。之。固。可。一。日。而。收。克。己。復。禮。之。功。矣。惟。其。無。以。持。之。不。用。是。力。於。禮。義。而。用。是。力。於。血。氣。身。爲。元。帥。總。三。軍。之。重。輕。棄。其。身。身。死。無。名。驕。敵。遺。笑。

廿九

廿八

廿七

廿四

十九

二十

廿一

廿二

廿三

廿五

廿六

勉勵將才
亦須學問

殆與自經於溝壑者等耳。先軫意在於改過而反。至於生過失不在於悔而在於不能持其悔也。風之無力者不能回舟。至於風力之勁者。惟善操舟者為能持之。悔之無力者不能遷善。至於悔力之勁者。惟善治心者為能持之。使軫果能持其悔。則舒泰恬愉之地自有真樂。何至輕殺其身哉。惜乎軫之不能持其悔也。

【評】

孫月峯曰。寫人情歷歷如見。不知世故。不可以為文章。○王鳳洲曰。只就悔心難持四

字翻論到底。句句名言。○朱字綠曰。說不能持悔心。引風為喻一段。極親切有味。○先軫為人氣質粗猛。始而唾其君。既而死於敵。同一暴氣也。其唾君死敵。均為國事。初非有所私。但於寇之既縱。即爭之已遲。而何至於唾於寇之方來。正當嚴其旗鼓。而何為免胄以死。是所謂血氣之勇。不能自克者也。東萊欲引之舒泰恬愉之樂。似非所以告戰陣之士。然敦詩說禮。乃大將才。則其言未為迂也。○張明德曰。拈定難持二字。千迴百折。反覆辯難。總是得孟子子養氣大

意推勘得透。後又歸根治心上頭。正是持其志。無暴其氣之意。先軫果操持到這等地位。又何有免胄入師之事。不獨行文勝人幾籌。卽此等經濟。此等學問。亦周程張朱遺派也。○篇末引先軫以秦舒恬愉之樂。乃東萊先生進將才以學問。令作風流之儒將耳。若謂非所以告戰陣之士。拘矣。夫戰陣之士。軍中自有紀律。尤當聽命於大帥之旗鼓。亦非可以粗暴猛戾爲也。

【音釋一】

①【殺】地名。在今河南。②【墨】（左僖）子墨衰。經。文子未葬。以凶服

從事。故墨之。

③【文嬴】晉文公始適秦。秦穆公妻之。爲襄公嫡母。④【暫】猶卒也。

⑤【唾】免臥切。吐出口液也。

⑥【釋左驂】欲使還拜謝。因而執之。⑦【纍臣覺鼓】

纍。囚繫也。殺人以血塗鼓。謂之纍鼓。

⑧【晷】過也。⑨【箕】箕山。在今河南。⑩【遲

志於君】謂不顧而吐。⑪【元】首也。

【音釋二】

⑫【難持】猶言不由自主。⑬【遂】順意也。⑭【文】音問。（論語子

張篇）小人之過也。必文。謂掩飾也。

⑮【苟且】媿合之謂。⑯【弛縱】放肆也。⑰【

退縮】不前進也。

⑱【羞赧】慚愧貌。⑲【鬱積】不舒也。⑳【繳繞】猶言纏繞。繳

讀如皎。

㉑【懟】渡內切。怨之深也。㉒【憂憤】心懷不平而憂鬱也。㉓【感激】心

有所感而激發也。⑤【殘】害也。毀也。⑥【萬斛之舟】（晉書石季龍載記）徙洛陽鐘簫翁仲造萬斛舟以渡之。⑦【勁烈】強猛之義。⑧【一日克己復禮】（論語顏淵篇）一日克己復禮天下歸仁也。克己勝其私欲復禮復其天性。⑨【不用是力於禮義】（禮聘義）勇敢強有力而不用之於禮義戰勝而用之於爭鬪則謂之亂人。⑩【血氣】（孟子注）小勇血氣所爲。⑪【自經於溝壑】（論語子路篇）豈若匹夫匹婦之爲諒焉。自經於溝壑而莫之知也。經縊也。⑫【操舟】（莊子）津人操舟若神。操運使也。⑬【舒泰】寬緩也。⑭【恬愉】安適也。⑮【殺其身】（禮文王世子）爲人臣者殺其身有益於君則爲之。

相術

文公元年王使內史叔服來會葬。公孫敖聞其能相人也。見其二子焉。叔服曰穀也食子。難也。收子穀也豐。卜必有後於魯國。宣公四年初楚司馬子良生子越椒。子文曰必殺之。是子也。熊虎之狀豺狼之聲。弗殺必滅若敖氏矣。昭公二十八年初叔向娶於申公巫臣氏。生伯

石伯石始生姑視之及堂聞其聲而還曰是豺狼之聲也狼子野心非是莫喪羊舌氏矣

立意高
兩喻夾正
意行

一語斷定

術者原不
敢與吾道
爭

應荀卿何
其不自愛

勢相敵而後訟未有非其敵而訟者也親屈公卿之貴而與卑隸
訟親屈巨室之富而與窶人訟親屈儒者之重而與卜祝訟勝之
不武不勝為笑適自卑而已矣荀卿以大儒而著非相之篇下與
卜祝較何其不自愛也彼挾相術以苟衣食者卑穴凡賤廁迹於
巫醫優伶之間仰視儒者如斥鷃望大鵬於羊角扶搖之上敢有
一毫爭衡之心乎荀卿^{廿二}饒饒與相師辨連簡累牘而不已^{廿三}是書一
出相師之氣坐增十倍以謂我何人也彼何人也今彼乃明目張
膽極其辯而與我爭曲直若恐不勝者是必我之道可以與彼抗
也由是卜祝之流相勸相勉相形之術^{廿三}遂蔓延於天下矣然則荀

提出孔子
壓倒荀卿

二人言禍
福亦非卑
宥相術孔
子猶不取

反一句推
孔子之意
以入荀卿
之罪

卿之於相術。將以排之。適以助之。非相之篇。吾恐未免爲是相之篇也。自孔子以前。相術固已概見於世矣。若周叔服相。公孫敖之二子。一言其必食子。一言其必收子。是以相而預言人之福也。子文及叔向母。見越椒。伯石之始生。一言其必滅若敖氏。一言其必喪羊舌氏。是以相而預言人之禍也。數十年之後。福焉而福。禍焉而禍。無一不合。誇於口者。有之。筆於書者。有之。孔子未嘗過而問焉。豈孔子衛道之心。反緩於荀卿耶。孔子以謂天下之曲技小術。雜然而不可縷數。如蝸蟬廿四。鼃黽廿五。自鳴自止。本不足爲吾道之輕重。苟獨取其一而辯焉。則天下必以爲是術也。至勞聖人與之辯。必其道可與聖人抗。殆將有陷溺而從之矣。是反爲吾道增一異端廿六。

再應不自
愛從孔子
身上說相
術不必非
但付一笑

孔子相書

也。天下本未嘗以異端待相術。荀卿強斥以爲異端而與之辯。無故而爲吾道增一異端。非荀卿之罪耶。吾嘗觀孔子周游於天下。鄙夫陋人。每以區區相術而窺之。有曰：顛類堯也。項類皋陶也。肩類子產也。孔子與門弟子聞之。不過付之一笑耳。乃若吾夫子之門。自有相書。申申廿八天天。卽孔門相容貌之術。閭閻侃侃。卽孔子相言語之術。翼如三十。檐如。卽孔門相步趨之術。勃如卅一。愉如。卽孔門相顏色之術。曾子傳此以相人。故發而爲動容貌之論。子思傳此以相人。故發而爲動乎四體卅三之論。孟子傳此以相人。故發而爲眸子瞭眊之論。荀卿得孔門之相書。將心醉服膺卅五之不暇。何暇非他人之相書耶。

【評】

茅鹿門曰。末段語帶調笑。正完其不足與辯之意。○孫月峯曰。絕異端以不辯。自是聖人居上流之法。而又就相冷敲熱棒。痛喝一番。奇文妙義。匪夷所思。○楊升菴曰。落筆矜貴。東萊胸次。曠然可想。○袁中郎曰。掀翻名理之窟。妙在以遊戲出之。○朱字綠曰。說小術不足與較。占得地步高。發得議論透。○荀子謂相形不如論心。論心不如擇術。形相雖惡而心術善。無害爲君子。形相雖善而心術惡。無害爲小人。亦是透關之論。然穀難形相善而心術亦善。越椒伯石形相惡而心術亦惡。故不若置之不辨之爲得也。○張明德曰。星相術數之說。各立門戶。非聖賢光明正大道理。與之辨論。已於吾道樹敵。篇中引夫子以爲證據。深闢荀子非相之篇。多此一說。自是衛道正旨。又從孔子身上說出多少相法。東萊善於解嘲。另是一種筆法。

【音釋一】

①【相術】辨人之官體容色。以決禍福之術。《漢書蒯通傳》僕嘗受相人術。②【公孫敖】魯穆伯。③【穀也食子】穀。文伯。食子。奉祭祀供養者也。食音嗣。④

【難也收子】難。惠叔。收子。葬子身也。難乃多切。⑤【豐下】面方。⑥【子良】楚令尹

子文兄。⑦【若敖】楚鬬氏。⑧【姑】晉叔向母。婦人稱夫之母曰姑。⑨【羊舌】叔

向氏。

【音釋二】

⑩【阜隸】皆賤役。《左傳昭公七年》士臣阜。阜臣與。與臣隸。⑪【巨室

【世臣大家也】^(㉑)【窶人】貧陋之人。^(㉒)【卜祝】卜卜人。祝宗廟之官。^(㉓)【勝之不武二句】見（左傳襄公十一年）。^(㉔)【荀卿】戰國趙人名况，亦稱荀卿，著書曰荀子。^(㉕)【非相篇】荀子作。^(㉖)【卑亢】下劣也。^(㉗)【巫醫】巫爲人祈禱，醫爲人治病。^(㉘)【優伶】優謂雜戲，伶謂樂人。^(㉙)【斥鷃句】（莊子逍遙遊）有鳥焉，其名爲鷃，背若泰山，翼若垂天之雲，搏扶搖羊角而上者九萬里，絕雲氣，負青天，然後圖南，且適南溟也。斥鷃笑之曰：彼且奚適也。（注）扶搖，旋風也。殺羊角，紋團紐而上。鷃之盤風似之。斥鷃，小鳥也。^(㉚)【讒讒】希玄切，多言也。^(㉛)【明目張膽】言無顧忌。（唐書）韋思謙曰：丈夫當敢言地，須要明目張膽，以報天子。^(㉜)【蔓延】如蔓草之延長不斷也。^(㉝)【蝸蟬】（詩七月篇）五月鳴蝸。（疏）蝸蟬一物，方俗異名，蝸音調。^(㉞)【鼃黽】鼃，古蛙字。黽音猛。（周禮秋官）蝸氏掌去鼃黽。黽亦鼃類。鼃陸居，黽水居。^(㉟)【異端】（論語注）非聖人之道，而別爲一端。^(㊱)【頽類堯三句】（家語）孔子適鄭，與弟子相失，獨立東郭門外，或謂子貢曰：東門外有一人焉，其長九尺有六寸，河目隆頽，其頭似堯，其頸似臯陶，其肩似子產，然自腰以下不及禹者三寸，纍焉如喪家之狗，子貢以告，孔子欣然而歎曰：形狀末也，如喪家之狗，然乎

哉。然乎哉。④【申申天天】（論語述而篇）子之燕居，申申如也，天天如也。（注）申申，其容舒也。天天，其色愉也。⑤【闐闐侃侃】（論語鄉黨篇）朝與下大夫言，侃侃如也。與上大夫言，闐闐如也。（注）侃侃，剛直也。闐闐，和悅而諍也。⑥【翼翼如如】（又）衣前後襜如也。趨進，翼翼如也。（注）翼翼，如鳥舒翼，襜，整貌。⑦【勃如愉如】（又）君召使擯，色勃如也。私覲，愉愉如也。勃，變色貌。愉，和也。⑧【動容貌】論語曾子言。⑨【動乎四體】見（禮中庸）。⑩【眸子瞭眊】（孟子離婁篇）胸中正，則眸子瞭焉。胸中不正，則眸子眊焉。（注）瞭，明也。眊者，蒙蒙目不明之貌。⑪【心醉】傾倒之至，如爲酒所醉。（列子說符篇）鄭有神巫曰季咸，列子見之而心醉。⑫【服膺】見前。

晉侯朝王伐衛

文公元年，晉文公之季年，諸侯朝晉，衛成公不朝，使孔達侵鄭，伐縣，訾及匡。晉襄公既祥，使告於諸侯，而伐衛及南陽。先且居曰：效尤禍也。請君朝王，臣從師。晉侯朝王於濫，先且居晉臣伐衛。五月辛酉朔，晉師圍戚。六月戊戌，取之，獲孫昭子。衛人使告於陳，陳共公曰：更伐之。

我辭之。衛孔達帥師伐晉。君子以爲古。古者越國而謀。

主客並起

誅心之論

以父喻君
議自正大

因人而有過者。君子不謂之過。因人而有善者。君子不謂之善。因人而過。猶^五鑑遇^六媮母而醜。本非鑑之醜也。因人而善。猶木託^七秦華而高。本非木之高也。爲善由己而由人乎哉。晉襄公卽位而朝王於溫。人皆善其尊周也。及考其朝王之由。蓋將討衛之不朝。故身先朝周以責之。然則尊王之善。豈襄公之本心哉。則吾知晉襄之旃。未必入於周境矣。彼因人而有善者。果足以爲善耶。臣之於君。猶子之於父也。子必因責人而始敬父。則父得子之敬寡矣。臣必因責人而始朝君。則君得臣之朝寡矣。又况子之敬父。自敬汝父耳。於人何有。臣之朝君。自朝汝君耳。亦於人何有。使晉襄之事周。

更說得親切

晉非人君
何以責他
人之朝此
非人父何
以責他人
之拜其乖
悖正是相
等伯恭喻
帶嘲笑然
據其情確
真確是

春秋朝覲史不絕書亦晨省昏定之常耳猶不足以自高况甫陟
周之庭遽傲然自足鳴鐘擊鼓凌責他人之無禮安得不納孔達
之侮哉世有妄人嘗拜其父者他日執塗人而責之曰我嘗拜父
汝何爲不拜我天下未有不笑其狂者晉襄之責衛非此類耶雖
然無諸已而後非諸人大學之道也晉襄先朝王而後責衛似有
合於大學之旨庸可毀耶非也觀書者要當忘言而得意大學之
意在於無諸已而不在於非諸人也欲學者將非人之時常思無
諸已之戒不欲學者持無諸已之論用爲非人之資也故先曰無
諸已次曰非諸人其意主於攻己過而不主於攻人過明矣吾恐
說經者以文害辭故力辯之以告吾黨之士云

【評】 邱瓊山曰。妙解若環。○焦弱侯曰。尊周大義。齊桓晉文。皆由是耳。豈但朝王於溫哉。此五霸所謂假之也。○鍾伯敬曰。中拜父一喻。寫呆愚之狀。可發一笑。○孫執升曰。欲衛之朝已而朝王。是非尊周。乃自尊。自尊者。無周矣。中責以君父大義。後論無己非人。庶幾不惡而嚴。○朱字綠曰。小小結構。氣概凌厲。無前。○張明德曰。目無天王。已非一日。而乃假以尊王之意。聲罪致討。殊屬可笑。篇中以父喻君。以子喻臣。以子之事父。喻臣之事君。極平常語。卻說得一種呆人說夢之妙。以嘲笑爲文字。讀者絕倒。

【音釋】

①【縣營匡】皆鄭邑。在今河南。②【祥】喪祭名。父母之喪。期而小祥。又期而大祥。③【南陽溫】俱見前。④【戚】衛邑。

【音釋二】

⑤【鑑】鏡也。⑥【媼母】古之醜婦。黃帝第四妃。媼音模。⑦【泰華】

東岳泰山。西岳華山。⑧【春秋朝覲】春見曰朝。秋見曰覲。⑨【晨省昏定】（禮曲禮）

（昏定而晨省）（注）定其衽席省其安否。謂爲人子之禮。⑩【鳴鐘擊鼓】（國語晉語）

（是故伐備鐘鼓。聲其罪也。乃鳴鐘擊鼓。以至於宋。⑪【執塗人】（蘇洵春秋論）執塗

人而告曰。某爲善。某爲惡。可也。塗人行路之人。⑫【無諸己而後非諸人】句見（禮大學）

（註）【忘言而得意】（莊子外物篇）言者所以在意得意而忘言（注）在察也（註）
【以文害辭】（孟子萬章篇）故說詩者不以文害辭（注）不可以一字而害一句之義

宋蕩意諸

文公八年宋襄夫人殺昭公之黨司城蕩意諸來奔效節於府人而出十六年昭公無道國人奉公子鮑以因夫人夫人將使公田孟諸而殺之公知之盡以其寶賜左右而使行夫人使謂司城去公對曰臣之而逃其難若後君何冬宋昭公將田孟諸未至夫人使帥甸攻而殺之蕩意諸死之

待人欲寬論人欲盡論人者借人之短以攻我之短借人之失以攻我之失言主於自爲而非爲人也品題之高下所以驗我識之高下與奪之公私所以驗吾心之公私苟發於言者略而不盡則藏於心者必有昏而不明矣吾夫子譏賜之方人而自操春秋襄

此段是先
揚法

輕頓取局

貶之筆豈遽忘前語哉。待人與論人固自有體也。宋襄夫人之亂蕩意諸始則出奔終則致死。大浸稽天而砥柱不移。風雨如晦而雞鳴不已。凜然亂臣賊子之火閔也。當是時奔走於君夫人之宮者冠蓋相望。受施於公子鮑之室者肩袂相屬。至於安受昭公之賜。橐珍囊寶散而之四方者。又不知其幾人也。不追議此而惟意諸之是責。吾不知與逆徒何親。與公室何讎乎。與小人何厚。與君子何薄乎。讎公室而親逆徒。厚小人而薄君子。雖鄉黨自好者猶恥爲之。未有名學者而反不恥者也。然立論之際先則譽意諸之忠。後則責意諸之過。變譽爲責。夫豈得已哉。蓋將假意諸既往之過爲吾身將來之戒也。意諸效節之去。義當去也。意諸從田之死。

前半透迤
曲折寫來
方入責意
諸語

譽自譽責
自責了不
相借

又推原其
意剝入爲
誅心之論

義當死也。然意諸親則公族官則司城坐視昭公之失道。襄夫人
之蓄怒。公子鮑之陰謀。凶德參會待釁而發。上則不聞有正救之
諫。中則不聞有調護之功。下則不聞有擊斷之勇。見亂而始去。去
何晚也。見弑而始死。死何補也。想夫亂機之將兆。弑械之將成。通
國內外舉知之矣。曾謂意諸之賢獨不知耶。其所以徘徊濡滯不
能翻然高舉者。蓋懷其父去官則族無所庇之言。顧位苟祿日復
一日。其心以謂無難則忍恥以庇宗。有難則捐身以刷恥。以後之
節贖前之非。後世君子要必有哀吾之用心者。殊不知君子不忍
一日置其身於可愧之地。今日爲善尚恐他日爲惡。詎有身居可
愧之中。預指他日之節以贖前日之非乎。他日之節未至今日之

前既痛責
其罪至此
冷語愧之
收應前

非。方。萌。斯。時。也。斯。心。也。君。子。乎。小。人。乎。此。吾。所。以。爲。意。諸。懼。也。此。吾。所。以。不。爲。意。諸。懼。而。爲。吾。身。懼。也。

【評】

朱字綠曰。胡氏謂蕩意諸死職。春秋削之。不得班於孔父仇牧荀息者。三子閔其君而

見殺。春秋所取。意諸知國人將弑其君而不能止。知昭公之將見殺而不能止。坐待其及禍而死。所謂匹夫匹婦。自經於溝瀆者。東萊文約略本其意。○正救調護。擊斷三者俱無。徒一死塞責。說盡庸臣之態。又推到無難則忍恥以庇宗。有難則捐身以刷恥。言似深文。而切中情事。君子當愷然於是言。○方正學論豫讓大約本此。然讓猶欲爲主報讎。不克而死。較後世自經入井者爲更勝也。甲申之事。泥首賊庭者不足論。其賢者多以身殉國。錢泉論之曰。古之失天下者。不稱同死社稷之爲賢。蜚廉死商之亂。惡來哭紂之尸。皆不可以爲忠。長惡速亡。罪之大者也。春秋弑君三十六。死難者三。宋華督弑其君與夷而及孔父。宋萬弑其君捷而及仇牧。晉里克弑其君卓而及荀息。然皆死於賊。非自裁也。衛之石碯。號純臣。不死州吁。齊晏嬰稱賢相。不死崔杼。周召二公著績共和。不死流彘。人臣謀國之忠。豈徒賢於一死哉。三代而下。死社稷

者多有近代莫不稱文信國其入燕也三年而後死丞相博羅詰之曰爾立二王竟成何功知其不可何必強爲信國曰父母有疾雖不可爲無不下藥之理由是言之信國豈徒拱手以天下與人而第以身殉爲烈耶崇禎諸臣議論紛更使天子無終朝之令進人不必舉其忠良譽人則必張其朋黨政以賄成爵以賂冒此必不可移之志也及大事既去曰吾死已耳是社稷可墟國君可亡天下可拱手授賊所稱謀人之社稷謂何而徒以死自勵也其言與東萊相發明故附錄之使後人讀之知後之節不能贖前之罪庶不以蕩意諸自處而扶危定傾當早謀於未敗之先矣○張明德曰意諸死職律以大義意諸近之春秋削而不書正在知其禍之將及而不能早爲之計死亦何濟乎東萊歷觀往事知三代以下死社稷者往往以天下與人而第以身殉爲烈意諸大率類此文先寬其罪後誅其心譽自譽責自責各不相蒙說到以後之節贖前之非云云更覺愧死可見扶危定傾當預圖於早也

【音釋一】

①【襄夫人】周襄王姊

②【效節】節國之符信效猶致也

③【孟諸

宋澤名在今河南

④【帥甸】甸地之帥謂公邑之大夫也

【音釋二】

⑤【品題】謂評論人物（李白上韓荊州書）一經品題便作佳士 ⑥【

與奪】猶言譽毀。⑦【賜之方人】（論語憲問篇）子貢方人。子曰：賜也，賢乎哉！夫我則

不暇。（注）方，比也。比方人物而較其短長。⑧【褒貶】贊美曰褒，非刺曰貶。（春秋序）

春秋雖以一字爲褒貶，然皆須數句以成言。⑨【大浸稽天】（莊子逍遙遊）大浸稽天

而不溺。（注）大浸，大澤也。稽，至也。⑩【砥柱】山名，在黃河中。今人稱獨立不撓曰中流

砥柱。⑪【風雨如晦二句】見（詩）。⑫【大閑】閑防也。⑬【冠蓋】仕宦之服乘

也。（班固賦）冠蓋如雲。⑭【受施句】（左傳文公十六年）宋公子鮑禮於國人，宋饑

竭其粟而貸之，年自七十以上無不饋遺也。⑮【囊珍二句】謂昭公盡以其寶賜左右而

使行，無底曰囊，有底曰囊，皆以盛物。⑯【鄉黨自好】（孟子萬章篇）鄉黨自好者不爲

而謂賢者爲之乎。（注）自好，自愛其身之人也。⑰【司城】官名，卽司空。宋以武公名司

空，故廢司空爲司城。見（左傳桓公六年）。⑱【凶德參會二句】（左文）盜賊藏姦爲

凶德。（漢書韓安國傳）凶德參會，待時而發。（注）三人相遇曰參會，罅隙也。⑲【擊

斷】（史記仲尼弟子傳）擊斷子路之纓。⑳【弑械】（公羊傳莊公三十二年）俄而

牙弑械成，季子和藥而飲之。㉑【徘徊】流連往復也。㉒【濡滯】遲留也。㉓【高舉

牙弑械成，季子和藥而飲之。㉔【徘徊】流連往復也。㉕【濡滯】遲留也。㉖【高舉

猶言隱居亦遠行也。〔漢書〕今先生率然高舉遠集吳地。〔懷其父句〕意諸父公孫壽也。〔左傳文公十六年〕初司城蕩卒及孫壽辭司城請使意諸爲之既而告人曰君無道吾官近懼及焉棄官則族無所庇子身之貳也姑紆死焉雖亡子猶不亡族。〔刷恥〕〔漢書〕欲刷恥改行刷數刮切清也除也。

楚范山請圖北方

文公九年范山言於楚子曰晉君少不在諸侯北方可圖也楚子師於狼淵以伐鄭囚公子堅公子廙及樂耳。

直起作疑
情又是一
格

晉靈公即位之初其失德未有聞於人也內而變郤胥原日陪日侍傳不載其諷諫之辭外而宋衛陳鄭時聘時覲傳不載其怨誹之語彼范山者邈然介居方城漢水之間果何自而知靈公之可輕北方之可圖乎吾知其說矣以地以勢則近者詳而遠者略以

開論立案

近遠二字
是主意
鈴下馬走
近
農夫樵父
遠
有虛神更
有筆致

靈公不君
一段申蔽
字議論明
暢

層數蔽字
文情跌宕

情以理則近者蔽而遠者明。問官府之政於鈴下馬走甲是乙非。迄無定說。至於大山之隈。絕澗之曲。農夫樵父相與畫地而議。長吏之能否。若辨黑白。若數一二。彼豈嘗識刺史之屏。而望縣令之烏哉。蓋愛憎絕於耳目之前。毀譽公於郊野之外。近者之蔽固不。如遠者之明也。靈公不君。基於始而成於終。當其嗣服之初。雖無萌芽之可尋。豈無兆朕之可卜。舉世不知。而范山獨知之。豈山之智獨踰於衆人乎。亦有所蔽焉爾。變幸者。靈公恩賞之所及也。故蔽於愛而不知。卿大夫者。靈公政令之所及也。故蔽於尊而不知。列於齊盟者。靈公兵威之所及也。故蔽於畏而不知。惟范山立楚之朝食。楚之祿。非晉國恩賞政令兵威之所可及。故揆之趙盾。隨

結遠明近

又提不在一語發意

冷眼確論

詠歎作收寄意殊遠

會之諫反在於十年之先也。孰謂近者難掩而遠者易欺耶。吾嘗深味范山晉君不在諸侯之一語。深有感焉。晉主夏盟。自文至靈三君矣。靈公即位之始。其拊循諸侯。必未敢遽改先世之舊玉帛。瑞節猶文襄也。芻粟牲牢猶文襄也。物采辭令盟約要束猶文襄也。惟其心不在諸侯。故幣雖厚而人自見其薄。禮雖備而人自見其略。儀雖華而人自見其瘁。令雖嚴而人自見其慢。吁。范山其妙於觀國哉。

【評】

王鳳洲曰。東萊文字妙處在必究其原。○袁中郎曰。觀其雋秀處。直據歐蘇之上。○鍾

伯敬曰。構思深細。人服其論理。下筆疎宕。吾賞其多姿。○孫執升曰。逾古宕逸。唱歎有餘韻。而詞意丁整。俱經百鍊。近蔽遠明。尤為論事卓識。○朱字綠曰。近蔽遠明。說得可畏。詩所云鶴鳴于九臬。聲聞于天。殆謂是也。人君知此。則所以謹於言行。以待千里之應。違者不容忽矣。○晉

靈之立也。使解揚歸匡戚之田於衛。復致公壻池之封。自申至於虎牢之境。似能睦鄰矣。已而殺先克。先都。梁益耳。士穀箕。鄭父。國內大亂。故來范山之謀。東萊謂拊循諸侯。不減先世之舊。而歸之於近蔽。遠明。恐亦不盡當時情事。晉自文襄而後。被弑者靈厲二公。靈之失德。不甚著聞。然委政趙氏。未能自行一事。會盟征伐。弗復親行。而以熊蹯殺人。彈人於臺。而觀其避丸。其及禍有故。若厲則勤於諸侯。遠追文襄。後啓悼公。曹伯之執。歸於京師。爲伯討罪。視齊桓晉文。殆於近之。徒以多外嬖。除強族。身遭弑逆。死後猶被惡聲。吾友方靈皋力辯其誣。足以解千古之惑。其說甚詳。○張明德曰。近蔽遠明四字。根究其本源。精思卓論。以一唱三歎而出之。百鍊鋼亦遠指柔也。

【音釋一】

①【狼淵】鄭地。在今河南。

【音釋二】

①【欒郤胥原】皆晉大夫姓。

②【諷諫】以婉言隱語相勸諫也。（家語

）忠臣之諫君。有五義焉。吾其諷諫乎。

③【怨誹】（史記屈原傳）小雅怨誹而不亂。誹

非議也。

④【遵】音貌。入聲。渺小也。

⑤【方城漢水】（左傳僖公四年）楚國方城以

爲城。漢水以爲池。方城山也。

⑥【蔽】遮掩也。明之反。

⑦【鈴下】侍者之屬。（晉書羊

祜傳)鈴閣之下侍衛者不過數十人。⑨【馬走】(司馬遷報任少卿書)太史公牛馬走走猶僕也言爲人掌牛馬之僕。⑩【大山之隈】(管子)平原之隈奚有於高大山之隈奚有於深隈山曲處也。⑪【黑白二句】(荀子儒要篇)修百王之法若辨黑白應當時之變若數一二。⑫【刺史屏】(宋史蔡崇禮傳)嘗進唐太宗錄刺史姓名於屏風故事。⑬【縣令烏】(後漢書方術傳)王喬爲葉令每月湖望常自縣詣臺朝帝密令太史伺望之言其臨至輒有雙鳧飛來於是候鳧至舉羅張之但得一隻烏焉。⑭【嗣服】(詩下武篇)永言孝思昭哉嗣服。(注)嗣先王之事也。⑮【萌芽】猶言端緒。⑯【兆朕】吉凶形兆。⑰【齊盟】(左昭)瀆齊盟而食話言齊一也。⑱【趙盾隨會】(左傳宣公二年)晉靈公不君士季諫宣子驟諫皆不聽士季隨會字宣子趙盾諡。⑲【晉主夏盟】謂晉爲諸夏盟主。⑳【拊循】猶慰撫。(史記)問疾醫藥身自拊循之。㉑【玉帛】(左傳莊公二十四年)男贄大者玉帛。㉒【瑞節】瑞圭玉也節信也圭玉所以傳信故曰瑞節。㉓【芻粟】芻乾草粟梁米。㉔【牲牢】養之曰畜用之曰牲牢亦牲也。㉕【物采】文物采章。㉖【盟約】(周禮秋官)司盟掌盟約之載書。㉗【要束】(漢

書高帝紀）且吾所以軍瀾上待諸侯至而定東耳。○（易）觀國之光利用賓于王。

楚文無畏戮宋公僕

文公十年陳侯鄭伯會楚子于息冬遂及蔡侯次于厥貉將以伐宋乃逆楚子遂道以田孟諸宋公爲右孟鄭伯爲左孟文之無畏爲左司馬命夙駕載燧宋公違命無畏撲其僕以徇或謂子舟曰國君不可戮也子舟曰當官而行何彊之有敢愛死以亂其官乎宣公十四年楚子使申舟聘于齊曰無假道于宋亦使公子馮聘于晉不假道于鄭申舟以孟諸之役惡宋曰鄭昭宋聾晉使不害我則必死及宋宋人止之華元曰過我而不假道鄙我也鄙我亡也殺其使者必伐我伐我亦亡也亡一也乃殺之

名不可以幸取也天下之事固有外似而中實不然者幸其似而竊其名非不可以欺一時然他日人卽其似而求其真則情見實

吐無不立敗。名果可以幸取耶。然則受名之始，乃受責之始也。孟諸之役，文之無畏，席強楚之威，而窘辱宋公。本無足稱者。然宋公國雖弱，而位則君也。文之無畏，國雖強，而位則臣也。論其實則以楚加宋，以強凌弱，人之所甚易。論其迹則以卑犯尊，以弱擊強，人之所甚難。居甚易之地，而坐得至難之名，人情誰不樂此哉。此無畏之所以因其似而竊其名也。必嘗揮金發粟，然後人許以豪。必嘗赴敵突圍，然後人許其勇。今無畏挾六千里之楚，而折一與國之君，前無權勢之可懼，後無憂患之可虞，從容談笑，而冒不畏強禦之名，天下之所謂幸者，有過於此乎。想無畏正色莊語以答，或人之問，必謂名固可以幸取，人固可以名欺。雖吾君亦將以直道

夾正意

以不能倖
免後憂作
鎖以起下
虛名受禍

見期孰知吾之有所挾哉^{十五}。按衛侯之腕人知涉佗之直而不知其借晉之威也^{十六}。沒太子之車人知江充之直而不知其借漢之威也。戮宋公之僕人知無畏之直而不知其借楚之威也。無畏借楚之威以爲己名^{十七}。無毫末之勞而有邱山之譽。使如是而無後憂則誠不如詐直不如曲。君子不如小人矣。抑不知人既以直期之亦必以直使之。楚子異日遣使過宋而不假道置他人而推無畏豈不以直辭勁氣固可以橫身犯難^{十八}。而張強楚之大聲乎。無畏始知前日之虛名^{十九}。適所以招今日之實禍。惶惑而言曰。鄭昭宋聾晉使不害我則必死。哀憐至此向之直辭勁氣安在耶。始則曰敢愛死以亂官。今則曰我則必死。始一何壯。今一何怯耶。無事則爲不畏死。

收得有力
通篇意俱
歸束
餘文了前
挾字縝密
不漏

之。言。有。事。則。爲。畏。死。之。語。真。情。本。態。至。是。盡。露。矣。名。之。不。可。苟。得。
如。是。哉。自。古。以。來。挾。外。以。爲。重。者。失。其。所。挾。未。有。不。危。者。也。無。畏
之。所。挾。者。楚。耳。一。旦。身。出。方。城。之。外。宋。人。豈。懼。夫。楚。之。無。畏。哉。宜
其。甘。心。而。不。顧。也。吾。故。表。而。出。之。以。爲。挾。外。物。者。之。戒。

【評】

王聖俞曰：小人虛憍情狀，無不寫出。○朱字綠曰：形容申舟以幸得名，心滿意足，真有

左顧右盼之雄，跌下得名，卽所以受禍。其前壯後怯之狀，如在目中。筆筆靈快，宕往無前。○張
明德曰：始無畏之戮辱宋公，席強楚之勢，以威震天下，人以爲直詞勁氣，挺身犯難而不顧。及
楚子異日遣使過宋，而不假道，乃惶恐悚慄而言曰：鄭昭宋聾，晉使不害我，則必死。一人而前
後異詞，向之氣概何在也。形容得小人情態，前壯後怯，如在目前。彼天下之倖得名而不顧其
後者，三復斯文，通身汗下。至其文情之橫溢，筆致之跌宕，則又駕秦漢而上之。

【音釋】

①【厥貉】鄭地，在今河南。

②【孟諸】見前。

③【孟】田獵陳名。

④

【燧】取火者。⑤【扶】恥乙切。擊也。撻也。⑥【子舟】無畏字。⑦【申舟】即無畏。

【音釋】⑧【席】因也。⑨【發粟】（書武成）發鉅橋之粟。⑩【突圍】（元

稹詩）三陷思明三突圍。⑪【六千里之楚】（荀子仲尼篇）楚六千里而為讎人役。

⑫【與國】（孟子告子篇）我能為君約與國。（注）和好相與之國也。⑬【不畏強禦

】句見（詩）。⑭【莊語】（莊子天下篇）謂一世沈濁不可與莊語。⑮【援衛侯之

腕二句】見上衛侯遜位激民篇題注。⑯【沒太子之車二句】（漢書江充傳）充從上

幸甘泉。逢太子家使乘車馬行馳道中。充以屬吏上曰。人臣當如是矣。大見信用。威震京師。

⑰【毫末邱山】（莊子秋水篇）知毫末之為邱山。則差數觀矣。⑱【犯難】（易說卦

）說以犯難。民忘其死。⑲【虛名實禍】（蘇軾諫用兵篇）使陛下受此虛名。而忽於實

禍。

長狄

文公十一年冬十月甲午。敗狄于鹹。獲長狄僑如。富父終甥。搃其喉以戈。殺之。埋其首於子

駒之門。以命宣伯。初宋武公之世。鄭瞞伐宋。司徒皇父帥師禦之。彫班御皇父。充石公子穀甥爲右。司寇牛父駟乘。以敗狄于長邱。獲長狄緣斯。皇父之二子死焉。宋公于是以門賞彫班。使食其征。謂之彫門。晉之滅潞也。獲僑如之弟焚如。齊襄公之二年。鄭瞞伐齊。齊王子成父獲其弟榮如。埋其首於周首之北門。衛人獲其季弟簡如。鄭瞞由是遂亡。

造化無心
萬物一體
可參齊物

防風氏身橫九畝。不能免於會稽之誅。巨無霸身大十圍。不能免於昆陽之敗。久矣。形之不足恃也。造化一機。坯冶一陶。陰翕陽張。萬形並賦。遇川澤則黑而津。遇墳衍則皙而瘠。遇原隰則豐而庠。遇山林則毛而方。予其形者無愛憎。受其形者無恩怨。是故鷓鴣不以大自夸。蜩鷃不以小自慊。冥靈不以久自喜。螻蛄不以短自憂。私天地之形。以爲已有。固已得罪於鑪錘。况敢恃之爲暴耶。衣不勝而成霸。晉之功者。無所恃也。貌不稱而擅佐漢之謀者。無所

步步回顧
特字

形非累特
形則為累
故下段仍
發特字意

恃也。形不長而專伐蔡之勛者無所恃也。以是知無恃者存有恃者亡。尪羸么麼未必非福。魁梧壯偉未必非殃。有形不能使而反見使於形可不為大哀耶。長狄之種其軀幹絕異於人。是亦偶得一氣之偏者耳。自緣斯以來負其軀幹暴蔑上國。每出輒敗。種殲族殄。靡有子遺。豈非形為之累耶。東西南北自古及今其族類自若也。使長狄賦形與他處等。彼必安其氈毳。甘其湏酪。未必敢與上國抗衡。詎至此極耶。惟其偉岸自伐。故飛揚跋扈。塊視秦華。埴視城郭。蟻視甲兵。兄踣於前而不悛。弟仆於後而不止。挫愈奮。敗愈張。非覆宗絕祀。蕩無炊火。未有晏然而不為害者也。貌虎之猛。形實驅之。犬馬之馴。形實束之。長狄族類豈皆好為暴哉。一受其

平論

聖凡不以形限

收不測

聖凡亦不以地限

形雖欲已而不能自己也。心卅七為君則形為臣。形為君則心為臣卅九。同是貌也。仲尼聖而陽貨狂。同是目也。大舜仁而項羽暴。賦其形者非有異。特制其形者不同耳。小心翼翼卅四。徽柔懿恭。忘其十尺之高者。是亦西夷之人也。議者勿謂狄無人。

【評】

焦弱侯曰：似子非子，別饒雋永之味。○朱字綠曰：說形不可恃，引物連類，抑揚反覆，足以發昏惑之意，而懲狂暴之心。○徐偃王目可瞻耳，仲尼面如蒙，周公身如斷菑，皋陶色如剖瓜，閔天狀無見膚，傳說身如植繡，伊尹面無須，糜禹跳湯，偏堯舜參牟子，聖賢之形不同，唐人取士以身言書判定制於此數人，當何以取之耶。○張明德曰：開首引會稽昆陽二事，已將題之大意道破，後擒定一形字，長引曲喻，言形不足累，特形乃足累，中間更透發特字無一意不確，無一字不爽，後又說到聖凡不以形限，不以地限，此又眼空一世，具此大手筆，方有此大文章。

文章

【音釋一】

①【長狄】鄭瞞國防風之後，漆姓。

②【鹹】魯地。

③【僑如】鄭瞞國。

君長三丈。④【椿】音春，猶衝也。⑤【子駒】魯郭門。⑥【周首】齊邑。

【音釋二】

⑦【防風氏二句】春秋時吳伐越，獲骨節專車，以問仲尼。仲尼曰：昔禹致羣

神於會稽之山，防風氏後至，禹殺而戮之，其骨專車。見《國語》。骨節專載一車，言其大也。防風，古國名，今浙江武康縣。《穀梁傳》：文公十一年，叔孫得臣敗狄於鹹，長狄也，射其目，身橫九畝，斷其首而載之，眉見於軾。⑧【巨無霸二句】《後漢書》：光武帝紀，初王莽徵天下

能爲兵法者六十三家，並以爲軍吏。時有長人巨無霸，長一丈六寸，圍以爲壘尉。《又》：昆陽之戰，光武乃與敢死者三千人，衝其中堅，尋邑陣亂，遂殺王尋，城中亦鼓譟而出，中外合勢，震呼動天地。莽兵大潰，走者相騰踐，奔殪百餘里間。⑨【造化】天地也。⑩【坏冶一陶】

句見《後漢書》。坏，鋪隈切，亦作坏陶，瓦未燒者。冶，鎔鑄也。陶，俗亦作窰。⑪【翕】音吸，合也。⑫【遇川澤四句】《周禮》：地官大司徒以土會之法，辨五地之物生。山林毛而方，川

澤黑而津，墳衍皙而瘠，原隰豐而庫，津潤也。水涯曰墳，下平曰衍，皙，白也。瘠，臞也。廣平曰原，下濕曰隰。豐，厚也。庫，音婢，短也。⑬【鷓鴣】鷓鴣當作鯤，大魚。鷓，大鳥，以喻至大之物。《莊子》：

北溟有魚，其名爲鯨，鯨之大，不知其幾千里也。化而爲鳥，其名爲鷖。⑭【蜩鷖】蜩，見上，鷖

小鳥也。⑤【冥靈】龜也。《莊子逍遙遊》楚之南有冥靈者以五百歲爲春五百歲爲秋。

⑥【螻蛄】蟬屬。《莊子》螻蛄不知春秋。⑦【鑪錘】猶言陶鑄。《劉峻文》雕刻百

工鑪錘萬物。⑧【衣不勝句】《禮檀弓》文子其中退然如不勝衣。文子晉大夫趙武佐

文公成霸業。⑨【貌不稱句】《蘇軾留侯論》太史公疑子房以爲魁梧奇偉而其狀貌

乃如婦人女子不稱其志氣。留侯卽張子房漢高功臣稱去聲。⑩【形不長句】裴度自爲

像贊曰爾形不長爾貌不揚胡爲相。胡爲將。《通鑑》唐憲宗元和十二年以同平章事裴度

兼彰武節度使充淮西宣慰招討使討吳元濟。冬十一月李愬夜襲蔡州擒元濟檻送京師。十

二月賜度晉國公復入知政事。⑪【尫羸】尫見上羸弱也。⑫【幺麼】細小也。⑬【

魁梧壯偉】皆壯大貌。⑭【軀幹】猶言身體。⑮【緣斯】見題注。⑯【殲殄】皆見

前。⑰【靡有子遺】句見《詩》。⑱【氈毳】見前。⑲【湏酪】馬牛乳汁。《史記句

奴傳》得漢食物者去之以示不如湏酪之便美也。⑳【抗衡】謂相敵不相下也。㉑【

偉岸】壯大之貌。㉒【自伐】猶言自誇。㉓【跋扈泰華】皆見前。㉔【覆宗絕嗣】

句見《書》。㉕【炊火】《漢書》近狎作亂內外俱發趙氏無炊火焉謂無人烟也。㉖

【貔虎】皆猛獸名。貔音毳。①【心爲君】（荀子）心者形之君也。②【同是貌也二句】（史記孔子世家）孔子狀類陽貨。③【同是目也二句】（史記項羽本紀）太史公曰吾聞之周生曰舜目蓋重瞳子。又聞項羽亦重瞳子。羽豈其苗裔耶。何興之暴也。④【小心翼翼】句見（詩）。⑤【徽柔懿恭】句見（書）。⑥【十尺】（孟子告子篇）交聞文王十尺。⑦【西夷】（孟子離婁篇）文王西夷之人也。

周公閱王孫蘇訟于晉

文公十四年春。頃王崩。周公閱與王孫蘇爭政。周公將與王孫蘇訟于晉。王叛王孫蘇而使尹氏與聃啓訟周公子于晉。趙宣子平王室而復之。

昔者文王聽虞芮之訟。而商道始衰。聽訟非文王之心也。文王不與虞芮期。而虞芮自至。故議者以二國之嚮背。筮商周之興亡也。舜避朱。禹避均。未嘗不視獄訟之所歸。以爲決。虞芮之訟。爭田近。

捨朝歌而遠趨豐鎬。彼紂雖倔强於酒池肉林間。直寄坐焉爾。吾嘗持是以觀後世隆替之由。權在則昌。權去則亡。未有失權而國不隨亡者也。周道既降。孱王踵繼。不能主方夏之柄。儕於列國。至匡王之世。則殆甚焉。周公大臣也。王孫蘇、卿士也。二臣有訟不之王而之晉。君天下者。尙將照臨萬國。大彰淑慝。外薄海隅。咸得其職。今至不能尸階。阼之訟。則國之置王。將何用乎。虞芮介然遠國。其質成於周。議者尙爲商危之向。若飛廉惡來。內相忿競。棄紂而卽文紂。雖無道亦未必能堪也。匡王怡然坐視。不惟不駭。反使人於晉。助所厚者之訟。惴惴然恐其不伸。巍然被袞。號稱天子。顧乃企足矯首待晉之予奪。以爲輕重。何其衰也。是周之危過於商而

推勘精確

快論

匡王之無恥甚於紂也。周之頹敝甚於商季。何爲當亡而不亡。晉侯之小心不及文王。何爲可取而不取。蓋嘗思其故矣。紂之季年。雖三分失其二。然威令尙行。境內凶虐尙能及人。故民不堪其暴。而共亡之。晚周之微門內小訟。猶不得專。雖欲淫侈。誰聽其培克。雖欲凶酷。誰受其指令。其起其仆。近不係斯民之休戚。遠不係諸侯之強弱。晉雖陽尊。貌敬。不過以邾莒遇之耳。何嫌何疑。而遽欲墟之哉。故周非不亡。無可亡也。晉非不取。不足取也。大抵能害人者。必能利人。能殺人者。必能生人。紂雖下愚不移。然操柄猶未盡失。使其移比干之戮於崇侯。移崇侯之寵於比干。朝散鹿臺之財。暮發鉅橋之粟。烏知其不祈天永命。編名於六七君之列乎。至於

匡王。枵然。建空名於六服之上。禮樂政刑舉不在己。雖欲自奪其道。何由是將。償之商。猶有起復之望。未墜之周。已如既隕之時也。
左支廢。右支緩。奄奄餘息。繇百世而閱千齡。樂乎哉。周過其歷之。
言吾斯之未能信。

【評】

朱字綠曰。王臣左右之訟。王不能自決。而取平於晉。因生出虞芮質成。始終以商周對。

勘到底。中說到商紂。猶能自操其柄。周匡則已早委其權。奇確無比。具此識見。故能自成快論。
○商有權而周無權。是已然。謂晉非不取無足取者。亦不盡然。周自建國以後。雖有穆之盤游。昭之不復。厲之流彘。幽之舉烽。平之東遷。數經大故而國祚無改者。當時天子原無私天下之意。故當時諸侯亦本無取天下之心。五霸迭興。七雄競出。而齊威王。秦孝公。猶行朝禮。先王之教。所以浹洽而流衍者。愈久而愈未嘗忘也。是則天下言朝周者有之矣。言取周者有之乎。其不取也。非畏而不敢取也。非愛而不忍取也。非重而不能取也。非薄而不屑取也。蓋從無萌取。

之之念者勢雖不振猶如家衆之於長嫡相依爲生而已若云不足取而棄之竊意畿內之地猶多於陽樊溫原櫟茅之田何前貪而後廉哉○張明德曰王臣左右之訟不能取決于王而下訟于晉天子僅一守府徒擁空名何益也引虞芮質成一事借商周爲對證見得紂雖無道已極猶能操天子之柄以轉移天下周已早委其權此千古確證快論天開有膽有識讀此等文而不善生發者必爲聾瞶先生謂周不足取當是指周天子禮樂刑政之大權舉不在己故言不足取耳確在大處落墨議者以爲畿內之地猶多於陽樊溫原櫟茅之田若謂不足取而棄之晉非廉者斯言也仍不失爲世俗之見未可以測先生之卓識也愚謂晉果以畿內之地爲意則朝王請隧之時何不轉而爲請田隧虛名也田實惠也不請田而請隧可見晉雖雜霸亦嘗以禮樂刑政爲重也重在禮樂刑政而禮樂刑政之權已下落矣尙何足取之有前貪後廉云乎哉書此以待高明定論

【音釋】

①【虞芮】見前

②【嚮背】猶言從違

③【舜避朱三旬】（孟子萬章篇

）堯崩舜避堯之子於南河之南天下諸侯訟獄者不之堯之子而之舜（又）舜崩禹避舜

之子於陽城。天下之民從之。若堯崩之後。不從堯之子而從舜也。宋堯子丹朱。舜子商均。

④【朝歌】紂都。今河南淇縣。⑤【豐鎬】周舊都。詳前。⑥【酒池肉林】商紂以酒爲池。懸肉爲林。使男女僕相逐其間。爲長夜之飲。見《史記殷本紀》。⑦【屏王】《史記張

耳傳》。吾王屏王也。屏。鋤閑切。弱也。⑧【方夏】四方中夏。謂中國也。《書武成》。誕膺天

命。以撫方夏。⑨【匡王】名班。頃王子。後平王八世。⑩【淑慝】猶言善惡。《書畢命》。

旌別淑慝。⑪【外薄海隅】《書益稷謨》。外薄四海。薄。音博。逼近之義。⑫【尸】主也。

⑬【階阼】阼。音士。砌也。⑭【飛廉惡來】皆商紂臣。飛。亦作蜚。《史記》。蜚廉生惡來。

惡來有力。蜚廉善走。父子俱以材力事紂。⑮【被袞】《禮郊特牲》。祭之日。王被袞。以象

天袞。天子服也。⑯【三分失其二】《論語泰伯篇》。三分天下有其二。以服事殷。周之德。

其可謂至德也已矣。⑰【培克】《孟子告子篇》。培克在位。《注》。聚斂也。⑱【墟】

故城也。謂滅亡其國。而其城爲墟也。⑲【下愚不移】《論語陽貨篇》。惟上知與下愚不

移。⑳【比干】《論語微子篇》。比干諫而死。比干。紂諸父。㉑【崇侯】崇。商末國名。崇

侯。虎助。紂爲惡。爲周所滅。㉒【散鹿臺之財二句】見《書武成》。㉓【祈天永命】《

書召誥。用供王能祈天永命。⑤【六七君】（孟子公孫丑篇）由湯至於武丁賢聖之君六七作。⑥【楞然】虛大貌。楞音嵩。⑦【六服】（書周官）六服羣辟罔不承德。注。侯甸男邦采衛并畿內爲六服。⑧【自奪】猶言自主。定其去取曰奪。⑨【憤】覆敗也。⑩【支】通肢。⑪【奄奄餘息】氣息僅續也。⑫【周過其歷】（漢書諸侯王表）周過其歷。秦不及期。國勢然也。⑬【吾斯之未能信】句見（論語）。

狼曠死秦師

文公二年春甲子。晉侯及秦師戰于彭衙。秦師敗績。晉人謂秦拜賜之師。戰於殺也。晉梁弘御戎。萊駒爲右。戰之明日。晉襄公縛秦囚。使萊駒以戈斬之。囚呼萊駒失戈。狼曠取戈以斬囚。禽之以從公乘。遂以爲右。箕之役。先軫黜之。而立續簡伯。狼曠怒其友曰。盍死之。曠曰。吾未獲死所。其友曰。吾與女爲難。曠曰。周志有之。勇則害上。不登於明堂。死而不義。非勇也。其用之謂勇。吾以勇求右。無勇而黜。亦其所也。謂上不我知。黜而宜。乃知我矣。子姑待之。及彭衙。旣陳。以其屬馳秦師死焉。晉師從之。大敗秦師。君子謂狼曠於是乎君子。

將狼暉先
許一番筆
情深遠

四語斷定

點出主意

對症藥石

狼暉之死。左氏之所譽也。然暉^五烈士也。回犯上之氣。而爲徇國之
勇。雖非中節^七。要非常人之所能望也。以暉之烈。豈僕僕乞憐^九而求
人之恕者耶。暉雖往矣。吾想其心。必願受人之責。而不願受人之
譽也。請得而備責之。人心當知所止^十。非可出其位也。惟各止其位。
故冉有之用矛。不爲讎齊。顏回之後至。不爲懼匡^{十四}。曾子之避寇。不
爲畏越。子思之守國。不爲厚衛。皆止其所止而已矣。狼暉前日爲
右死敵。可也。既不爲右。固可以止。今乃無職而侵。在職者之憂。輕
進而死於敵。則是心不止於事。而思出其位矣。雖所成之功。壯偉
勁厲。外爲人之所譽。而一心之間。實忿懟^{十五}怨恨之所集也。當暉赴
敵之時。忿懟怨恨。交衝競進。含毒而沒。雖得千百年之虛譽。豈救

即不出位
意

其心之擾哉。我實清淵人。以我爲汙渠。於我何損。我實邱垤人。以我爲華岱。於我何加。君子當觀其在我者。何如爾人之毀譽。何有焉。九原可作。吾意狼曠樂聞吾之言。未必不過於左氏之譽也。

【評】

王鳳洲曰。將責狼曠。先許其烈。文字紆徐容與。而意亦新奇。○孫執升曰。責狼曠無苛

詞。意實嚴謹。○責吾者。愛吾者也。譽吾者。寬吾者也。願受責。不願受譽。亦是規責之語。○朱字綠曰。前日爲右。死敵可也。旣不爲右。固可以止。四語鐵案如山。○狼曠不肯爲難。而死敵以明勇。卒以致命。遂志。獲彭衙之勝。故左氏以君子予之。竊謂曠於此時。雖不爲右。亦有師旅之責。與顏回之爲弟子。曾子之爲師。不同。縱未免以憤亡軀。然於人臣事君之道。未爲失也。恐左氏之說不可盡非。○張明德曰。君子盡其在我。不以人之虛譽爲榮。始不愧於生。不愧於死。狼曠之死。死非其時。篇中不死于右。而反死于不在位之時。一語破的。有論古之識。方可以爲傳世文章。至其短兵相接。尺幅中有千尋之勢。此與可畫竹也。○東萊先生責狼曠詞。並不苛。而論者以爲曠於此時。雖不爲右。亦有師旅之責。縱未免以憤忘軀。然尙不失人臣事君之道。噫。臣

之於君。果可以逞憤爲事耶。幸而晉師無恙。大勝而回。倘其不幸。因之而敗。不亦憤君國之大事乎。規責之語。似未可少也。

【音釋一】

①【譚】音審。

②【彭衙】晉地。在今陝西。

③【禽】同擒。

④【周志

二句】見《汲冢周書》。

【音釋二】

⑤【烈士】《史記伯夷傳》。貪夫徇財。烈士徇名。

⑥【徇國】《中論》。

奉君忘身。徇國忘家。

⑦【中節】《禮中庸》。發而皆中節。謂之和。中去聲。

⑧【僕僕】

《孟子注》。頽猥貌。

⑨【乞憐】乞人憐惜也。

⑩【知所止】《禮大學》。於止知其所

止。⑪【出其位】《易艮卦》。君子思不出其位。

⑫【冉有用矛二句】《左傳哀公十

三年》。冉有用矛於齊師。故能入其軍。孔子曰。義也。

⑬【顏回後至二句】《論語先進篇》。

子畏於匡。顏淵後。

⑭【曾子避寇四句】曾子居武城。有越寇。寇至則先去。寇退則反。子

思居於衛。有齊寇。或曰寇至。盍去諸。子思曰。如彼去。君誰與守。見《孟子離婁篇》。

⑮【對

度內切。怨也。

⑯【清淵】深水也。《莊子山木篇》。觀於濁水。而迷於清淵。

⑰【汙渠

【濁水也。水所居曰渠。

⑱【邱垤華岱】《潘尼乘輿頌序》。譬猶邱垤之望華岱。土高曰

邱垤蟻封也。西岳華山東岳曰岱。〔九原可作〕（禮檀弓）趙文子與叔譽觀乎九原。文子曰：死者如可作也，吾誰與歸？晉卿大夫之墓地在九原，後世遂以九原爲墓之總稱。

楚人滅江

文公四年楚人滅江。秦伯爲之降服，出次不舉，過數大夫諫，公曰：同盟滅，雖不能救，敢不矜乎？吾自懼也。君子曰：詩云：惟彼二國，其政不獲，惟此四國，爰究爰度。其秦穆之謂矣。

兩喻確切

天下之可懼者，惟出乎利害之外，乃能知之。風濤浩蕩，舟中之人不知懼；而舟外之人爲之懼。酣醉怒罵，席上之人不知懼；而席外之人爲之懼。身遊乎吉凶禍福之塗，心戰乎搶攘爭奪之境，未有知懼之爲懼者也。春秋之世，王澤既竭，反道敗德，亂倫悖理，不可概舉。至如滅國之禍，尤所謂慘烈而可懼者。國於天地，有與立焉。封殖於唐虞，長育於夏商，溉灌潤澤於文武，成康之際，廟陳四代。

之鼎彝府藏不世之典籍朝有世臣野有世農肆有世工市有世
賈雖十八叢爾小國不知幾人之力幾日之功扶持保衛而至於斯也
一旦忽爲強暴之所凌滅繫其君而俘其臣墟其宮而遷其社刊
其木而堙其井此豈小故也哉而當時之君視之恬然此無他惟
處於危亂之中而不知懼之可懼也秦穆公於江之滅獨怵然戒
惕然悟避朝貶食不勝其憂非出於危亂之外豈能深見可懼之
真者乎穆公信能推此懼心而充之視天下之諸侯國一滅則心
一警心一警則政一新固可離危亡之門而得治安之基矣豈止
西戎之霸耶廿五

【評】

孫月峯曰典雅似國語○楊升菴曰正論說得凜凜畏人○孫執升曰戰國相殘滅秦

有吞併之志。其視利害爲切矣。然列國之君處堂宴然。乃見秦穆之憂深慮遠。謂伯業之基在此一懼亦可。○朱字綠曰。事內不知懼。事外知懼。亦是近蔽遠明之意。中間鋪揚立國一段。生氣勃然。○張明德曰。懼不于近而于遠。此亦近蔽遠明之意。東萊擒題。有斬關直入之勢。不作鋪張套話。中間立國一段。尤得主宰。

【音釋一】

①【降服】素服。

②【出次】辟正寢。

③【不舉】去盛饌。

④【過數

】鄰國之禮有數。今秦伯過之。

【音釋二】

⑤【濤】大波也。

⑥【酣醉】樂而醉也。

⑦【搶攘】紛亂貌。《漢書》

國制搶攘。

⑧【王澤竭】

《班固兩都賦序》昔成康沒而頌聲寢。王澤竭而詩不作。

⑨

【反道敗德】句見《書》。

⑩【亂倫】《論語陽貨篇》欲潔其身而亂大倫。倫。序也。

⑪【悖理】《孝經》不敬其親而敬他人者。謂之悖理。悖。逆也。

⑫【國於天地二句】見

《左傳》。

⑬【封殖】

《宋史謝深甫傳》栽培封殖。勿使沮傷。

⑭【潤澤】《孟子滕

文公篇》若夫潤澤之。則在君與子矣。

⑮【四代】虞夏商周。

⑯【鼎彝】鐘鼎皆稱彝。

《宋史》功銘鼎彝。義章典策。

⑰【典籍】即圖籍。

《左傳昭公二十六年》王子朝奉周

之典籍以奔楚。⑤【裊爾】小貌（左傳）裊爾國。⑥【俘其臣】（李密陳情表）今

臣亡國賤俘。⑦【墟】見前。⑧【遷其社】（書序）湯既勝夏欲遷其社不可作夏社。

⑨【刊其木堙其井】（左傳襄公二十五年）常陳隧者井堙木刊堙音因塞也刊古干

切除也。⑩【恍然惕然】皆恐懼貌。⑪【貶食】謂減損其食也（左傳僖公二十一年

）貶食省用。⑫【西戎之霸】（左傳文公三年）秦伯伐晉遂霸西戎。

陽處父

文公五年晉陽處父聘于衛反過甯甯嬴從之及溫而還其妻問之嬴曰以剛商書曰沈漸
剛克高明柔克夫子壹之其不沒乎天爲剛德猶不干時况在人乎且華而不實怨之所聚
也犯而聚怨不可以定身余懼不獲其利而離其難是以去之。

至書無悅人之淺效而有化人之深功至樂無娛人之近音而有
感人之餘韻凡天下之理不能窺於未得味之前必不能捨於既

反照乍喜
乍感起

淺關照
筆致疎越

得味之後也。昔夫子設教於洙泗之間，子貢初見，挾其智而傲之。子路初見，挾其勇而陵之。以夫子之聖，猶不能動物悟人於一日之速也。彼陽處父何人耶？甯嬴一遇諸途，躡屣擔簦，從之如不及。其移人之速，若過於夫子矣。然夫子雖不能服由，賜於一見而能役由，賜於終身。陽處父雖能致甯嬴於一朝，而不能留甯嬴於數日。孰優孰劣，必有能辨之者矣。嘗考甯嬴之言，然後知處父所以易使人喜，易使人厭者，抑有由也。蓋處父之剛，盡發之於外，而中無所留，溢於聲音，浮於笑貌，形於步趨。平生神氣發露無餘，外雖震厲，而中無所畜。外雖暢茂，而中無所根。其始見也，其美易見。其德易親，所以易使人喜也。其既見也，索之易窮，探之易盡，所以易

使人厭也。發之爲春華。曾不能斂之爲秋實。玩虛華而忘實味。是豈爲腹而不爲目者所肯留哉。此甯羸所以乍喜乍厭而不辭往來之煩也。

【評】 茅鹿門曰：起處便覺雋永有味。○孫執升曰：盡發於外而中無所留。處父之剛尤淺。淺者不深貶之。更何足與孔子相較論。○朱字綠曰：不令人喜亦不令人厭。道之所以大也。乍令人喜乍令人厭。德之所以喪也。雖未能大有發明而立意深遠。非淺人所能到。○張明德曰：天下事之忽然而感者。其入人必不深而待人必不久也。處父之剛盡發于外而中無留餘。望之可喜。轉盼則使人厭矣。引夫子一段說得聖人且猶不能感人于立談之頃。况尋常萬萬乎。發之爲春華。曾不能斂之爲秋實。此見道語。非東萊不能道。

【音釋一】 ①【甯】晉邑。在今河南。 ②【羸】逆旅大夫。 ③【商書二句】見《書洪範》。

【音釋二】 ④【洙泗】二水名。孔子所居（禮檀弓）吾與女事夫子於洙泗之間。 ⑤

【子貢子路】子貢姓端木名賜子路姓仲名由皆孔子弟子 ⑥【躡屨擔簿】（史記）

虞卿躡屨擔簿草履簿長柄笠如今之繖 ⑦【移人】（班固東都賦）移人之速也

⑧【役由賜】（淮南子人間訓）或問孔子曰子貢何人也曰辨人也丘弗如也子路何人

也曰勇人也丘弗如也賓曰賢而為夫子役何也孔子曰丘能辨且訥勇且怯易丘一道丘弗

為也 ⑨【步趨】（莊子）夫子步亦步夫子趨亦趨 ⑩【震厲】震烈嚴厲 ⑪【春

華秋實】（三國魏志）曹植家丞邢顛無所屈撓庶子劉楨美文辭植親楨而疏顛楨諫曰

君侯採庶子之春華忘家丞之秋實 ⑫【為腹不為目】（老子）聖人為腹不為目故去

彼而取此（注）腹內也目外也聖人務內不務外 ⑬【乍】猶忽也

宋華耦辭宴

文公十五年三月宋華耦來盟其官皆從之書曰宋司馬華孫貴之也公與之宴辭曰君之

先臣督得罪于宋殤公名在諸侯之策臣承其祀其敢辱君請承命於亞旅魯人以為敏

君子之立言待天下甚尊期天下甚重識雖在一世之先而心嘗

先立左氏
罪案

見不可薄
待魯

先跌明法
妙

點左氏一
語作定案

處。一。世。之。後。非。自。託。於。謙。退。也。降。衷。在。天。秉。彝。在。民。凡。具。耳。目。口。
鼻。號。爲。人。者。罔。不。備。參。贊。化。育。之。神。經。緯。幽。明。之。用。吾。其。敢。以。淺。
心。隘。量。大。棄。之。於。罷。冗。無。能。之。地。乎。左。氏。世。傳。以。爲。魯。史。則。魯。其。
父。母。之。邦。也。其。載。華。耦。來。聘。無。故。揚。其。先。人。之。惡。以。辭。宴。乃。繫。之。
曰。魯。人。以。爲。敏。左。氏。之。意。豈。不。以。耦。之。辭。令。魯。人。之。所。誇。而。非。君。
子。之。所。貴。乎。耦。之。言。少。知。禮。義。者。皆。知。賤。之。雖。當。時。二。三。浮。薄。輩。
妄。相。矜。銜。然。曲阜。龜。蒙。七。百。里。之。封。寧。無。一。人。知。其。非。者。今。概。稱。
魯。人。以。爲。敏。果。哉。左。氏。之。論。也。概。稱。魯。人。以。爲。敏。是。謂。魯。空。國。無。
君。子。抑。不。思。所。謂。魯。人。者。誰。非。爾。之。僚。友。乎。誰。非。爾。之。姻。戚。乎。誰。
非。爾。之。師。長。乎。一。出。言。而。盡。置。於。庸。鄙。之。域。倨。傲。暴。慢。之。氣。勃。然。

言魯本多君子左氏偏與聖人之言相反

又設一難將人字生出許多辨論排擊不稍借

可掬歸之以不孫不弟之名吾意左氏不能解也昔吾夫子亦嘗稱魯矣曰魯無君子斯焉取斯是夫子一言而待魯為君子左氏一言而待魯為小人人之心之不同如是哉或謂左氏之言魯人特蚩蚩之流耳至於閔達博雅之君子敢名之以魯人哉曰閔達博雅之君子其才雖出人千百等然履魯地啜魯泉食魯粟豈不名之以魯人乎一為君子而背鄉閭蔑名教不以魯人自命是外父兄而恥與同類也夫豈君子之所敢安哉吾益見左氏之誤也

【評】

邱瓊山曰深得排擊之體○孫執升曰責華耦祇一二語通篇就左氏魯人以為敏一

句反覆攻擊其非左氏之罪定則華耦自不得從輕是文字避實擊虛法是譏人責備賢者法○朱字綠曰世之巧詆者可以知警○張明德曰左氏一言關係魯庭多少名節耦揚其罪而魯人以為敏誠千古罪案提此一語左擊右攻令左氏無詞以對而華耦之失言不辨自明矣

【音釋一】 ①【督】（左傳隱公二年）宋華父督弑宋殤公。 ②【亞旅】上大夫也。

【音釋二】 ③【立言】（左傳襄公二十四年）太上有立德其次有立功其次有立言。

④【降衷】天之賦質本無偏也見（書）。 ⑤【秉彝】（詩蒸民篇）民之秉彝（注

）彝常也言民所秉執之常性也。 ⑥【參贊化育】（禮中庸）可以贊天地之化育則可

以與天地參矣。 ⑦【經緯】凡物之有秩序而整齊者曰經緯（左傳）禮上下之紀天地

之經緯也。 ⑧【隘】狹窄。 ⑨【罷宄】無能貌罷古疲字宄乳勇切。 ⑩【魯史】魯之

史官（史通鑿識篇）邱明躬爲魯史受經仲尼。 ⑪【無故句】（左文魯人以爲敏注）

無故揚其先祖之罪是不敏魯人以爲敏明君子所不與也。 ⑫【矜衒】衒音縣

亦矜也。 ⑬【曲阜句】（禮明堂位）成王以周公爲有勳勞於天下是以封周公於曲阜

地方七百里曲阜魯之都龜蒙二山名（詩魯頌）奄有龜蒙。 ⑭【果】決也。 ⑮【僚友

】同官爲僚同志爲友。 ⑯【姻戚】（後漢書鄧皇后紀）宗門廣大姻戚不少疏遠之親

串或因緣而及者曰姻戚親也。 ⑰【倨傲】驕慢不遜也（莊子）夫子猶有倨傲之容

⑱【暴慢】（論語泰伯篇）動容貌斯遠暴慢矣暴粗厲也慢放肆也。 ⑲【可掬】情見

於外若可掬取也。(杜子春傳)饑寒之容可掬。⑤【不孫不弟】(論語憲問篇)幼而

不孫弟。⑥【魯無君子二句】見(論語)。⑦【人心之不同】(左傳襄公三十一年

)人心之不同如其面焉。⑧【蚩蚩】無知貌(詩)氓之蚩蚩蚩音癡。⑨【閔達】(

班固東都賦)大雅閔達。⑩【魯泉】沂水在魯城南。地志以為有溫泉焉。故論語曰浴乎

沂。⑪【鄉閭】萬二千五百家為鄉。五家為比。五比為閭。

季文子出莒僕

文公十八年公薨。襄仲殺太子惡及視而立宣公。○莒紀公生太子僕。又生季佗。愛季佗而

黜僕。僕因國人以弑紀公。以其寶玉來奔。納諸宣公。公命與之邑。曰。今日必授季文子使司

寇出諸境。曰。今日必達。公問其故。季文子使大史克對曰。先大夫臧文仲。教行父事君之禮。

行父奉以周旋。弗敢失隊。曰。見有禮於其君者。事之。如孝子之養父母也。見無禮於其君者。

誅之。如鷹鷂之逐鳥雀也。

魯道衰而權移于季氏。議者徒見其專權之禍。而不見其竊權之

一句已定

平列
立三字作
案以入文
子之罪

此段言文
子之險且
誦

由吾讀左氏書。至季文子出莒僕之事。然後知季氏竊權之始。蓋
在此也。權君之所司也。人臣豈能一旦徒手而奪之哉。必有隙焉。
然後能乘之。必有名焉。然後能假之。必有術焉。然後能攘之。宣公
篡立。大臣未附。國人未信。其權未有所屬。此千載一時之大隙也。
故因莒僕之事。借其名。闕其術。默收一國之權於掌中。而人不悟。
甚矣文子之險且誦也。莒僕弑君竊寶。宣公不惟納之。而又欲封
之。是固羣臣之所當爭也。文子託去惡之名。改君命而使司寇斥
僕於境外。以嘗試宣公意。以謂君苟怒我耶。則我固可自附於忠。
憤愛君之徒。君苟聽我耶。則魯之大柄自是歸我矣。退不失譽。進
不失權。君有從違。我無增損。其自爲計。乃如此。自古之盜權者。皆

摘其妄言
以罪之

只此二句
定主意

而忘其實。吾請摘其妄以示之。克首稱先大夫臧文仲。教行父事君之禮。行父奉以周旋。弗敢失墜。見無禮於其君者。誅之。如鷹鷂之逐鳥雀也。嗚呼。行父尚記文仲之教乎。前日襄仲之難。嗣子受弑。無禮於其君者。孰大於是。行父乃恬若不見者。文仲之教何在。也不鷹鷂於襄仲。而鷹鷂於莒僕。可憐哉。克之謬妄甚衆。姑發其一。以告學者。使無惑焉。

【評】

袁中郎曰。古今姦臣竊權。莫不奉此爲妙術。卽過求文子。而伯恭胸中筆下。固凜凜自

具一春秋矣。○朱字綠曰。行父黨于襄仲。身事叛亂。而不能稍有異同。其罪難道。然執此以罪文子。則文境平常。不能生色。特取其不納叛人一節立論。謂其陰奪君權。明示臣節。名實兼收。而人止覺其直。不覺其惡。便令境界迴別。然後從史克語中斷出不鷹鷂於襄仲。而鷹鷂於莒僕。勢如轉石千仞之谿。萬壑皆震。如此可得文家布置之法。○不納叛人。弼君以正。此自是大

臣之事。但他人行之。則爲以道事君。文子行之。則爲盜君之柄。以其原與鷹鷂同黨耳。○張明德曰。誅姦雄之心。千百世後。存爲定案。向非東萊卓識。不能斷決。文生于情。此春秋快筆。總之出宮僕一事。在他人行之。則爲以道事君。自文子行之。則爲盜君之柄。明眼人不肯絲毫讓過。

【音釋一】

①【行父】季文子名。②【隊】同墜。③【鷹鷂】皆鷲鳥。鷂音氈。

【音釋二】

④【攘】有因而盜曰攘。⑤【千載一時】言時會之難遇也。⑥【閔】

祕藏之意。

⑦【誦】音決。欺詐也。⑧【竊寶】（國語魯語）宮僕殺紀公里革曰竊寶

者爲軌。用軌之財者爲姦。

⑨【斥】猶逐也。⑩【覲】音冀。希冀也。⑪【謬】謂直

言也。（後漢書）謬之操。華首彌固。

⑫【眩】惑也。亂也。⑬【死諸葛句】（漢晉春

秋）諸葛亮卒於郭氏塢。楊儀等整軍而出。宣王追焉。姜維令儀反旗鳴鼓。宣王乃退。不敢逼

百姓爲之諺曰。死諸葛走生仲達。宣王曰。吾能料生。不能料死也。宣王司馬懿也。懿字仲達。

⑭【死姚崇句】（世說新語補）姚崇張說同爲宰輔。崇病。戒諸子曰。張丞相與吾夙隙甚

深。吾沒後。來弔汝。具陳吾寶帶重器。羅列帳前。張若顧此。當盡致之。仍以神道碑爲請。旣得其

文。登時錄進。崇沒。張果至。目其服玩者三四。崇家悉如崇戒。不數日文成。時謂極筆。數日遣使

取本欲加刪改。姚氏諸子引使者視其碑，已刻成，仍告以奏御，使者復命。張悔恨撫膺曰：「死姚崇能算生張說，吾今日方知才之不及遠矣。」說音悅。⑤【其類句】見前。⑥【擗闔】鬼谷子有擗闔篇。擗闔者，以變動陰陽四時，闔閉以化萬物。⑦【箝制】（易林）執囚束繫，箝制於吏箝。奇炎切。夾持也。⑧【咀華】（韓愈進學解）含英咀華。

宋昭公子武氏族

文公十六年，宋人弑其君杵臼。君無道也。十八年，宋武氏之族道昭公子將奉司城須以作亂。宋公毅母弟須及昭公子，遂出武穆之族。宣公三年，武穆之族以曹師伐宋。

是非善惡之辯。至於子孫而後定。宋昭公之無道。其子孫豈有措足之地哉。武氏道昭公子爲亂。雖不克成。然搖民心。蕩國勢。凡三四年而後已。使宋人果憾昭公。安能至此。彼昭公又何以得此於民哉。君天也。民之於君。固有不可解於心者。昭公雖無道。然嘗託

在君位矣。君民之間。蓋有不膠漆而自固者。前日之怨。豈民之本
心哉。^五鈇焉。鉞焉。則怨。桁焉。桷焉。則怨。斲焉。遊焉。則怨。臺焉。囿焉。則
怨。至於身沒之後。鈇。鉞。弊。桁。桷。朽。斲。遊。弛。臺。圯。荒。前日之怨。窅然
空然。墮於渺茫。不見蹤迹。冰泮則水流。塵盡則鑑徹。雲散則日明。
怨去則思來。斯民始怵惕。悽慘追惟。^{十三}疇昔君臣之義。見其遺。嗣。惻
怛興。憐。故。姦。宄。乘之。猶足疑誤。羣聽此真民之本心哉。惜乎怨在
身前。思在身後。昭公親當今日之怨。而不及待後日之思。此所以
履危亡而莫救歟。抑不知民心本未嘗忘昭公。特奪於殘虐。不暇
思爾。使昭公奮發悔悟。改前之爲。則民將移其身後之思於身前。
向之鴟鴞。^{十四}皆鸞鳳也。向之董葛。^{十五}皆參朮也。向之礎鑽。^{十七}皆几席也。向

之讎敵。皆姻婭也。遷善之門。翻手可闢。適治之路。舉足可登。乃延頸待斃。自謂無策。愚矣哉。

【評】王濟之曰。從本心揭出君民一體。悽然欲哭。可補性善註疏。○朱字綠曰。揭出民之本心四字。爲一篇張本。說得可歌可泣。尤妙。怨去則思來一句。作通篇筋脈。文無定見。何敢道隻字。

【音釋一】 ①【杵臼】宋昭公名。宋人弑之。立其弟鮑。

【音釋二】 ②【措足】（聞見錄）措足於平穩之地。則不跌。措置也。 ③【君天也】

（左傳宣公四年）君天也。天可逃乎。 ④【不膠漆句】（春秋繁露）以德爲國者。固於膠漆。

⑤【鉄鉞】見前。 ⑥【桁櫓】（莊子在宥篇）甚矣。吾未知聖知之不爲桁楊接櫓也。桁音杭。足械也。櫓。席入切。枷中橫木。

⑦【改遊】（書五子之歌）乃盤遊無度。改於有洛之表。改音田。取禽獸也。

⑧【囿】（初學記）有藩曰園。有牆曰囿。 ⑨【省】音杏。深也。

⑩【冰泮】（詩匏葉篇）迨冰未泮。泮散也。 ⑪【鑑徹】鑑鏡也。徹明也。 ⑫【疇

昔】（禮檀弓）疇昔之夜。（注）疇發語聲。⑤【姦宄】（書君陳）狃于姦宄在外曰姦在內曰宄音軌。⑥【鴟鵂鸞鳳】（後漢書劉陶傳）公卿所舉率黨其私所謂放鴟鵂而囚鸞鳳。⑦【葛藟】（淮南子說林訓）蝮蛇螫人傅以和董則愈。（注）和董野葛毒草。⑧【參朮】（唐書元澹傳）參朮芝桂以防疾疢。⑨【碁鑽】見前。⑩【姻婭】（詩節南山篇）瑣瑣姻婭。（注）壻之父曰姻兩壻相謂曰亞婭亞同。⑪【翻手】（杜甫詩）翻手作雲覆手雨。⑫【適治之路】（漢書董仲舒傳）道也者所由適於治之路也。

宋華元羊斟

宣公二年鄭伐宋華元禦之宋師敗績囚華元將戰華元殺羊食士其御羊斟不與及戰曰疇昔之羊子爲政今日之事我爲政與入鄭師故敗華元逃歸見叔牂曰子之馬然也對曰非馬也其人也。

厚薄二字一篇樞紐
每於人情世故通達
天下之情固有厚之而薄薄之而厚者不可不察也子弟與鄉人皆在席觴酒豆肉必先鄉人而後子弟豈人固厚於疎而薄於親

便成妙文

疏明首二
語清空圓
透

一片用情
至公只見
其厚不見
其薄

乎蓋疎則相責親則相恕其待鄉人物至而情不至所謂厚之而
薄者也其待子弟物不至而情至所謂薄之而厚者也凡人情相
與至於無間則用之不擇置之不愠予之不辭奪之不怨曠然相
期於形骸之外夫豈以薄物細故而遽爲向背哉華元殺羊食士
而其御羊斟不與人皆以爲待羊斟之薄吾獨以爲待羊斟之厚
焉元之意豈不以斟爲吾御幾年矣左執鞭右奉轡且則偕出暮
則偕入險夷寒暑升降馳驟無不與吾俱相悉已久相信已熟今
日饗士吾肘腋同體之人豈計一杯羹爲輕重姑及疎者遠者可
也羊雖不及然親厚之意固已踰百牢而豐五鼎矣斟不知享其
意而徒欲享其食忿戾勃興驅車趨敵投華元於死地元待之以

推開一步
責以大義
讀之可恨

此段就上
意再翻入
一層深斷
華元之非
薄

又以待羊
斟生論雙
貶斟酌

三層亦不
失其厚

掉下一句
便有千句
萬句

君子之心。斟報之以小人之行。非特負元。乃負國也。議者或謂元御下寡恩。以起羊斟之怒。吾觀元之為人。樂易慈祥之氣。溫然可挹。其免於囚虜而歸。再與斟遇。猶慰解^{十五}。勞若恐傷其意者。彼尙能恕羊斟於既爲變之後。豈不能撫羊斟於未交兵之前哉。此吾所以論元之待斟。蓋厚而非薄也。然元亦不能無罪焉。日與斟周旋。不知其肺腑。猶以君子待之一罪也。簞食豆羹。見於色之人。乃與共載。二罪也。情意未孚。而遽忘彼我。以示無間。三罪也。明不足以燭^{十七}姦。誠不足以動物。何適而不逢禍哉。惜乎華元有君子之資。而未嘗學也。

【評】

孫月峯曰。掉轉最靈。○王鳳洲曰。立意溫厚。吐辭侃侃。○朱字綠曰。享羊不及。而以爲

厚翻案之文。卻說得人情曲至。○季孫不納叛人。而以爲竊權。是於好處看出他不好。華元不享羊斟。而以爲親厚。是於無情處看出他有情。都從生平爲人處下斷案。所以奇而確。○張明德曰。享羊不及。亦尋常事。卒以此受敗。文于至情中。推勘元非薄于斟。大義凜然。真是絕處逢生。

【音釋一】

①【叔牂】卽羊斟。

【音釋二】

②【觴酒豆肉】（禮坊記）觴酒豆肉讓而受惡。民猶犯齒。③【先鄉人

】（孟子告子篇）酌則誰先。曰先酌鄉人。④【擇】移籍切。悅也。⑤【不愠】（論語

學而篇）人不知而不愠。（注）愠。含怒意。⑥【形骸之外】（王羲之蘭亭序）放浪形

骸之外。⑦【薄物細故】（漢書匈奴傳）孝文遺書曰。薄物細故。謀臣計失。皆不足以離

昆弟之歡。⑧【左執鞭】（左傳僖公二十三年）其左執鞭弭。右屬囊鍵。以與君周旋。

⑨【轡】馬繮。⑩【肘腋】喻至近之地。（晉書）寇發心腹。害起肘腋。⑪【同體之人

】（史記黥布傳）此三人者。同功一體之人也。⑫【一杯羹】（史記項羽紀）吾翁卽

若翁。若欲烹而翁。則幸分我一杯羹。⑬【百牢】（左傳哀公七年）吳來徵百牢。牛羊豕

具爲一牢。⑤【五鼎】漢主父偃曰大丈夫生不五鼎食死當五鼎烹。⑥【勉勞】勸勉慰勞也。勞去聲。⑦【簞食句】見（孟子）。⑧【燭姦】如燭之照物而明知其人也。

楚鬪椒

宣公二年夏晉趙盾救焦遂自陰地及諸侯之師侵鄭以報大棘之役楚鬪椒救鄭曰能欲諸侯而惡其難乎遂次於鄭以待晉師趙盾曰彼宗競於楚殆將斃矣姑益其疾乃去之

禍之所伏
使人惕然
知戒

物以順至者必以逆觀天下之禍不生於逆而生於順劍楯戈戟未必能敗敵而金繒玉帛每足以滅人之國霜雪霾霧未必能生疾而聲色畋游每足以殞人之軀久矣夫順之生禍也物方順吾意而吾又以順觀之則見其吉而不見其凶溺心縱欲蓋有陷於死亡而不悟者矣至於拔足紛華寓目昭曠彼以順至我以逆觀停筯於大食之時覆觴於劇飲之際惟天下之至明者能之鬪椒

知幾妙法

順逆是一
篇主意故
步步轉顧

此段言趙
盾之謀原
非難察彼
自不能深
觀設喻帶
諧

言當深察
接下曷觀
一段

汰侈於楚。帥師救鄭。晉趙盾乃退師示怯。以順適其意。而益其疾。^{十五}
椒謂趙盾真畏己者。憑恃其強。肆爲悖逆。親集矢於其君之車。以^{十六}
覆其宗。盾投之以順。而椒不觀之。以逆。殆非盾之能誤椒。蓋椒之^{十七}
不能察盾也。然盾之爲謀於難察之中。猶有可察者焉。豪奴悍婢。^{十八}
冥頑很戾。闔室之人畏避之。出而詈市人。則必奮臂與之鬪。蓋其^{十九}
威行於家。而不行於市。此殆易曉也。椒之跋扈。不過能使楚人畏^{二十}
之爾。一出楚境。則相視如道路人。何爲遽下之哉。况以堂堂之晉。^{廿一}
一旦相遇。卷旆改轅。未戰而卻。逡巡若有懼者。此理之不當然也。^{廿二}
理不當然。而然其必有所以然矣。椒於此曷不深致其觀乎。謂晉^{廿三}
封略不如楚。則否。謂晉謀臣不如楚。則否。謂晉兵甲不如楚。則否。^{廿四}
封略不如楚。則否。謂晉謀臣不如楚。則否。謂晉兵甲不如楚。則否。^{廿五}

方明說順
之為禍只
二語

此段設一
難端言盾
雖納鬪椒
於禍椒自
養惡不必然
遇盾而然

椒苟為善
又知做懼
將禍為懼
福適以爲
成善所以
深責其不
能逆觀愈
轉愈深愈

反覆推考莫知其端是殆廿六養我而納之於禍也牛羊犬豕醉於豢廿七
 養身日臍而死日近椒亦人耳乃坐受讎敵之豢養自赴刀几亦
 愚矣向使不遇趙盾豈至此極乎曰意在於善凡所遇者皆養吾
 善之物也意在於惡凡所遇者皆養吾惡之物也豈必遇一趙盾
 哉一雨露也梧櫝得之以養其柯廿九條荆棘得之以養其芒卅一刺造物
 者曷嘗有心厚梧櫝之材而稔荆棘之毒歟成其自養而未有養
 之者也椒苟意於善則盾雖示弱而養其惡未必不逆觀其詐悚
 然做懼而啓改過之門矣盾本將以養其惡椒反資以養其善殆
 惟恐遇盾之不蚤也

【評】

朱字綠曰意在於善所遇皆養善之物意在於惡所遇皆養惡之物此是一篇主意而

借以逆觀順作波瀾。迤邐而來。神注於此。否則人有美意以順我。而概逆觀之。是逆詐僣不信。又豈所以待物乎。○張明德曰。趙盾之謀。原非難察。彼椒自不能觀其微。故遇盾而爲盾所制。順至逆觀二意。發揮自是透關。且善爲鬪椒地步。空中結撰。真拏雲手段。○順至逆觀。乃千古不易之定論。故遇順卽以爲順者。無不立見其敗也。若謂人有美意以順我。而概以逆觀之。是逆詐僣不信。非所以待物。此舍去博議中察之一字。而自爲其說。并不知有不逆不僣而能先覺者也。且全部博議。大半以反己爲主。重在己而不重在人。逆詐僣不信。固爲君子所不取。然爲人乎。抑爲己乎。爲己則人有美意以順我。當思我果有所以致順之道在先否。逆僣云乎哉。徒舍己以徇人。似非東萊先生立論之本意也。

【音釋一】

①【焦】晉邑。

②【陰地】晉地。

③【大棘】宋地。

④【彼宗競於楚

】競強也。鬪椒若敖之族。自子文以來。世爲令尹。故云。

【音釋二】

⑤【劍楯戈戟】皆兵器。

⑥【金縢】猶言金帛。縢帛也。古謂之帛。漢謂之

縉。今泛稱爲縢。

⑦【玉帛】（左昭）禹合諸侯於塗山。執玉帛者萬國。

⑧【蠶】音埋。

大風揚塵土也。（詩）終風且蠶。

⑨【拔足】（班彪王命論）拔足洗塵。

⑩【寓目】

屬目而觀也。(左傳)得臣與寓目焉。⑤【昭曠】空明之意。(謝靈運山居賦)山野昭曠。⑥【筵】逐豫切同箸。⑦【覆觴】(晉書元帝紀)帝渡江以酒廢事命引觴覆之以是遂絕。⑧【劇飲】猶言痛飲。(唐書陽城傳)城與二弟延賓客日夜劇飲。⑨【汰侈】奢侈過分也。⑩【集矢二句】(左傳宣公四年)若敖氏之族攻王伯棼敗王汰軒鼓而進之遂滅若敖氏伯棼卽鬪椒若敖鬪氏(書五子之歌)覆宗絕嗣。⑪【豪奴悍婢】(蘇洵權書第九篇)獨計以爲家有主母而豪奴悍婢不敢與弱子抗。⑫【冥頑很戾】俱見前。⑬【詈】音荔罵也旁及曰詈。⑭【跋扈】見前。⑮【堂堂】盛大之貌。⑯【卷旆】(杜甫詩)風高卷旆旌。⑰【改轅】(左傳宣公十二年)改乘轅而北之。⑱【逡巡】見前。⑲【封略】卽封疆。⑳【端】頭緒。㉑【豢】音宦穀食也。㉒【膾】音突肥也。(左桓)吾牲牲肥膾。㉓【梧櫞】皆美材。(孟子告子篇)舍其梧櫞養其楓棘則爲賤場師焉。㉔【柯條】草木枝莖。㉕【芒刺】漢宣帝見霍光若有芒刺在背見(漢書)。㉖【造物】天也。㉗【稔】音衽熟也亦積久也。(柳宗元文)向使紂惡未稔而自斃。㉘【逆觀其詐】(論語憲問篇)不逆詐(注)逆未至而迎之也詐。

謂人欺己。

楚子問鼎

宣公三年。楚子伐陸渾之戎。遂至于雒。觀兵于周疆。定王使王孫滿勞楚子。楚子問鼎之大。小輕重焉。對曰。在德不在鼎。昔夏之方有德也。遠方圖物。貢金九牧。鑄鼎象物。百物而爲之。備使民知神姦。故民入川澤山林。不逢不若。螭魅罔兩。莫能逢之。用能協于上下。以承天休。桀有昏德。鼎遷于商。載祀六百。商紂暴虐。鼎遷于周。德之休明。雖小重也。其姦回昏亂。雖大輕也。天祚明德。有所底止。成王定鼎于郊。鄩卜世三十。卜年七百。天所命也。周德雖衰。天命未改。鼎之輕重。未可問也。

起語雄渾
慷慨

一夫而抗強敵。一言而排大難。此衆人之所喜而識者之所憂也。楚爲封豕長蛇。薦食上國。陳師鞠旅。觀兵周郊。問九鼎之輕重。其勢岌岌若岱華嵩岳。將覆而未壓。王孫滿獨善爲說辭。引天援神。

鍊句雋甚

此揚其卻
楚之功
他日二字
一篇皆從
此發揮
此下說可
憂立兩柱
後面字
照應

此段言周
室本弱又
玩於宴安
不能傲懼
覆亡反饒
倖於口舌
王孫滿為
禍之始

折其狂僭。使楚人卷甲韜戈。逡巡自卻。文昭武穆。鐘簴不移。瀟水
雒都。城闕靡改。其再造周室之功。實在社稷。是固衆人之所同喜
也。夫何憂憂之云者。非憂其一時之功也。喜在今日。而憂在他日
也。天下之禍。不可狃而幸。不可恃。問鼎大變也。國幾亡而祀幾絕。
王孫滿持辨口以禦之。所以楚子退聽者。亦幸焉耳。周人遂以為
強楚之凶。燄如是。尚畏吾文告。而不敢前。異日復有跳梁畿甸者。
政煩一辯士足矣。是狃寇難為常。而其以三寸舌為可恃也。由東
遷以來。周之君臣。上恬下嬉。奄奄略無立志。身不見驪彘之釁。口
不誦板蕩之詩。玩於宴安。寢以媮惰。君子猶意儻遇禍變。庶幾傲
懼改前之為。今三代所傳之大寶。乃敢睥睨蕩搖。欲以腥羶汗漫

十八
十九
二十
二十一
二十二
二十三
二十四
二十五
二十六
二十七

下一開字
便見滿貽
禍無窮發
明憂在他
日意

之。侈。然。有。改。玉。改。步。之。意。禍。變。孰。大。於。此。使。王。公。卿。士。怵。惕。祇。畏。
懷。覆。亡。之。虞。則。后。稷。公。劉。之。業。猶。有。望。也。適。王。孫。滿。之。說。偶。行。其。
君。臣。相。與。高。枕。遂。謂。吾。舌。尚。存。寇。至。何。畏。狃。其。禍。而。恃。其。幸。開。之。
者。非。滿。歟。自。是。之。後。相。襲。成。風。問。其。治。國。則。先。文。華。而。後。德。政。問。
其。禦。寇。則。先。辨。說。而。後。甲。兵。問。其。用。人。則。先。威。儀。而。後。行。實。問。其。
撫。邦。則。先。酬。對。而。後。信。義。內。觀。其。實。日。薄。日。頹。外。觀。其。辭。日。新。日。
巧。典。冊。絢。麗。尚。如。在。文。武。成。康。之。世。而。形。勢。陵。夷。固。已。若。夏。桀。商。
紂。之。朝。矣。下。逮。戰。國。吞。噬。之。際。猶。用。滿。之。餘。策。虛。張。九。九。八。十。一。
萬。之。數。以。譎。齊。左。欺。右。給。自。矜。得。計。一。旦。秦。兵。東。出。辨。不。能。屈。說。
不。能。下。緩。頰。長。喙。噤。無。所。施。稽。首。歸。罪。甘。爲。俘。虜。始。知。浮。語。虛。詞。

以案作結

果。有。時。而。不。可。恃。也。晚。矣。哉。故。吾。嘗。謂。王。孫。滿。卻。楚。之。功。不。足。償。其。怠。周。之。罪。

【評】

王聖俞曰。曲盡周家弱景。可發一慨。○邱瓊山曰。初讀疑迂疑刻。不近人情。然徐繹之。

則真儒治國規模。已悠然言外矣。○朱字綠曰。喜在今日。憂在異日。禍不可狃。幸不可恃。祇此四語。盤旋到底。數百年大勢。約之方幅間。瞭然如見。○周以文治。亦以文弱。襄王之時。禮樂征伐。不自天子出。其來已久。所爲朝覲獄訟命討之具。舉不可恃。舍文告。亦更無他法。可以退楚。雖王靈不可復振。然猶恃此繇繇延延。歷數百年而後亡。則勿謂文治不如武功也。○戰國策。秦興師以求九鼎。周君患之。顏率以九鼎市於齊。齊師來救。秦師退。齊人求九鼎。周君又患之。顏率赴齊。言九鼎輓者須九萬人。九九八十一萬人。乃能致于齊。齊人乃止。吾友李子固曰。顏率之說。正所謂較量輕重大小。其詐僞之術。得罪于王孫滿甚矣。東萊乃相提而論。不亦誣乎。王孫滿方幼。而卽能決秦師之敗。其折楚子數言。煌煌大義。可與誥誓並傳。故能折其强悍。而使之自退。若欲先甲兵而後辨說。則稽首歸命。不俟赧王而早已見于春秋之世矣。○南宋之

季聲容盛而武備衰。故東萊有激而爲是言。然元世祖之初。實欲通好。此正先文告後甲兵之時也。乃聘問之禮不行。而徒拘留其使。卒致用爲口實。與伯顏之師。而宗社以亡矣。君子傷之。是故宋之於金。患其不能戰。而于元。又患其不能和。○張明德曰。起語雄渾。如轉石千仞之谿。萬壑皆震。中間言周室東遷之後。國勢旣弱。又玩于宴安。爲滿者不能警懼覆亡。而僥倖于口舌之間。以啓他日無窮之禍。真不朽名論。觀結處王孫卻楚之功。不足償息周之罪。屹如山岳。凜若風霜。卽令起滿于九泉。亦不得不爲心折。

【音釋一】

①【陸渾】見前。②【雒】水名在河南。③【遠方圖物】圖畫山川奇

異之物而獻之。

④【貢金九牧】使九州之牧貢金。⑤【若】順也。⑥【螭魅罔兩】

螭山神獸形魅怪物罔兩水神。⑦【郟鄩】在今河南。

【音釋二】

⑧【排大難】（史記魯仲連傳）所貴於天下士者爲人排患難解紛亂而

無取也。⑨【封豕長蛇二句】（左傳定公四年）申包胥如秦乞師曰吳爲封豕長蛇以

荐食上國封大也薦同荐數也。⑩【陳師鞠旅】句見（詩）鞠告也。⑪【岌岌】危也。

⑫【岱華嵩岳】五岳嵩爲中岳東岱西華。⑬【卷甲韜戈】卷收也韜藏也。⑭【遂

巡見前。⑤【文昭武穆】文武文王武王也。宗廟之次左爲昭右爲穆。⑥【鐘簷】簷音巨懸鐘磬之架其兩旁所立之柱曰簷。⑦【瀘水】在河南（書洛誥）我又卜瀘水東亦惟洛食。⑧【雒都】周公相成王營洛邑爲東都以朝諸侯雒同洛今河南洛陽縣。⑨【城闕】闕城上門觀也亦以稱天子所居。⑩【再造】猶再生（唐書）國家再造卿力也。⑪【狃】音紐習慣之義。⑫【文告】猶言示諭（國語）有文告之辭。⑬【跳梁】叛亂之稱（漢書）今羌一隅小夷跳梁於山谷間。⑭【畿甸】見前。⑮【三寸舌】（史記平原君傳）毛先生以三寸之舌強於百萬之師。⑯【東遷】見前。⑰【上恬下嬉】（唐書鄭餘慶傳）禍亂已平上恬下嬉施施自得恬嬉猶言安樂。⑱【奄奄】氣息僅續也（李密文）氣息奄奄。⑲【驪嶽】（史記周本紀）犬戎攻幽王遂殺於驪山下（又）厲王三年民乃相與爲叛厲王出奔於彘共和十四年王死於彘驪山在古雍州今陝西彘管地。⑳【板蕩】譏亂世也詩大雅有板蕩二篇皆言厲王之無道。㉑【寢】音浸謂漸漬而不驟也。㉒【媮】同偷。㉓【大寶】鼎也。㉔【睥睨】音媮詣斜視也。㉕【汗漫】穢汗不修潔也。㉖【改玉改步】句見（國語）佩玉行步君臣不同。㉗【后稷】

公劉俱見前。【高枕】言可以安臥無憂也。（國策）三窟已就，君姑高枕爲樂矣。

【吾舌】張儀被掠笞，釋之，謂其妻曰：「視吾舌尚在否？」其妻笑曰：「舌在也。」儀曰：「足矣。」

【故事曰典策簡也】。【絢麗】文采華麗。絢，許院切。【陵夷】（漢書成帝紀）

帝王之道，日以陵夷。陵，夷平也。言其頽替如丘陵之漸平也。【虛張】（韓愈文）

虛張聲勢。【九九句】（戰國策周策）齊將求九鼎，顏率謂齊王曰：「昔周之伐殷也，

得九鼎，凡一鼎而九萬人輓之，九九八十一萬人，乃能致於齊，齊人乃止。【給】徒亥切，

欺也。【緩頰】徐言譬喻也。【長喙】（唐書）說事則喙長三尺，喙讀若諱，緩也。

楚箴尹克黃

宣公四年秋七月戊戌，楚子與若敖氏戰于臯濟，伯棼射王汰，^三及鼓跗著于丁寧，^四又射汰

轉以貫笠，^六師懼退。王使巡師曰：「吾先君文王克息，獲三矢焉，伯棼竊其二，盡于是矣。」鼓而

進，遂滅若敖氏。初，若敖娶於邲，生鬬伯比，若敖卒，從其母畜於邲，淫於邲子之女，生子文焉。

邲夫人使奔諸夢中，虎乳之。邲子田見之，懼而歸，夫人以告，遂使收之。楚人謂乳穀，謂虎於

菟故命之曰鬪穀於菟以其女妻伯比實為令尹子文其孫箴尹克黃使於齊還及宋聞亂其人曰不可以入矣箴尹曰弃君之命獨誰受之君天也天可逃乎遂歸復命而自拘於司敗王思子文之治楚國也曰子文無後何以勸善使復其所改命曰生

先說謀利計功吾儒不可少虛虛冒起文情紆緩

便伏謀利計功意

數語表明箴尹之為人一篇之意已見

正其義不謀其利明其道不計其功此吾儒之本指也自謀利計功之說行雖古人之事峻厲卓絕表表然出於常情俗慮之外者莫不以是心量之其為害豈淺鮮哉楚之滅若敖氏也箴尹克黃實其餘裔適出使於齊幸而漏網是宜委質諸侯以逃其死策無先於此者矣箴尹獨以君命為重明知死地而直赴之非審知義命一視生死者豈能之乎謀利計功者猶曰死地乃生地也犯死以復君命君必以為輕其死而重吾命殆將赦之以勸事君是陽

因其言而
知其心

此段提生
死二字折
功利之言
箴尹非懼
死倖宥其
心最明無
死不損二
意加高一
層

結出楚宥
箴尹乃爲

以死結君而陰取生之利也。嗚呼！是說也。乃謀利計功者之心。初
非箴尹之心也。箴尹之言曰：棄君之命，獨誰受之？君天也，天可逃
乎？由其言以觀其心，明粹端直，固可對越在天而無愧。使有一毫
^{十八}覬倖之心，^{十九}間之則心聲所發，必有不可掩者矣。箴尹知有君而不
知有己，知就義而不知就生，雖不免於司敗之戮，必以死得其所。
爲幸，固瞑目而無憾也。豈預期楚子之宥哉？死與不死在箴尹本
無加損，向若借箴尹一身之死，以塞萬世謀利計功者之口，身雖
沒而道則彰矣。今適會楚子之寬宥，箴尹之心有如白水，固不待
辨彼紛紛謀利計功之徒，以己度箴尹者，殆深可憐也。吾嘗深求
其故矣。楚子之宥箴尹也，非嘉其復命也。蓋思子文之治楚也，箴

子文破前
陽以死結
陰以取利
意

尹之宥繫於爲子文之後不繫於復命也然則箴尹之歸死豈求生之計耶吾故發之以折謀利計功者之說

【評】

唐荆川曰原箴尹之心何等公平坦易固知他篇之深文苛辭特誅小人於漏網也○

王鳳洲曰心聲不可掩一語大得觀人之法○朱字綠曰正大精深之文○張明德曰從正誼明道虛虛引入文情紆徐不迫中間數語表明箴尹之爲人已定一篇大旨生死二字非所計也末復結出楚宥箴尹乃爲子文破前陽以死結陰以取生意東萊深爲謀利計功者下一鍼砭

【音釋一】

①【箴尹】楚官名 ②【皐澣】楚地 ③【汰輶】汰過也輶車之輶謂

箭過車轅上

④【鼓附】懸鼓之柱附音孚 ⑤【丁寧】古樂器形如小鐘軍中用之以

節鼓卽鉦也以其做人故曰丁寧

⑥【笠轂】兵車使人執蓋依轂而立謂之笠轂所以蔽

穀禦矢

⑦【邳】音云或作鄆國名在今湖南 ⑧【穀】奴口切 ⑨【於菟】音烏徒

【音釋二】

⑩【正其義二句】見《漢書董仲舒傳》 ⑪【峻厲】峻刻嚴厲 ⑫【

表表」明也。⑤【餘裔】留遺之後人也。⑥【漏網】喻有罪幸脫。⑦【委質】（左

僖二十三年）策名委質。質，通贄。所執以見上者。⑧【赦之句】見左成。晉卻克語。⑨【

對越在天】句見（詩）對配也。越，於也。⑩【覲倖】希望僥倖也。覲，音冀。⑪【心聲】

（揚子法言）言心聲也。⑫【司敗】古刑官名（左傳注）陳楚名司寇爲司敗。⑬【

瞑目】閉目也。喻人死無所繫戀（後漢書）甘心瞑目。⑭【有如白水】（左傳僖公二

十四年）所不與舅氏同心者有如白水。

荀林父伯宗

宣公六年，赤狄伐晉，圍懷及邢邱。晉侯欲伐之。中行桓子曰：「使疾其民以盈其貫，將可殪也。」

十五年，潞子嬰兒之夫人，晉景公之姊也。酆舒爲政而殺之，又傷潞子之目。晉侯將伐之，諸

大夫皆曰：「不可。」酆舒有三僞才，不如待後之人。伯宗曰：「必伐之，狄有五罪，僞才雖多，何補焉？」

陪客作起

世未有事非而心是者。譽共驩者必非信。朋跖躄者必非廉。入許
史者必非正。屠袁劉者必非忠。見其事則其心固不問而可知也。

兩是也擊
出心非二
字策是心非
點睛

前既明說
心非又用
嗚呼是誠
何心句感
慨嘆息冷
語直刺衷
曲聖賢立
引聖賢立
論斷其心
非論斷其心

事非心是。理所無有。抑天下有事。是而心非者乎。曰有。赤狄伐晉。圍懷之際。勢方強也。晉侯欲犯其疆。荀林父欲待其衰。林父之策。是也。赤狄、鄆舒殺伯姬之際。惡已暴也。晉大夫欲縱其暴。伯宗欲討其罪。伯宗之策。是也。人觀其前。莫不非晉侯。而是荀林父。人觀其後。莫不非晉大夫。而是伯宗。孰知二子策。雖是而心則非乎。圍懷之役。林父堅忍以待其衰。是固理之正也。至於所以設謀者。則曰使疾其民。以盈其貫。將可殪也。嗚呼。是誠何心哉。鄆舒之事。伯宗奮厲欲討其罪。是亦理之正也。至於所以設謀者。則曰後之人。或者將敬奉德義。以事神人。而申固其命。若之何待之。嗚呼。是誠何心哉。聞君子成人之美矣。未聞成人之惡也。聞君子懼人之亂。

此與論關
椒相似言
一非則無
所不非

餘意引證

矣。未聞懼人之治也。今林父則養人之惡。惟恐其不盈。伯宗則幸人之亂。惟恐其或改。處心積慮。可謂忍矣。此吾所謂事是而心非者也。論者安可信其事。而略其心哉。人苟心不在於善。凡所遇之事。曲固曲也。直亦曲也。邪固邪也。正亦邪也。董仲舒公孫弘同以春秋而事武帝者。也。劉向谷永同以諫諍而正成帝者。也。然世皆內仲舒而外弘。右向而左永。何耶。弘之春秋人所以羞道之者。心累其書也。永之諫疏。人所以喜攻之者。心累其言也。井辱秣陵泉貪交廣。果誰爲之累者。井耶。泉耶。人耶。

【評】

王鳳洲曰。兩著嗚呼。兩束是誠何心。感慨歎息中。揭出聖賢正派。以事是心非立論。詞

旨甚嚴。末以風韻結之。更覺機趣橫溢。○林父伯宗用兵之霸術也。東萊守正之王道也。然邊

事之壞多起於詐謀。故漢武之用王恢，不如漢文之報當戶。○張明德曰：事是心非，非東萊不能看破。有此論古之識，方可以作古文。中間引聖賢立論申明，所以心非之故，更見周而總之。東萊胸中止有王道二字，遇此種行徑，純是伯術，焉得不云爾。

【音釋一】

①

【懷邢邱】皆晉地，在今河南。

②

【貫】同慣，習也。

③

【瘞】於計切。

盡也。

④

【潞】赤狄別種，在今山西。

⑤

【僞】音俊，絕異也。

【音釋二】

⑥

【共驢】

（書堯典）帝曰：疇咨若予采驢。兜曰：都！共工方鳩僝功。驢兜，臣

名，共工水官名，姓氏不可考。共，音恭。

⑦

【跖躄】

音隻，矯。史記游俠列傳：跖躄暴戾，其

徒誦義無窮，跖盜跖，孔子時人，躄，莊躄，楚之大盜。

⑧

【許史】二姓皆漢之外戚，宣帝時並

貴顯用事。許伯，宣帝皇后父，史高，宣帝外家也。

⑨

【袁劉】（宋書袁粲傳）粲字景倩，與

齊王劉秉平決萬機，順帝即位，詔移石頭，時齊王功高，天命有歸，粲密與秉謀，剋攻齊王，事泄

並誅。

⑩

【後之人三句】即本事伯宗語。

⑪

【董仲舒】（漢書董仲舒傳）仲舒，廣川

人也，少治春秋，武帝即位，舉賢良文學之士，以仲舒爲江都相。

⑫

【公孫弘】（漢書公孫

弘傳）弘，菑川人也，年四十餘，乃學春秋，武帝元朔中，代薛澤爲丞相，封平津侯。

⑬

【武帝

景帝子名徹。⑤【劉向】（漢書劉向傳）向字子政常顯頌宗室譏諷王氏其言多痛切發於至誠。⑥【谷永】（漢書谷永傳）永字子雲長安人也建始初對賢良策舉上第。⑦【成帝】元帝子名騫。⑧【井辱秣陵】陳時景陽井亦名胭脂井又名辱井隋兵入宮陳後主與張麗華孔貴嬪俱投於此秣陵今江蘇江寧縣陳都其處。⑨【泉貪交廣】晉吳隱之字處默性廉潔爲廣州刺史未至州二十里地名石門有水曰貪泉故老云飲此水者廉喜貪隱之至泉所酌而飲之賦詩曰昔人云此水一飲懷千金試使夷齊飲終當不易心及在州清操愈厲交廣二州名在廣西。

公孫歸父言魯樂

宣公十四年公孫歸父會齊侯于穀見晏桓子言魯樂桓子曰子家其亡乎懷於魯矣懷必貧貧必謀人謀人人亦謀己一國謀之何以不亡十八年歸父奔齊。

舊國舊都望之悵然遲遲其行者亦聖人去父母國之道也。夫思者聖愚之所共。公孫歸父懷於魯曷以獨爲晏氏之所譏曰去國

引證的確

悲字剔出
樂字

而懷者情之正也。儀之琴居北而音南。烏之吟身楚而聲越。是固情之不可解。而仁人君子之所許也。因去國之悲。然後懷在國之樂。曷有居其國而知其樂者乎。獸在阱則思壙。當其走壙。未嘗知壙之樂也。鳥在籠則思林。當其棲林。未嘗知林之樂也。歸父方居魯而喋喋以魯樂告人。自非不安其常而嗜其利。何緣而知其樂哉。岱之山。洙之水。五父之衢。大庭之庫。城闕井邑。物產土俗。呱呱而育焉。髻而嬉焉。弁而遊焉。固非驟見而忽聞。胡爲而誇語於人耶。日飯稻粱。未嘗以告人。一得熊蹯牛心之饋。則譽其珍。歲衣布帛。未嘗以告人。一得霧縠文錦之服。則譽其美。吾是以知歸父之言魯樂。必棄常而嗜利也。棄常嗜利。乾沒不已。雖非晏氏。固可指期。

又以哀字
悲字剔出
樂字

聖賢之樂
不繫於物
說得透辨
得明

而。俟。其。亡。矣。至。樂。之。地。人。皆。有。之。惟。不。能。有。其。樂。而。樂。移。於。物。故。
馳。驚。而。忘。反。權。寵。之。樂。勃。如。也。詞。華。之。樂。驕。如。也。聲。色。之。樂。昏。如。
也。畋。遊。之。樂。蕩。如。也。是。皆。陋。人。之。所。樂。君。子。之。所。哀。哀。之。者。豈。預。
憂。其。禍。至。哉。廿五鴟。鴞。嗜。鼠。廿六卽。且。甘。帶。何。等。朽。腐。而。忻。慕。耽。惑。以。身。償。
而。不。悔。是。固。達。者。之。所。甚。憐。也。歸。父。譽。魯。樂。之。時。固。已。可。悲。矣。奚。
必。悲。其。將。亡。哉。吾。嘗。聞。孔。顏。之。樂。矣。廿七曰。樂。在。其。中。者。孔。子。之。樂。也。
曰。不。改。其。樂。者。顏。子。之。樂。也。然。而。飯。也。飲。也。曲。肱。也。非。孔。子。之。樂。
特。樂。在。其。中。而。已。簞。也。瓢。也。陋。巷。也。非。顏。子。之。樂。特。不。改。其。樂。而。
已。意。者。聖。賢。之。樂。果。窅。然。而。無。物。耶。彼。所。謂。樂。在。其。中。者。在。之。一。
辭。必。有。所。居。也。彼。所。謂。不。改。其。樂。者。其。之。一。辭。必。有。所。指。也。居。何。

所居指何所指吾黨盍共釋之。

【評】

張明德曰。去國懷鄉。亦是人情常理。雖聖賢不免。然自歸父言之。又是一段肺腸。所以文于前半。斷歸父湛樂之非。後幅言聖賢之樂。不繫于物。兩層意思。皆言之有本。非徒以設辨見長也。彼孔顏之樂。吾黨之樂。是二是一。又在意會之矣。吾于先生文每一讀過。輒欲起舞。可與商彝周鼎並傳。正不在區區文字間也。

【音釋一】

①【樂】音洛。謂樂居高位也。②【子家】歸父字。

【音釋二】

③【舊國二句】見《莊子則陽篇》。④【遲遲二句】見《孟子萬章篇》。

⑤【儀之琴二句】晉囚楚鍾儀。使與之琴。操南音。見《左傳成公九年》。南音。楚音。

⑥【鳥之吟二句】越人莊烏。仕楚而病。人往聽之。則尚越聲也。見《史記陳軫傳》。⑦【

阱】坑也。⑧【走壙】《孟子離婁篇》。獸之走壙也。壙。廣野。⑨【喋喋】音牒。多言也。

《漢書》。喋喋利口。⑩【岱山】即泰山。⑪【洙水】在魯城北。⑫【五父之衢】魯

東南道名。《禮檀弓》。孔子少孤。不知其墓。殯於五父之衢。⑬【大庭之庫】大庭。古國名。

在魯城內魯於其處作庫（左傳昭公十八年）夏五月宋衛陳鄭皆火梓慎登大庭氏之庫而望之。④【井邑】井田都邑。⑤【瓠】音姑小兒啼聲（書益稷）啓瓠瓠而泣。⑥【髻】音迢小兒垂髮爲飾也。⑦【弁】（士冠禮疏）弁是古冠之大者。⑧【稻梁】（禮內則）飯黍稷稻粱。⑨【熊蹯】卽熊掌（左傳宣公二年）宰夫胹熊蹯不熟。⑩【牛心】（世說）王羲之年十三周顛異之時重牛心炙座客未噉顛先割啖羲之於是始知名。⑪【霧縠】（司馬相如賦）垂霧縠言其輕靡如霧也縠音斛卽今縐紗。⑫【文錦】雜色織文也（漢書食貨志）富者土木被文錦。⑬【棄常】（左傳）人棄常則妖興。⑭【乾沒】微幸取利之義（史記）張湯始爲小吏乾沒。⑮【鴟鴞嗜鼠】句見（莊子齊物論）。⑯【卽且甘帶】（史記龜策傳）騰蛇之神而殆於卽且卽且亦作螭蛆蜈蚣也帶者蛇也。⑰【樂在其中數句】（論語述而篇）子曰飯疏食飲水曲肱而枕之樂亦在其中矣（又雍也篇）一簞食一瓢飲在陋巷人不堪其憂回也不改其樂。

新體
評註

東萊博議卷四終